



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:


- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>



29728.f.2



J. R. King.
Schol. Dunc.
1852.



D. JUNII JUVENALIS

ET

A. PERSII FLACCI

SATIRÆ,

AD FIDEM OPTIMARUM EDITIONUM.

OXONII,

IMPENSIS WINTERBORNE ET SABIN.

LONDINI, H. WASHBOURNE.

1845.

D. JUNII JUVENALIS

AQUINATIS

S A T I R A R U M

LIBER PRIMUS.

SATIRA I.

ARGUMENTUM.

In prima hujus Satiræ parte (v. 1-18,) lepidas poeta tradit causas, quibus adductus animus ad carmina scribenda et post longam demum moram evulganda appulerit: se enim, recitationibus crebris et importunis multorum poetarum, qui ejusdem fere argumenti carmina composuerint iisdemque adumbraverint coloribus, tamdiu ac toties et tantopere offensum atque vexatum, sibi temperare non potuisse, quo minus ipse etiam aliquid scriberet recitaretque, quo saltem iis, quibus non sine ingenti lædio aures præbuerit, reponeret, rependeret, par pari referret, h. e. idem legendi audiendique fastidium crearet, ne patientiam suam hi impune insultasse videri possent; (v. 1-14), utque aliquam certe scribendi facultatem sibi compararet, scholas dicit Grammaticorum Rhetorumque a se fuisse frequentatas; nihil autem referre, utrum aliorum versificatorum,

quorum tantus sit numerus, ut ubique iis occurrat, an sua manu pereat charta. (v. 15-18.) In altera Satiræ parte (v. 19-150) rationes affert, quare, capto carminum scribendorum consilio, ad satiras potius, quam ad alia poematum genera, animum converterit: tot enim et tanta Romæ nunc vigere vitia ac scelera, ut in hoc campo facile suppeditet omnis dicendi apparatus, et difficile sit, satiram non scribere utque, si natura neget, faciat indignatio versum, qualemcumque possit; (v. 30, 79) multo quoque magis expedire, hæc hominum vitia notari, quam exponi mythos et argumenta, jam tractata a tot poetis et omnibus notu. (v. 52 seq.) Præterea summam proponit omnium, quæ in satiris suis persequi apud animum constituerit quæque hoc poeseos genus complectatur. (v. 81-86.) In fine demum carminis animo secum reputans ac dolens, pristam loquendi scribendique libertatem poetis præcisam esse et homines, qui multum auctoritate et Imperatorum gratia valeant, nedum ipsos Cæsares, non sine salutis vitæque periculo vivos carpi posse, se in sola mortuorum, utpote qui non amplius mordeant, facta et mores invecturum esse profitetur. (v. 150-171.)

SEMPER ego auditor tantum? nunquamne reponam,
 Vexatus toties rauci Theseide Codri?
 Impune ergo mihi recitaverit* ille togatas,
 Hic elegos? impune diem consumserit ingenis

* Cantaverit. Heinr.

Telephus, aut summi plena jam margine libri
Scriptus et in tergo, nec dum finitus, Orestes?

Nota magis nulli domus est sua, quam mihi
lucus

Martis et Æoliis vicinum rupibus antrum
Vulcani. Quid agant venti, quas torqueat umbras
Æacus, unde alius furtivæ devehat aurum 10
Pelliculæ, quantas jaculetur Monychus ornos,
Frontonis platani convulsaque marmora clamant
Semper et assiduo ruptæ lectore columnæ.
Expectes eadem a summo minimoque poeta!
Et nos ergo manum ferulæ subduximus, et nos
Consilium dedimus Sullæ, privatus ut altum
Dormiret. Stulta est clementia, quum tot ubique
Vatibus occurras, perituræ parcere chartæ.

Cur tamen hoc potius libeat decurrere campo,
Per quem magnus equos Auruncæ flexit alumnus,
Si vacat et placidi rationem admittitis, edam. 21
Quum tener uxorem ducat spado, Mævia Tuscum
Figat aprum et nuda teneat venabula mamma;
Patricios omnes opibus quum provocet unus,
Quo tondente gravis juveni mihi barba sonabat;
Quum pars Niliacæ plebis, quum verna Canopi
Crispinus, Tyrias humero revocante lacernas,
Ventilet æstivum digitis sudantibus aurum,
Nec sufferre queat majoris pondera gemmæ:
Difficile est Satiram non scribere. Nam quis
iniquæ 30

Tam patiens Urbis, tam ferreus, ut teneat se,
Causidici nova quum veniat lectica Mathonis,
Plena ipso? post hunc magni delator amici
Et cito rapturus de nobilitate comesa,
Quod superest; quem Massa timet, quem munere
palpat

Carus et a trepido Thymeles submissa Latino;
 Quum te submoveant qui testamenta merentur
 Nootibus, in cœlum quos evehit optima summi
 Nunc via processus, vetulæ vesica beatæ?
 Unciolam Proculius habet, sed Gillo deuncem, 40
 Partes quisque suas ad mensuram inguinis heres.
 Accipiat sane mercedem sanguinis et sic
 Palleat, ut nudis pressit qui calcibus anguem,
 Aut Lugdunensem rhetor dicturus ad aram!

Quid referam, quanta siccum jecur ardeat ira,
 Quum opulum gregibus oomitum premit* hic
 spoliator

Pupilli prostantis? et hic damnatus inani
 Judicio (quid enim salvis infamia nummis?)
 Exsul ab octava Marius bibit et fruitur Dis
 Iratis; at tu victrix provincia ploras! 50

Hæc ego non credam Venusina digna lucerna?
 Hæc ego non agitem? Sed quid magis Heracleas
 Aut Diomedæas aut mugitum Labyrinthi
 Et mare percussum pucro fabrumque volantem,
 Quum leno accipiat moechi bona, si capiendi
 Jus nullum uxori, doctus spectare lacunar,
 Doctus et ad calicem vigilantem stertere naso;
 Quum fas esse putet curam sperare cohortis,
 Qui bona donavit præsepibus et caret omni
 Majorum censu, dum pervolat axe citato 60
 Flaminiam puer: Automedon nam lora tenebat,
 Ipse lacernatæ quum se jactaret amicæ.
 Nonne libet medio ceras implere capaces
 Quadrivio? quum jam sexta cervice feratur
 Hinc atque inde patens ac nuda pæne cathedra
 Et multum referens de Mæcenate supino

* *Premat.* Heinr.

† *Spectare.* Heinr.

Signator, falso* qui se lautum atque beatum
 Exiguâ tabulis et gemma fecerat uda;
 Occurrit matrona potens, quæ, molle Calenum
 Porrectura, viro miscet sitiante rubetam, 70
 Instituitque rudes melior Locusta propinquis
 Per famam et populum nigros efferre maritos.

Aude aliquid brevibus Gyaris et carcere dignum,
 Si vis esse aliquis! Probitas laudatur et alget.
 Criminibus debent hortos, prætoria, mensas,
 Argentum vetus et stantem extra pocula caprum.
 Quem patitur dormire nurus corruptor avaræ,
 Quem sponsæ turpes et prætextatus adulter?
 Si natura negat, facit indignatio versum,
 Qualemcumque potest, quales ego vel Cluvenus.

Ex quo Deucalion, nimbis tollentibus æquor, 81
 Navigio montem ascendit sortesque poposcit,
 Paulatimque anima caluerunt mollia saxa,
 Et maribus nudas ostendit Pyrrha puellas,
 Quidquid agunt homines, votum, timor, ira, vo-
 luptas,

Gaudia, discursus, nostri est farrago libelli.
 Et quando uberior vitiorum copia? quando
 Major avaritiæ patuit sinus? alea quando
 Hos animos? Neque enim loculis comitantibus itur
 Ad casum tabulæ, posita sed luditur arca. 90
 Proelia quanta illic dispensatore videbis
 Armigero! Simplexne furor, sestertia centum
 Perdere et horrenti tunicam non reddere servo?
 Quis totidem erexit villas? quis fercula septem
 Secreto cœnavit avus? Nunc sportula primo
 Limine parva sedet, turbæ rapienda togatæ.
 Ille tamen faciem prius inspicit et trepidat, ne

* *Signator falso*, Heinr.

Suppositus venias ac falso nomine poscas
 Agnitus accipies ; jubet a præcone vocari
 Ipsos Trojugenas : nam vexant limen et ipsi 100
 Nobiscum. Da Prætori, da deinde Tribuno !
 Sed libertinus prior est. Prior, inquit, ego adsum :
 Cur timeam, dubitemve locum defendere, quamvis
 Natus ad Euphraten, molles quod in aure fenestræ
 Auguerint, licet ipse negem ? Sed quinque ta-
 bernæ

Quadringenta parant. Quid confert purpura major
 Optandum, si Laurenti custodit in agro
 Conductas Corvinus oves ? Ego possideo plus
 Pallante et Licinis. Exspectent ergo tribuni ;
 Vincant divitiæ, sacro nec cedat honori, 110
 Nuper in hanc urbem pedibus qui venerat albis ;
 Quandoquidem inter nos sanctissima Divitiarum
 Majestas : etsi funesta Pecunia templo
 Nondum habitas, nullas nummorum ereximus
 aras,

Ut colitur Pax atque Fides, Victoria, Virtus,
 Quæque salutato crepitat Concordia nido.

Sed quum summus honor finito computet anno,
 Sportula quid referat, quantum rationibus addat ;
 Quid facient comites, quibus hinc toga, calceus
 hinc est

Et panis fumusque domi ? Densissima centum 120
 Quadrantes lectica petit, sequiturque maritum
 Languida vel prægnans et circumducitur uxor.
 Hic petit absenti, nota jam callidus arte,
 Ostendens vacuum et clausam pro conjuge sellam.
 Galla mea est, inquit. Citius dimitte. Moraris ?
 Profer, Galla, caput. Noli vexare, quiescit.

* *Citius dimitte : moraris.* Heinr.

Ipse dies pulcro distinguitur ordine rerum :
 Sportula, deinde forum, jurisque peritus Apollo
 Atque triumphales, inter quas ausus habere
 Nescio quis titulos Ægyptius atque Arabarches,
 Cujus ad effigiem non tantum meliore fas est. 131
 Vestibulis abeunt veteres lassique clientes,
 Votaque deponunt, quamquam longissima cœnæ
 Spes homini. Caules miseris atque ignis emendus.
 Optima silvarum interea pelagique vorabit
 Rex horum, vacnisque toris tantum ipse jacebit.
 Nam de tot pulcris et latis orbibus et tam
 Antiquis una comedunt patrimonia mensa.
 Nullus jam parasitus erit ! Sed quis ferat* istas
 Luxuriæ sorores ? Quanta est gula, quæ sibi totos
 Ponit apros, animal propter convivia natum ! 141
 Pœna tamen præsens, quum tu deponis amictus
 Turgidus et crudum pavonem in balnea portas.
 Hinc subitæ mortes atque intestata senectus.
 It nova, nec tristis, per cunctas fabula cœnas,
 Ducitur iratis plaudendum funus amicis.

Nil erit ulterius, quod nostris moribus addat
 Posteritas : eadem cupient facientque minores.
 Omne in præcipiti vitium stetit. Utere velis ;
 Totos pande sinus. Dicas hic forsitan, Unde 150
 Ingenium par materiæ ? unde illa priorum
 Scribendi, quodcumque animo flagrante liberet,
 Simplicitas, cujus non audeo dicere nomen ?
 Quid refert dictis ignoscat Mucius, an non ?
 Pone Tigellinum : tæda lucebis in illa,
 Qua stantes ardent, qui fixo gutture fumant,
 Et latum media sulcū diducit arena.—
 Qui dedit ergo tribus patruis aconita, vehatur

* *Feret.* Heinr.† *Deducit.* Heint.

Pensilibus plumis, atque illinc despiciat nos?—
 Quum veniet contra, digito compeste labellum:
 Accusator erit, qui verbum dixerit, Hic est. 161
 Securus licet Æneam Rutulumque ferocem
 Committas: nulli gravis est percussus Achilles,
 Aut multum quæsitus Hylas urnamque secutus.
 Ense velut stricto quoties Lucilius ardens
 Infremuit, rubet auditor, cui frigida mens est
 Criminibus; tacita sudant præcordia culpa.
 Inde iræ et lacrumæ. Tecum prius ergo voluta
 Hæc animo ante tubas. Galeatum sero duelli
 Pœnitet. Experiar, quid concedatur in illos, 170
 Quorum Flaminia tegitur cinis atque Latina.

SATIRA II.

ARGUMENTUM.

Magna nunc Romæ est pessimorum multitudo hominum, qui, vultu et sermone speciem sapientiæ ac virtutis præ se ferentes, vitia, quibus ipsi indulgent quam maxime, verbis pænisque castigant, tristes in publico, domi obscæni. (v. 1-28). Neque id mirum: nam perniciosum hujus simulationis exemplum Princeps et Censor severus, tragico nuper pollutus adulterio, edidit, quod certatim imitantur senatores ac nobiles, qui muliebria tam facientes quam patientes et sericis perlucidisque vestibus induti mollitiem tamen acrius increpant. (29-78.) Horum contagio cujusque mox ordinis et sexus homines trahet, (78-81) ipsi vero paulatim, ut vulgo

At, ab illa turpitudine ad maiorem delabentur, et in consortium fœdorum muliebriumque recipientur virorum, qui, sexum, habitum, ornatum, vultum, vocis exilitatem incessumque feminarum mentientes, sacra Bonæ Deæ celebrant, et, Othonis Imperatoris exemplo, in ipsis castris vel speculis utuntur, vel faciem linunt pane madido. (82-114). Non desunt etiam, heu nefas! viri, iique summo loco nati, ac sacerdotes, qui data dote viris nubunt nihilque magis dolent, quam quod nequeunt parere. (115-142.) Quod tamen omnium turpissimum est ac portento simile, viros, genere et nobilitate hujus civitatis facile principes, non pudet gladiatorum et vel retiariorum, qui nuda facie pugnant, partes agere. (143-148). Quæ monstra hominum, si vera essent, quæ de Manibus et inferis poetæ fabulantur adspicere olim in Orco horerent Curii, Fabricii aliique spectatæ virtutis viri. (149-158). Quid enim prodest, imperium nostrum orbis terrarum terminis definiri, si barbaros populos, quos vicimus armis, etiam vitiis superamus, et peregrini, qui ad nos com-mearunt, mox perditos induunt mores nostros atque in patriam suam referunt? (159-170).

ULTRA Sauromatas fugere hinc libet et glaciale
Oceanum, quoties aliquid de moribus audent,
Qui Curios simulant et Bacchanalia vivunt.
Idocti primum; quanquam plena omnia gypso
Chryssippi invenias.* Nam perfectissimus horum
est,

* *Invenies. Helix.*

Si quis Aristotelem similem vel Pittacou emit
 Et inbet archetypos pluteum servare Cleanthas.
 Fronti* nulla fides. Quis enim non vicus abundat
 Tristibus obscenis? Castigas turpia, quum sis
 Inter Socraticos notissima fossa cinædos! 10
 Hispida membra quidem et duræ per brachia
 setæ

Promittunt atrocem animum; sed prodice levi
 Cæduntur tumidæ, medico ridente, mariscæ.
 Rarus sermo illis et magna lubido tacendi
 Atque supercilio brevior coma. Verius ergo
 Et magis ingenue Peribomius. Hunc ego fatis
 Imputo, qui vultu morbum incessuque fatetur:
 Horum simplicitas miserabilis; his furor ipse
 Dat veniam: sed peiores, qui talia verbis
 Herculis invadunt et de virtute locuti 20
 Clunem agitant. Ego te ceventem, Sexte, verebor?
 Infamis Varrillus ait. Quo deterior te?
 Loripedem rectus derideat, Æthiopem albus.
 Quis tulerit Gracchos de seditione querentes?
 Quis cælum terris non misceat et mare cælo,
 Si fur displiceat Verri, homicida Miloni?
 Clodius accuset mœchos, Catilina Cethegum?
 In tabulam Sullæ si dicant discipuli tres?
 Qualis erat nuper tragico pollutus adulter
 Concubitu, qui tunc leges revocabat amaras 30
 Omnibus atque ipsis Veneri Martique timendas,
 Quum tot abortivis fecundam Iulia vulvam
 Solveret et patruo similes effunderet offas.
 Nonne igitur jure ac merito vitia ultima fctos
 Contemnunt Scauros et castigata remordent?
 Non tulit ex illis torvum Lauronia quendam

* *Frontis.* Heinr.

Clamantem toties : Ubi nunc lex Iulia ? dormis ?
 Ad quem subridens : " Felicia tempora, quæ te
 " Moribus obponunt ! Habeat jam Roma pudorem !
 " Tertius e cælo cecidit Cato. Sed tamen unde 40
 " Hæc emis, hirsuto spirant opobalsama collo
 " Quæ tibi ? Ne pudeat dominum monstrare ta-
 bernæ.

" Quod si vexantur leges ac jura, citari
 " Ante omnes debet Scatinia.* Respice primum
 " Et scrutare viros ; faciunt hi plura ; sed illos
 " Defendit numerus junctæque umbone phalanges.
 " Magna inter molles concordia. Non erit ullum
 " Exemplum in nostro tam detestabile sexu.
 " Tædia non lambit Culviam, nec Flora Catullam :
 " Hispo subit juvenes et morbo pallet utroque. 50
 " Numquid nos agimus causas ? civilia jura
 " Novimus ? aut ullo strepitu fora vestra movemus ?
 " Luctantur paucæ ; comedunt coliphia paucæ.
 " Vos lanam trahitis calathisque peracta refertis
 " Vellera : vos tenui prægnantem stamine fusum
 " Penelope melius, levius torquetis Arachne,
 " Horrida quale facit residens in codice pellex.
 " Notum est, cur solo tabulas impleverit Hister
 " Liberto, dederit vivus cur multa puellæ.
 " Dives erit, magno quæ dormit tertia lecto. 60
 " Tu nube atque tace : donant arcana cylindros.
 " De nobis post hæc tristis sententia fertur :
 " Dat veniam corvis, vexat censura columbas."

Fugerunt trepidi vera ac manifesta canentem
 Stoicidæ. Quid enim falsi Lauroia ? Sed quid
 Non facient alii, quum tu multicia sumas,
 Cretice, et hanc vestem populo mirante perores

* *Scatinia*. Heinr. Oudendorp.

In Proculus et Pollitas? Est mœcha Fabulla:*
 Damnetur, si vis, etiam Carfinia: talem
 Non sumet damnata togam. Sed Julius ardet; 70
 Æstuo. Nudus agas! Minus est insanias turpis.
 En habitum, quo te leges ac jura ferentem
 Vulneribus crudis populus modo victor et illud
 Montanum positus audiret vulgus aratris.
 Quid non proclames, in corpore judicis ista
 Si videas? Quare,† an deceant multicia testem?
 Acer et indomitus libertatisque magister,
 Cretice, perluces. Dedit hanc contagio labem,
 Et dabit in plures; sicut grex totus in agris
 Unius scabie cadit et porrigine porci, 80
 Uvaeque conspecta|| livorem ducit ab uva.

Fœdus hoc aliquid quandoque audebis amictu.
 Nemo repente venit turpissimus. Accipient te
 Paulatim, qui longa domi redimicula sumunt
 Frontibus et toto posuere monilia collo
 Atque Bonam teneræ placant abdomine porcæ
 Et magno cratere Deam; sed more sinistro
 Exagitata procul non intrat femina limen:
 Solis ara Deæ maribus patet. Ite profanæ!
 Clamatur: nullo gemit hic tibicina cornu. 90
 Talia secreta coluerunt Orgia tædæ
 Cecropiam soliti Baptæ lassare Cotytto.
 Ille supercilium madida fuligine tactum
 Obliqua producit acu pingitque tremantes
 Adtollens oculos: vitreo bibit ille Priapo
 Reticulumque comis auratum ingentibus implet,

* *Fabulla*. Rup. et Heinr.

† *Infamia*. Heinr.

‡ *Quæro*. Rup. et Heinr.

|| *Contacta*. Heinr. Conf. Seneca de Tranquill.,
 c. 7, Liv. iv. 30.

Cærulea indutus scutulata aut galbana rasa,
 Et per Junonem domini jurante ministro.
 Ille tenet speculum, pathici gestamen Othonis,
 Actoris Aurunci spoliū, quo se ille videbat 100
 Armatum, quum jam tolli vexilla juberet.
 Res memoranda novis annalibus atque recenti
 Historia, speculum civilis sarcina belli.
 Nimirum summi ducis est occidere Galbam
 Et curare cutem; summi constantia civis,
 Bebriaci campo spoliū affectare Palati
 Et pressum in faciem* digitis extendere panem:
 Quod nec in Assyrio pharetrata Semiramis orbe,
 Mœsta nec Actiaca fecit Cleopatra carina.
 Hic nullus verbis pudor aut reverentia mensæ;
 Hic turpis Cybeles et fracta voce loquendi 111
 Libertas et crine senex phanaticus albo
 Sacrorum antistes, rarum ac memorabile magni
 Gutturis exemplum conducendusque magister.
 Quid tamen exspectant, Phrygio quos tempus erat
 jam

More supervacuum cultris abrumpere carnem?
 Quadringenta dedit Gracchus sestertia dotem
 Cornicini, sive hic recto cantaverat ære.
 Signatæ tabulæ: dictum Feliciter! Ingens
 Cœna sedet: gremio jacuit nova nupta mariti. 120
 O procere, censore opus est, an haruspice nobis?
 Scilicet horres majoraque monstra putares,
 Si mulier vitulum vel si bos ederet agnum?
 Segmenta et longos habitus et flammæ sumit,
 Arcano qui sacra ferens nutantia loro
 Sudavit clypeis ancilibus. O pater Urbis,
 Unde nefas tantum Latiis pastoribus? unde

* *Facie.* Heinr.

Hæc tetigit, Gradive, tuos urtica nepotes ?
 Traditur ecce viro clarus genere atque opibus vir :
 Nec galeam quassas, nec terram cuspide pulsas,
 Nec quereris patri ? Vade ergo et cede severi 131
 Jugeribus campi, quem negligis ! Officium oras
 Primo sole mihi peragendum in valle Quirini.
 Quæ causa officii ? Quid quæris ? Nubit amicus,
 Nec multos adhibet. Liceat modo vivere ; fient,
 Fient ista palam, cupient et in acta referri.
 Interea tormentum ingens nubentibus hæret,
 Quod nequeunt parere et partu retinere maritos.
 Sed melius, quod nil animis in corpora juris
 Natura indulget. Steriles moriuntur,* et illis 140
 Turgida non prodest condita pyxide Lyde,
 Nec prodest agili palmas præbere Luperco.

Vicit et hoc monstrum tunicati fuscina Gracchi,
 Lustravitque fuga mediam gladiator arenam
 Et Capitolinis generosior et Marcellis
 Et Catulis Paullique minoribus et Fabiis et
 Omnibus ad podium spectantibus. His licet ipsum
 Admoveas, cujus tunc munere retia misit.

Esse aliquid† Manes et subterranea regna
 Et contum et Stygio ranas in gurgite nigras, 150
 Atque una transire vadum tot millia cymba,
 Nec pueri credunt, nisi qui nondum ære lavantur.
 Sed tu vera puta. Curius quid sentit et ambo
 Scipiadæ ? quid Fabricius manesque Camilli ?
 Quid Cremere legio et Cannis consumta juvenus,
 Tot bellorum animæ, quoties hinc talis ad illos
 Umbra venit ? Cuperent lustrari, si qua darentur
 Sulphura cum tædis et si foret humida laurus.

* *Moriuntur.* Rup. et Heinr.

† *Aliquos.* Heinr.

Illuc, heu, miseri traducimur! Arma quidem ultra
 Litora Juvernæ promovimus et modo captas 160
 Orcadas ac minima contentos nocte Britannos:
 Sed quæ nunc populi fiunt victoris in Urbe,
 Non faciunt illi, quos vicimus. Et tamen unus
 Armenius Zalates cunctis narratur ephēbis
 Mollior ardenti sese indulsisse Tribuno.
 Adspice, quid faciant commercia: venerat obses.
 Hic fiunt homines! Nam si mora longior Urbem
 Indulsit pueris, non umquam deerit amator:
 Mittentur bracæ, cultelli, frena, flagellum.
 Sic prætextatos referunt Artaxata mores. 170

SATIRA III.

ARGUMENTUM.

Umbricius harsupex, quem Cumas migraturum Juvenalis ad Egeriæ usque lucum comitatur, (v. 1-20) veteri amico ibi discessus sui causas exponit, nimirum Romæ (1) probos homines contemptu laborare, neque ad honestas artes exercendas præmiis invitari, sed iis potius ad incitas redigi, malos contra et viles gratia atque auctoritate apud omnes, etiam Principes, valere, et pravis sordidisque artibus ad summos obrepere honores maximasque opes nancisci; (21-40) 2) spectatissimos esse et felicissimos artis dissimulandi adulandique gnaros, Astrologos, Alios, quibus mors parentum sit in optatis, et adulterii, furti aliorumque scelerum conscius; (41-57) 3) gratiosissimos omnium minimeque ferren-

dos esse peregrinos, qui e Syria aliisque Orientis regionibus Romam confluerint, ac prorsus corruerint mores hujus urbis, maxime Græcos, homines molles, libidinosos, adulationis omniumque artium peritissimos, qui in divitum se insinuent familiaritatem et quorum ne philosophi quidem dubitent, falsis testimoniis alios, ipsosque amicos ac discipulos circumvenire; (58-125) 4) miserrimam esse conditionem pauperis clientis, cui a ditioribus magistratibusque summis præripiatur sportula, qua vitam sustentaverit; (126-130) 5) servos ac libertinos ditiores esse ingenuis et honoratioribus; (131-136) 6) ne homini quidem probissimo religiosissimoque fidem haberi, nisi idem sit locuples; (137-146) 7) inopes atque tennes male vestitos omnibus ludibrio esse; loco ac sede honoratiori, quam olim occupaverint, a vilissimo quoque, modo dives ille sit, pelli; si familiam alicujus nuptiis ambiant, repudiari; non scribi heredes; a negotiis publicis removeri; neque facile ex egestate atque humili conditione emergere propter insana omnium rerum pretia; (147-170) 8) ambitiosam esse paupertatem, neque pro re ac facultatibus pretiosiores sumi vestes, quam in plerisque contra Italiae oppidis, etsi Romanis ibi legibus moribusque vivatur, nemo ne togam quidem, nedum prætextam, induat, et festis quoque diebus ac publice omnes, summi pariter et infirmi, nobiles et ignobiles, eodem habitu conspiciantur; (171-183) 9) ad egenis clientibus non patronis tantum, sed servis quoque, ne aditu ad dominos eorum prohibeantur, quovis die festo aliquid muneri esse dandum; (183-189) 10) neque interdiu vitam periculo vacuam esse, neque noctu somnum capi propter assiduam ædificiorum prolapsionem frequentiaque incendia, et

ædibus ardentibus pauperem, qui in summo habitat cœnaculo, non curari, donisque, etsi paucis, tamen omnibus, amissis a nemine juvari, ditioribus contra præsto esse qui subveniant; (190-222) 11) tenebras ædes tanti in unum conduci annum, quanti in aliis Italiæ opidis ematur domus cum agro hortique; (223-231) 12) plurimos pauperes mori morbo ex vigiliis contracto, quum in ea ædium parte habitent, quæ vicis proxima sit, et ubi continuo curruum, opificum jumentorumque strepitu somnus eorum interrumpatur; (232-238) 13) divites lectica per urbem ferri, et tuto in ea etiam legere ac dormire, inopes vero euntes vel a turba populi in vicis premi, concuti et conculcari, vel adeo casu arborum saxorumve, plaustris impositorum, obtritos perire; (239-267) 14) noctu summum esse periculum vel a testis fractis et ex alto cœnaculo dejectis, (268-277) vel a juventute lasciva ac temulenta, quæ nocturno tempore per urbem vagari, atque invalidum quemque obriorum corripere, cedere vel ultro quoque, tamquam injuria sibi facta sit, accusare soleat; (278-301) 15) tantem esse multitudinem grassatorum latronumque, quæ ex multis Italiæ locis Romam, tamquam feræ et aves ad vivaria, confluerint, ut vix suppetant catenæ ac vincula ad eos, qui capti sint, constringendos. (302-314). Hisce discessus causis memoratis Umbrius poetam valere jubet. (315-322).

QUAMVIS digressu veteris confusus amici,
 Laudo tamen, vacuis quod sedem figere Cumis
 Destinet atque unum civem donare Sibyllæ.
 Janua Baiarum est et gratum litus amœni

Secessus. Ego vel Prochytam præpono Suburæ.
Nam quid tam miserum, tam solum vidimus, ut non
Deterius credas horrere incendia, lapsus
Tectorum assiduos ac mille pericula sævæ
Urbis et Augusto recitantes mense potas?
Sed dum tota domus reda componitur una, 10
Substitit ad veteres arcus madidamque Capenam.
Hic, ubi nocturnæ Numa constituebat amices,
Nunc sacri fontis nemus et delubra locantur
Judeis; quorum copihnus fœnumque supellex.
Omnis enim populo mercedem pendere iussa est
Arbor, et ejectis mendicata silva Camenis.
In vallem Egeris descendimus et speluncas
Dissimiles veris. Quanto præstantius esset
Numen aque, viridi si margine clauderet undas
Herba, nec ingenuum violarent mormora tophum!
Hic tunc Umbrius, Quando artibus, inquit,
honestis 21
Nullus in Urbe locus, nulla emolumenta laborum,
Res hodie minor est, here quam fuit, atque eadem
cras
Deteret exiguis aliquid : proponimus illuc
Ire, fatigatas ubi Dædalus exiit alas,
Dum nova canities, dum prima et recta senectus,
Dum superest Lachesi quod torqueat, et pedi-
bus me
Porto meis, nullo dextram subeunte bacillo.
Cedamus patria: vivant Artorius istic
Et Catulus: maneant qui nigrum in candida
vertunt, 30
Quis facile est sædem conducere, flumina, portus,
Siccandam eluvium, portandum ad busta cadaver.
Et præbere caput domina venale sub hasta.
Quondam hi cornicines et municipalis aræne

Perpetui comites notæque per oppida buccæ
 Munera nunc edunt et, verso pollice vulgi,
 Quem libet, occidunt populariter: inde reversi
 Conducunt foricas; et cur non omnia? quum sint
 Quales ex humili magna ad fastigia rerum
 Extollit, quoties voluit Fortuna jocari. 40

Quid Romæ faciam? Mentiri nescio: librum,
 Si malus est, nequeo laudare et poscere: motus
 Astrorum ignoro: funus promittere patris
 Nec volo, nec possum: ranarum viscera numquam
 Inspexi. Ferre ad nuptam quæ mittit adulter,
 Quæ mandat, norunt* alii: me nemo ministro
 Fur erit, atque ideo nulli comes exeo, tamquam
 Mancus et extinctæ corpus non utile dextræ.
 Quis nunc diligitur, nisi conscius, et cui fervens
 Æstuat occultis animus semperque tacendis? 50
 Nil tibi se debere putat, nil conferet unquam,
 Participem qui te secreti fecit honesti.
 Carus erit Verri, qui Verrem tempore, quo vult,
 Accusare potest. Tanti tibi non sit opaci
 Omnis arena Tagi quodque in mare volvitur aurum,
 Ut somno careas ponendaque præmia sumas
 Tristis et a magno semper timearis amico.

Quæ nunc divitibus gens acceptissima nostris
 Et quos præcipue fugiam, proberabo fateri,
 Nec pudor obstat. Non possum ferre, Quirites, 60
 Græcam Urbem: quamvis quota portio fœcis
 Achæi?

Jam pridem Syrus in Tiberim defluxit Orontes
 Et linguam et mores et cum tibicine chordas
 Obliquas, nec non gentilia tympana secum
 Vexit et ad Circum jussas prostare puellas.

* Norint. Heint.

Ite quibus grata est picta lupa barbara mitra!
Rusticus ille tuus sumit trechedipna, Quirine,
Et ceromatico fert niceteria collo.
Hic alta Sicyone, ast hic Amydone relictæ,
Hic Andro, ille Samo, hic Trallibus aut Alabandis,
Esquilias dictumque petunt a vimine collem, 71
Viscera magnarum domuum dominique futuri.
Ingenium velox, audacia perditæ, sermo
Promptus et læso torrentior. Ede, quid illum
Esse putes? quem vis hominem, secum adtulit ad
nos:
Grammaticus, rhetor, geometres, pictor, aliptes,
Augur, schœnobates, medicus, magus: omnia
novit.
Græculus esuriens in cœlum, jusseris, ibit.
Ad summam, non Maurus erat neque Sarmata
nec Thrax,
Qui sumsit pennas, mediis sed natus Athenis. 80
Horum ego non fugiam conchylia? Me prior ille
Signabit? fultusque toro meliore recumbet
Advectus Romam, quo pruna et cottana vento?
Usque adeo nihil est, quod nostra infantia cœlum
Hausit Aventinum* baca nutrita Sabina?
Quid? quod adulandi gens prudentissima laudat
Sermonem indocti, faciem deformis amici,
Et longum invalidi collum cervicibus æquat
Herculis, Antæum procul a tellure tenentis,
Miratur vocem angustam, qua deterius nec 90
Ille sonat, quo mordetur gallina marito.
Hæc eadem licet et nobis laudare: sed illis
Creditur. An melior, quum Thaida sustinet, aut
quum

* *Aventini.* Heine et Vulg.

Uxorem comœdus agit vel Dorida nullo
 Cultam palliolo? Mulier nempe ipsa videtur,
 Non persona loqui: vacua et plana omnia dicas
 Infra ventriculum et tenui distantia rima.
 Nec tamen Antiochus, nec erit mirabilis illic
 Aut Stratocles aut cum molli Demetrius Hæmo.
 Natio comœda est. Rides? meliore* cachinno 100
 Concutitur; flet, si lacrimas conspexit amici,
 Nec dolet: igniculum brumæ si tempore poscas,
 Accipit endromidem: si dixeris, æstuo, sudat.
 Non sumus ergo pares: melior, qui semper et omni
 Nocte dieque potest alienum sumere vultum,
 A facie jactare manus, laudare paratus,
 Si bene ructavit, si rectum minxit amicus,
 Si trulla inverso crepitum dedit aurea fundo.
 Præterea sanctum nihil est et ab inguine tutum;
 Non matrona laris, non filia virgo, neque ipse 110
 Sponsus levis adhuc, non filius ante pudicus.
 Horum si nihil est, aviam resupinat amici.
 Scire volunt secreta domus atque inde timeri.
 Et quoniam cœpit Græcorum mentio, transi
 Gymnasia atque audi facinus majoris abollæ.
 Stoicus occidit Baream, delator amicum
 Discipulumque senex, ripa nutritus in illa,
 Ad quam Gorgonei delapsa est pinna caballi.
 Non est Romano cuiquam locus hic, ubi regnat
 Protopogenes aliquis vel Diphilus aut Erimarchus†,
 Qui gentis vitio numquam partitur amicum, 121
 Solus habet. Nam quum facilem stillavit in aurem
 Exiguum de naturæ patriæque veneno,
 Limine submoveor: perierunt tempora longi

* *Rides, majore ca.* Heinr et Vulg.

† *Hermarchus.* Rnp. et Heiuv.

Servitii. Nusquam minor est jactura clientis.
Quod porro officium, ne nobis blandiar, aut quod
Pauperis hic meritum, si curet nocte togatus
Currere, quum Prætor hictorem impellat et ire
Præcipitem jubeat, dudum vigilantibus orbis,
Ne prior Albinam et Modiam collega salutet? 130
Divitis hic servi claudit latus ingenuorum
Filius: alter enim, quantum in legione Tribuni
Accipiunt, donat Calvinæ vel Catiensæ,
Ut semel atque iterum superillam palpitet: at tu,
Quum tibi vestiti facies scorti placet, hæres
Et dubitas alta Chionem deducere sella.
Da testem Romæ tam sanctum, quam fuit hospes
Numinis Idæi: procedat vel Numa, vel qui
Servavit trepidam flagranti ex æde Minervam:
Protenus ad census, de moribus ultima fiet 140
Quæstio. Quot pascit servos? quot possidet agri
Jugera? quam multa magnæque paropside cœnat?
Quantum quisque sua nummorum servat in arca,
Tantum habet et fidei. Jures licet et Samothracum
Et nostrorum aras contemnere fulmina pauper
Creditur atque Deos, Dis ignoscentibus ipsis.
Quid? quod materiam præbet causasque jocorum
Omnibus hic idem, si fœda et scissa lacerna,
Si toga sordidula est et rupta calceus alter
Pelle patet; vel si consuto vulnere crassum 150
Atque recens linum ostendit non una cicatrix.
Nil habet infelix paupertas durius in se,
Quam quod ridiculos homines facit. Exeat, inquit,
Si pudor est, et de pulvino surgat equestri,
Cujus res legi non sufficit, et sedeant hic
Lenonum pueri quocumque in fornice nati.
Hic plaudat nitidi præconis filius inter
Pinnirapi cultos juvenes juvenesque lanistæ.

Sic libitum vano, qui nos distinxit, Othoni.
 Quis gener hic placuit censu minor atque puellæ
 Sarcinulis impar? quis pauper scribitur heres? 161
 Quando in consilio est Ædilibus? Agmine facto
 Debuerant olim tennes migrasse Quirites.
 Haud facile emergunt, quorum virtutibus obstat
 Res angusta domi; sed Romæ durior illis
 Conatus: magno hospitium miserabile, magno
 Servorum ventres et frugi cœnula magno.
 Fictilibus cœnare pudet, quod turpe negavit
 Translatus subito ad Marsos mensamque Sabellam
 Contentusque illic veneto duroque cucullo. 170
 Pars magna Italiæ est, si verum admittimus, in
 qua

Nemo togam sumit, nisi mortuus. Ipsa dierum
 Festorum herboso colitur si quando theatro
 Majestas tandemque redit ad pulpita notum
 Exodium, quum personæ pallentis hiatum
 In gremio matris formidat rusticus infans;
 Æquales habitus illic similesque* videbis
 Orchestræ et populum: clari velamen honoris,
 Sufficiunt tunicæ summis Ædilibus albæ.
 Hic ultra vires habitus nitor: hic aliquid plus 180
 Quam satis est interdum aliena sumitur arca.
 Commune id vitium est: hic vivimus ambitiosa
 Paupertate omnes. Quid te moror? Omnia Romæ
 Cum pretio. Quid das, ut Cossum aliquando salutes?
 Ut te respiciat clauso Veiento labello?
 Ille metit barbam, crinem hic deponit amati;
 Plena domus libis venalibus†! Accipe et istud
 Fermentum tibi habe: præstare tributa clientes

* *Similemque.* Heinr.

† *Genialibus.* Heinr et nonnulli editores. Cf.
 iv 66. x. 334.

Cogimur et cultis augere peculia servis.
 Quis timet aut timuit gelida Præneste ruinam, 190
 Aut positis nemorosa inter juga Volsiniis, aut
 Simplicibus Gabiis aut proni Tiburis arce?
 Nos urbem colimus tenui tibicine fultam
 Magna parte sui. Nam sic labentibus obstat
 Villicus et, veteris rimæ quum textit* hiatum,
 Securos pendente jubet dormire ruina.
 Vivendum est illic, ubi nulla incendia, nulli
 Nocte metus. Jam poscit aquam, jam frivola
 transfert

Ucalegon; tabulata tibi jam tertia fumant:
 Tu nescis: nam si gradibus trepidatur ab imis, 200
 Ultimus ardebit, quem tegula sola tuetur
 A pluvia, molles ubi reddunt ova columbæ.
 Lectus erat Codro Procula minor, urceoli sex,
 Ornamentum abaci; nec non et parvulus infra
 Cantharus et recubans sub eodem marmore Chiron;
 Jamque vetus Græcos servabat cista libellos,
 Et divina opici rodebant carmina mures.
 Nil habuit Codrus: quis enim negat? et tamen illud
 Perdidit infelix totum nihil: ultimus autem
 Ærumnæ cumulus, quod nudum et frustarogantem
 Nemo cibo, nemo hospitio tectoque juvabit. 211
 Si magna Asturici cecidit domus: horrida mater,
 Pullati proceres, differt vadimonia Prætor;
 Tunc gemimus casus Urbis, tunc odimus ignem.
 Ardet adhuc, et jam occurrit† qui marmora donet,
 Conferat impensas. Hic nuda et candida signa,
 Hic aliquid præclarum Euphranoriæ et Polycleti,

* *Pro "quum textit."* Heinr Ruperti et alii "con-
 textit" in textum recipiunt.

† *Accurrit.* Rnp. et Heinr.

Hæc Asianorum vetera ornamenta Deorum,
 Hic libros dabit et forulos mediamque Minervam,
 Hic modium argenti. Meliora ac plura reponit 221
 Persicus orborum lantissimus et merito jam
 Suspectus, tamquam ipse suas incenderit ædes.
 Si potes avelli Circensibus, optima Soræ
 Aut Fabrateriæ domus aut Frusinone paratur,
 Quanti nunc tenebras unum conducis in annum.
 Hortulus hic puteusque brevis nec restemovendus
 In tenues plantas facili diffunditur haustu.
 Vive bidentis amans et culti villicus horti,
 Unde epulum possis centum dare Pythagoreis.
 Est aliquid, quocumque loco, quocumque recessu,
 Unius sese dominum fecisse lacertæ. 231

Plurimus hic æger moritur vigilando : sed illum
 Languorem peperit cibus imperfectus et hærens
 Ardenti stomacho. Nam quæ meritoria somnum
 Admittunt? Magnis opibus dormitur in Urbe.
 Inde caput morbi. Bedarum transitus arcto
 Vicorum inflexu et stantis convicia mandræ
 Fripiunt somnum Druso vitulisque marinis.
 Si vocat officium, turba cedente vehetur
 Dives et ingenti curret super ora Liburno, 240
 Atque obiter leget aut scribet vel dormiet intus ;
 Namque facit somnum clausa lectica fenestra.
 Ante tamen veniet : nobis properantibus obstat
 Unda prior, magno populus premit agmine lumbos,
 Qui sequitur ; ferit hic cubito, ferit assere duro
 Alter : at hic tignum capiti incutit, ille metretam.
 Pinguia crura luto, planta mox undique magna
 Calcor, et in digito clavus mihi militis hæret.

Nonne vides, quanto celebretur sportula fumo ?
 Centum convivæ : sequitur sua quemque culina.
 Corbulo vix ferret tot vasa ingentia, tot res 251

Impositas capiti, quot recto vertice portat
 Servulus infelix et cursu ventilat ignem.
 Scinduntur tunicæ sartæ : modo* longa coruscet
 Sarraco veniente abies, atque altera pinum
 Plaustravehunt; nutant alte populoque minantur.
 Nam si procubuit, qui saxa Ligustica portat,
 Axis et eversum fudit super agmina montem,
 Quid superest de corporibus? quis membra, quis
 ossa

Invenit? Obtritum vulgi perit omne cadaver 260
 More animæ. Domus intera secunda patellas
 Jam lavat et bucca foculum excitat, et sonat unctis
 Strigilibus et pleno componit linteas gutto.
 Hæc inter pueros varie properantur: at ille
 Jam sedet in ripa tetrumque novicius horret
 Porthmea, nec sperat cœnosi gurgitis alnum,
 Infelix, nec habet quem porrigat ore trientem.

Respice nunc alia ac diversa pericula noctis:
 Quod spatium tectis sublimibus, unde cerebrum
 Testa ferit, quoties rimosa et curta fenestris
 Vasa cadant; quanto percussus pondere signent
 Et lædant silicem. Possis ignavus haberi
 Et subiti casus improvidus, ad cœnam si
 Intestatus eas. Adeo tot fata, quot illa
 Nocte patent vigiles, te prætereunte, fenestræ.
 Ergo optes votumque feras miserabile tecum,
 Ut sint contentæ patulas defundere pelves.

Ebrius ac petulans, qui nullum forte cecidit,
 Dat pœnas, noctem patitur lugentis amicum
 Pelidæ, cubat in faciem, mox deinde supinus. 280
 Ergo non aliter poterit dormire? Quibusdam

* Scinduntur tunicæ sartæ modo: longa cor.
 Heinr.

Somnum rixafacit: sed, quamvis improbus annis
 Atquemero fervens, cavet hunc, quem coccinalæna
 Vitari jubet et comitum longissimus ordo,
 Multum præterea flammaram et ænea lampas.
 Me, quem luna solet deducere vel breve lumen
 Candelæ, cujus dispenso et tempero flum,
 Contemnit. Misere cognosce procæmia rixæ,
 Si rixa est, ubi tu pulsas, ego vapulo tantum.
 Stat contra starique jubet; parere necesse est. 290
 Nam quid agas, quum te furiosus cogat et idem
 Fortior? Unde venis? exclamat: cujus aceto,
 Cujus conche tumes? quis tecum sectile porrum
 Sutor et elixi vervecis labra comedit?
 Nil mihi respondes? Aut dic, aut accipe calcem.
 Ede, ubi consistas: in qua te quæro proseucha?
 Dicere si tentes aliquid tacitusve recedas,
 Tantumdem est; feriunt pariter: vadimoniadeinde
 Irati faciunt. Libertas pauperis hæc est:
 Pulsatus rogat et pugnâ concisus adorat, 300
 Ut liceat paucis cum dentibus inde reverti.

Nec tamen hæc tantum metuas: nam, qui spo-
 liet te,
 Non deerit, clausis domibus, postquam omnis
 ubique
 Fixa catenatæ siluit compago tabernæ.
 Interdum et ferro subitus grassator agit rem,
 Armato quoties tutæ custode tenentur
 Et Pomtina palus et Gallinaria pinus.
 Sic inde huc omnes, tamquam ad vivaria, currunt.
 Qua fornace graves, qua non incude, catenæ?
 Maximus in vinclis ferri modus, ut timeas, ne 310
 Vomer deficiat, ne maræ et sarcula desint.
 Felices proavorum stivos, felicia dicas
 Sæcula, quæ quondam sub regibus atque tribunis

Viderunt uno contentam carcere Romam.

His alias poteram et plures subnectere causas :
Sed jumenta vocant, et sol inclinat : eundum est.
Nam mihi commota jam dudum mulio virga
Adnuit.* Ergo vale nostri memor, et quoties te
Roma tuo refici properantem reddet Aquino,
Me quoque ad Helvinam Cererem vestramque
Dianam 320
Convellat a Cumis. Satirarum ego, ni pudet illas,
Adjutor gelidos veniam caligatus in agros.

SATIRA IV.

ARGUMENTUM.

Juvenalis iterum invehitur in Crispinum Ægyptium, qui e servo factus Eques Romanus libidinibus omnibusque vitiis se inquinabat, et tanta diffuebat luxuria, ut mullum sex mullum sex millibus HS. emissset. (1-27). Inde occasionem sumit, Calvi Neronis h. e. Domitiani insectandi, et consilium patrum super rhombo, portentosæ magnitudinis pisce, coquendo habitum lepide multisque salibus admixtis describit. (28-149). Piscis enim ille prope villam Albanam in mari Hadriatico captus erat, et metu delatorum a piscatore dono datus tyranno, qui, quæcumque pretiosa, etiam in mari, invenirentur, tamquam res fisci, sibi vindicabat. (34-71). Sed deerat patina satis magna, ut integrum caperet

* Innuit. Heinr.

+ Convert. Heinr.

piscem. Hinc ad Imperatorem vocantur Patres foris stantes, qui, ne justo longiore mora Cæsaris iram provocent, propere trepideque accurrunt, et de re gravissima sententiam dicere iubentur, utrum scilicet piscis ille integer coquendus sit et apponendus, an in partes concisus. (72-112). Eorum disertissimi sunt Catullus Messallinus, cæcus, et Fabricius Veiento, prudens adulator. (113-118). Ille omnium maxime magnitudinem rhombi, quem ne videt quidem, miratur et prædicat. (119-122). Hic, numine quasi afflatus, ex eo, quod bellua sit peregrina et spinæ vel pinnæ telorem instar in tergo horreant, felix omen belli cum rege aliquo gerendi clarique triumphi capit. (123-129). Quæstione deinde illa ab Imperatore proposita diuque disceptata, vincit tandem sententia Montani, hominis ventriosi gulæque delicatæ, qui integrum piscem coquendum patinamque magnitudine ei æqualem a figulis propere effingendam, hos vero in posterum comitatu Cæsaris adjungendos censuerat. (130-143). Tum dimittitur Senatus, quem Imperator approperare jusserat, tamquam de re gravissima ad eum relaturus. (144-149). Quas nugæ poeta dicit Principe quidem indignas esse et ridiculas, at magis tamen Domitiano condonandas fuisse, quam immanem crudelitatem, qua factum sit, ut, quum ignava nobilitate extincta in infimam sævierit plebem, justam morte pependerit poenam. (150-154).

ECCE iterum Crispinus, et est mihi sæpe vocandus
 Ad partes, monstrum nulla virtute redemptum
 A vitiis, æger solaque libidine fortis :

Delicias viduas tantum aspernatur adulter.
 Quid refert igitur, quantis jumenta fatiget
 Porticibus, quanta nemorum vectetur in umbra,
 Jugera quot vicina foro, quas emerit sedes?
 Nemo malus felix, minime corruptor et idem
 Incestus, cum quo nuper vittata jacebat
 Sanguine adhuc vivo terram subitura sacerdos. 10
 Sed nunc de factis levioribus: et tamen alter
 Si fecisset idem, caderet sub iudice morum.
 Nam quod turpe bonis, Titio Seioque, decebat
 Crispinum. Quid agas, quum dira et fœdior omni
 Crimine persona est? Mullum sex millibus emit,
 Æquantem sane paribus sestertia libris,
 Ut perhibent, qui de magnis majora loquuntur.
 Consilium laudo artificis, si munere tanto
 Præcipuam in tabulis ceram senis abstulit orbi.
 Est ratio ulterior, magnæ si misit amicæ, 20
 Quæ vehitur clauso latis specularibus antro.
 Nil tale exspectes: emit sibi. Multa videmus,
 Quæ miser et frugi non fecit Apicius. Hoc tu,
 Succinctus patria quondam, Crispine, papyro!
 Hoc pretium squamæ! Potuit fortasse minoris
 Piscator, quam piscis, emi. Provincia tanti
 Vendit agros; sed majores Appulia vendit.
 Quales tunc epulas ipsum glutisse putemus
 Endoperatorem,* quum tot sestertia, partem
 Exiguam et modicæ sumtam de margine cœnæ, 30
 Purpureus magni ructarit scurra Palati,
 Jam princeps Equitum, magna qui voce solebat
 Vendere municipes fricta de merce siluros?†
 Incipe, Calliope, licet et considerare: non est

* *Induperatorem.* Heinr.

† *Fracta de merce siluros!* Heinr.

Cantandum, res vera agitur. Narrate, puellæ
Pierides: prosit mihi vos dixisse puellas!

Quum jam semianimum laceraret Flavius orbem
Ultimus et calvo serviret Roma Neroni,
Incidit Adriaci spatium admirabile rhombi
Ante domum Veneris, quam Dorica sustinet Ancon,
Implevitque sinus: neque enim minor hæserat
illis,

Quos operit glacies Mæotica ruptaque tandem
Solibus effundit torpentis ad ostia Ponti,
Desidia tardos et longo frigore pingues.
Destinat hoc monstrum cymbæ linique magister
Pontifici summo. Quis enim proponere talem
Aut emere auderet, quum plena et litora multo
Delatore forent? Dispersi protenus algæ
Inquisitores agerent cum remige nudo,
Non dubitaturi fugitivum dicere piscem 50
Depastumque diu vivaria Cæsaris; inde
Elapsum veterem ad dominum debere reverti.
Si quid Palfurio, si credimus Armillato,
Quidquid conspicuum pulcrumque est æquore
toto,

Res fisci est, ubicumque natat. Donabitur ergo,
Ne pereat. Jam letifero cedente pruinis
Autumno, jam quartanam sperantibus ægris,
Stridebat deformis hyems prædamque recentem
Servabat: tamen hic properat, velut urgeat Auster.
Utque lacus suberant, ubi, quamquam diruta,
servat 60

Ignem Trojanum et Vestam colit Alba minorem,
Obstitit intranti miratrix turba parumper.
Ut cessit, facili patuerunt cardine valvæ;
Exclusi spectant admissa opsonia Patres.
Itur ad Atridem. Tum Picens, Accipe, dixit.

Privatis majora focus: genialis agatur
 Iste dies; propera stomachum laxare saginis,
 Et tua servatum consume in sæcula rhombum.
 Ipse capi voluit. Quid apertius? et tamen illi
 Surgebant cristæ. Nihil est, quod credere de se 70
 Non possit, quum laudatur Dis æqua potestas.
 Sed deerat pisci patinæ mensura. Vocantur
 Ergo in consilium proceres, quos oderat ille;
 In quorum facie miseræ magnæque sedebat
 Pallor amicitiae. Primus, clamante Liburno,
Currite! jam sedit! rapta properabat abolla
 Pegasus, adtonitæ positus modo villicus Urbi.
 Anne aliud tunc Præfecti? quorum optimus atque
 Interpres legum sanctissimus; omnia quamquam
 Temporibus diris tractanda putabat inermi 80
 Justitia. Venit et Crispi jucunda senectus,
 Cujus erant mores, qualis facundia, mite
 Ingenium. Maria ac terras populosque regenti
 Quis comes utilior, si clade et peste sub illa
 Sævitiæ damnare et honestum afferre liceret
 Consilium? Sed quid violentius aure tyranni,
 Cum quo de pluviis aut æstibus aut nimbo
 Vere locuturi fatum pendebat amici?
 Ille igitur numquam direxit brachia contra
 Torrentem, nec civis erat, qui libera posset 90
 Verba animi proferre et vitam impendere vero.
 Sic multas hyemes atque octogesima vidit
 Solstitia, his armis illa quoque tutus in aula.
 Proximus ejusdem properabat Acilius ævi
 Cum juvene, indigno, quem mors tam sæva maneret
 Et Domini gladiis tam festinata: sed olim
 Prodigio par est cum nobilitate senectus;
 Unde fit, ut malim fraterculus esse gigantis.
Profuit ergo nihil misero, quod cominus ursos

Figebat Numidas, Albana nudus arena 100
 Venator. Quis enim jam non intelligat artes
 Patricias? Quis priscum illud miretur* acumen,
 Brute, tuum? Facile est barbato imponere regi.
 Nec melior vultu, quamvis ignobilis, ibat
 Rubrius, offensæ veteris reus atque tacendæ,
 Et tamen improbius satiram scribente cinædo.
 Montani quoque venter adest, abdomine tardus,
 Et matutino sudans Crispinus amomo,
 Quantum vix redolent duo funera; sævior illo
 Pompeius tenui jugulos aperire susurro, 110
 Et qui vulturibus servabat viscera Dacis
 Fuscus, marmorea meditatus proelia villa,
 Et cum mortifero prudens Veiento Catullo,
 Qui nunquam visæ flagrabat amore puellæ,
 Grande et conspicuum nostro quoque tempore
 monstrum!

Cæcus adulator† dirusque a ponte satelles,
 Dignus Aricinos qui mendicaret ad axes
 Blandaque devexæ jactaret basia redæ.
 Nemo magis rhombum stupuit: nam plurima dixit
 In lævam‡ conversus: at illi dextra jacebat 120
 Belua. Sic pugnas Cilicis laudabat et ictus
 Et pegma et pueros inde ad velaria raptos.
 Non cedit Veiento, sed ut fanaticus, œstro
 Percussus, Bellona, tuo, divinat et, Ingens
 Omen habes, inquit, magni clarique triumphi:
 Regem aliquem capies, aut de temone Britanno
 Excidet Arviragus: peregrina est belua: cernis
 Erectas in terga sudes? Hoc defuit unum
 Fabricio, patriam ut rhombi memoraret et annos.

* *Miratur.* Heinr.

† *Cæcus, adulator* Heinr. Cf. Plin. Ep. iv. 22.

‡ *Lævum.* Heinr.

Quidnam igitur censes? conciditur? Absit ab illo
Dedecus hoc, Montanus ait. Testa alta paretur, 131
Quæ tenui muro spatiosum colligat orbem.
Debetur magnus patinæ subitusque Prometheus.
Argillam atque rotam citius properate; sed ex hoc
Tempore jam, Cæsar, figuli tua castra sequantur.
Vicit digna viro sententia. Noverat ille
Luxuriam imperii veterem noctesque Neronis
Jam medias aliamque famem, quum pulmo Falerno
Arderet. Nulli major fuit usus edendi
Tempestate mea. Circeis nata forent, an 140
Lucrinum ad saxum Rutupinove edita fundo
Ostrea, callebat primo deprendere morsu;
Et semel adspecti litus dicebat echini.
Surgitur, et misso proceres exire jubentur
Concilio, quos Albanam dux magnus in arcem
Traxerat adtonitos et festinare coactos,
Tanquam de Cattis aliquid torvisque Sygambriis
Dicturus, tanquam et diversis partibus orbis
Anxia præcipiti venisset epistola pinna.
Atque utinam his potius nugis tota ille* dedisset
Tempora sævitæ, claras quibus abstulit Urbi 151
Illustresque animas impune et vindice nullo!
Sed periit, postquam cerdonibus esse timendus
Cœperat: hoc nocuit Lamiarum cæde madenti.

* *Ille*. Heinr.

SATIRA V.

ARGUMENTUM.

Conditio parasitorum tam misera est et libero homine indigna, ut honestius sit mendicare, quam inopem illorum vitam colere. (1-11). Divites enim patroni, qui pauperes nonnumquam clientes ad cœnam vocant, amplissimum ita illis præmium officiorum persolvere putant; (12-23) neque eadem iis, quæ sibi, sed viliora vina, (24-37) pocula, (38-50) aquam, (51-52) panem, (67-79) pisces et oleum, (80-113) aves et opsonia, (114-124) fungos (146-148) et poma (149-155) apponi atque a vilioribus servis ministrari jubent. (52-66). Præterea pauperibus non licet inter cœnandum libere loqui, neque pocula iis a superbo hospite propinantur. (125-131). Is enim non meritorum ac virtutum, sed opum rationem habet, et eosdem clientes summa complecteretur comitate summoque honore, si forte fortuna repente locupletarentur nullamque liberorum stirpem haberent. (132-145). Divites vero non tam male atque ignominiose accipiunt pauperes, ut parcant sumtui, sed ut eos ludificentur. (156-160). Quicumque igitur, si vel libertinus fuerit, nedum ingenuus, inani honoris specie ac spe bene cœnandi ductus talem contumeliam bis patitur, dignus est, qui longe majori afficiatur. (161-173).

Si te propositi nondum pudet atque eadem est mens,

Ut bona summa putes aliena vivere quadra;

Si potes illa pati, quæ nec Sarmenus iniquas

Cæsaris ad mensas, nec vilis Galba tulisset :
 Quamvis jurato metuum tibi credere testi.
 Ventre nihil novi frugalius. Hoc tamen ipsum
 Defecisse puta, quod inani sufficit alvo :
 Nulla crepido vacat? nusquam pons et tegetis pars
 Dimidia brevior? Tantine injuria cœnæ?
 Tam jejuna fames, quum pol sit honestius, illic* 10
 Et tremere et sordes farris mordere canini?

Primo fige loco, quod tu, discumbere jussus,
 Mercedem solidam veterum capis officiorum.
 Fructus amicitiae magnæ cibus. Imputat hunc rex,
 Et, quamvis rarum, tamen imputat. Ergo duos post
 Si libuit menses neglectum adhibere clientem,
 Tertia ne vacuo cessaret culcita lecto,
 Una simus, ait. Votorum summa! Quid ultra
 Quæris? Habet Trebius, propter quod rumpere
 somnum

Debeat et ligulas dimittere, sollicitus, ne 20
 Tota salutatrix jam turba peregerit orbem,
 Sideribus dubiis, aut illo tempore, quo se
 Frigida circumagunt pigri sarraca Bootæ.
 Qualis coena tamen? Vinum, quod sucida nolit
 Lana pati: de conviva Corybanta videbis.
 Jurgia proludunt; sed mox et pocula torques
 Saucius et rubra deterges vulnera mappa.
 Inter vos quoties libertorumque cohortem
 Pugna Saguntina fervet commissa lagena:
 Ipse capillato diffusum consule potat 30
 Calcatamque tenet bellis socialibus uvam,
 Cardiacò nunquam cyathum missurus amico:
 Cras bibet Albanis aliquid de montibus aut de

* *Tam jejuna fames? cum possis honestius illic
 Heinr et plerique libri.*

Setinis, cujus patriam titulumque senectus
 Delevit multa veteris fuligine testæ;
 Quale coronati Thræsea Helvidiusque bibebant
 Brutorum et Cassi natalibus. Ipse capaces
 Heliadum crustas et inæquales beryllo
 Virro tenet phialas: tibi non committitur aurum;
 Vel, si quando datur, custos affixus ibidem, 40
 Qui numeret gemmas, unguisque observet acutos.
 Da veniam: præclara illic laudatur iaspis.
 Nam Virro, ut multi, gemmas ad pocula transfert
 A digitis, quas in vaginæ fronte solebat
 Ponere zelotypo iuvenis prælatus Iarbæ.
 Tu Beneventani sutoris nomen habentem
 Siccabis calicem nasorum quatuor ac jam
 Quassatum et rupto poscentem sulphura vitro.
 Si stomachus domini fervet vinoque ciboque,
 Frigidior Geticis petitur decocta pruinis. 50

Non eadem vobis poni modo vina querebar:
 Vos aliam potatis aquam. Tibi pocula cursor
 Gætulus dabit ~~ant-~~ nigri manus ossea Mauri
 Et cui per mediam nolis occurrere noctem,
 Clivossæ veheris dum per monumenta Latinsæ.
 Flos Asiæ ante ipsum, pretio majore paratus,
 Quam fuit et Tulli census pugnacis et Anci,
 Et, ne te teneam, Romanorum omnia regum
 Frivola. Quod quum ita sit, tu Gætulum Gany-
 medem

Respice, quum sities. Nescit tot millibus emptus 60
 Pauperibus miscere puer: sed forma, sed ætas
 Digna supercilio. Quando ad te pervenit ille?
 Quando vocatus adest calidæ gelidæque minister?
 Quippe indignatur veteri parere clienti,
 Quodque aliquid poscas et quod se stante recum-
 bas.

Maxima quæque domus servis est plena superbis.

Ecce, alius quanto porrexit murmure panem
 Vix fractum, solidæ jam mucida frusta farinæ,
 Quæ genuinum agitent, non admittentia morsum !
 Sed tener et niveus mollique siligine factus 70
 Servatur domino. Dextram cohibere memento.
 Salva sit artocopi* reverentia. Finge tamen te
 Improbulum, superest illic, qui ponere cogat.
 Vis tu consuetis audax conviva canistris
 Impleri panisque tui novisse colorem ?
 Scilicet hoc fuerat, propter quod sæpe, relictâ
 Coniuge, per montem adversum gelidasque cu-
 curri

Esquillas, fremeret sæva quum grandine vernus
 Jupiter et multo stillaret pænula nimbo !
 Adspice, quam longo distendat pectore lancem, 80
 Quæ fertur domino, squilla, et quibus undique
 septa

Asparagis, qua despiciat convivia canda,
 Quum venit excelsi manibus sublata ministri.
 Sed tibi dimidio constrictus cammarus ovo
 Ponitur exigua, feralis cœna, patella.
 Ipse Venafrano piscem perfundit : at hic, qui
 Pallidus affertur misero tibi canlis, olebit
 Laternam. Illud enim vestris datur alveolis, quod
 Canna Micipsarum prora subvexit acuta ;
 Propter quod Romæ cum Bocchare nemo lavatur,
 Quod tutos etiam facit a serpentibus atris.† 91
 Mullus erit domino,‡ quem misit Corsica vel quem
 Tauromenitanæ rupes, quando omne peractum est

* *Artoptæ*. Rup. et Heinr.

† *Afros*. Rup. Heinr. et alii. *Afris*, nonnulli.

‡ *Domini*. Rup. et Heinr.

Et jam defecit nostrum mare, dum gula sævit,
 Retibus adsiduis penitus scrutante macello
 Proxima, nec patimur* Tyrrhenum crescere pi-
 scem.

Instruit ergo focum provincia: sumitur illinc
 Quod captator emat Lenas, Aurelia vendat.
 Virroni muræna datur, quæ maxima venit
 Gurgite de Siculo: nam, dum se continet Auster,
 Dum sædet et siccat madidas in carcere pennas, 101
 Contemnunt mediam tameraria lina Charybdim.
 Vos anguilla manet longæ cognata colubræ,
 Aut glacie adpersus maculis Tiberinus et ipse
 Vernula riparum, pinguis torrente cloaca,
 Et solitus mediæ cryptam penetrare Suburæ.

Ipsi pauca velim, facilem si præbeat aurem.
 Nemo petit, modicis quæ mittebantur amicis
 A Seneca, quæ Piso bonus, quæ Cotta solebat
 Largiri; namque et titulis et fascibus olim 110
 Major habebatur donandi gloria: solum
 Poscimus, ut cœnes civiliter. Hoc face et esto,
 Esto, ut nunc multi, dives tibi, pauper amicis.

Anseris ante ipsum magni jecur, anseribus par
 Altilis et flavi dignus ferro Meleagri
 Fumat aper: post hunc tradentur tubera, si ver
 Tunc erit et facient optata tonitrua cœnas
 Majores. Tibi habe frumentum, Allidius inquit,
 O Libye; disjunge boves, dum tubera mittas.
 Structorem interea, ne qua indignatio desit, 120
 Saltantem spectest et chironomanta volanti.
 Cultello, donec peragat dictata magistri
 Omnia: nec minimo sane discrimine refert,
 Quo gestu lepores et quo gallina secetur.

* *Patitur.* Heinr. + *Spectas.* Heinr.

Ducoris planta, velut ictus ab Hercule Cacus,
 Et ponere foris, si quid tentaveris unquam
 Hiscere, tanquam habeas tria nomina. Quando
 propinat

Virro tibi sumitque tuis contacta labellis
 Pocula? quis vestrum temerarius usque adeo, quis
 Perditus, ut dicat regi, Bibe? Plurima sunt, quæ
 Non audent homines pertusa dicere læna. 131

Quadringenta tibi si quis Deus aut similis Dis
 Et melior fatis donaret homuncio; quantus
 Ex nihilo fieres, quantus Virronis amicus!

Da Trebio! Pone ad Trebium! Vis, frater, ab ipsis*
 Tibi? O nummi, vobis hunc præstat honorem,
 Vos estis fratres. Dominus tamen et domini rex
 Si vis tu fieri, nullus tibi parvulus aula

7. 14. 5. Luserit Eneas, nec filia dulcior illo:
 Jucundum et carum sterilis facit uxor amicum. 140
 Sed tua nunc Mycale† pariat licet et pueros tres
 In gremium patris fundat simul: ipse loquaci
 Gaudebit nido; viridem thoraca jubebit
 Afferri minimasque nuces assemque rogatum,
 Ad mensam quoties parasitus venerit infans.

Vilibus ancipites fungi ponentur amicis,
 8. 15. 6. Boletus domino; sed qualem‡ Claudius edit
 Ante illum uxoris, post quem nil amplius edit.

Virro sibi et reliquis Virronibus illa jubebit
 Poma dari, quorum solo pascaris odore: 150
 Qualia perpetuus Phæacum auctumnus habebat,
 Credere quæ possis subrepta sororibus Afris:
 Tu scabie frueris mali, quod in aggere rodit,
 Qui tegitur parma et galea metuensque flagelli

* *Istis.* Heinr.

† *Migale.* Heinr.

‡ *Quales.* Rup. et Heinr.

Discit ab hirsuta jaculum torquere capella.

Forsitan impensæ Virronem parcere credas.

Hoc agit, ut doleas : nam quæ comedia, mimus

Quis melior plorante gula ? Ergo omnia fiunt,

Si nescis, ut per lacrimas effundere bilem

Cogaris pressoque diu stridere molari. 160

Tu tibi liber homo et regis conviva videris :

Captum te nidore suæ putat ille oulinæ :

Nec male conjectat. Quis enim tam nudus, ut
illum

Bis ferat, Etruscum puero si contigit aurum

Vel nodus tantum et signum de paupere loro ?

Spes bene cœnandi vos decipit. Ecce dabit jam,

Semesum leporem atque aliquid de clunibus apri :

Ad nos jam veniet minor altilis. Inde parato

Intactoque omnes et stricto pane tacetis.

Ille sapit, qui te sic utitur. Omnia ferre 170

Si potes, et debes. Pulsandum vertice raso

Præbebis quandoque caput, nec dura timebis

Flagra pati, his epulis et tali dignus amico.



D. JUNII JUVENALIS

AQUINATIS

SATIRARUM

LIBER SECUNDUS.

SATIRA VI.

ARGUMENTUM.

Juvenalis primum profletur, se non satis mirari posse dementiam Ursidii Postumi, qui uxorem, eamque castam, circumspeciat, quum et pudicitiae vestigia inde a fine ætatis argenteæ frustra quærantur in toto terrarum orbe, (1-29), et vitam liberam voluptariamque agere, immo mori, multum præstet, quam servile matrimonii jugum ferre, et Postumus ipse notissimus sit mæchorum. (30-47). Deinde amicum ab uxore ducenda dehoratur, eumque in finem vivis coloribus depingit atque ordine recenset omnia mulierum tunc temporis viventium vitia, et quidem 1. impudicitiam et libidinem effrenatam, cujus explendæ causa nobilissimæ etiam matronæ, immo Augustæ, vel cum histrionibus, citharædis ac gladiatoribus concumbant patriumque relinquunt, vel in lupanaribus prostent,

quod Hippiae ac Messalinæ exemplis probatur ; (47-132) 2) insanam ludorum spectandorum cupiditatem, qua captae histrioniam ipsæ faciant ; (67-70) 3) licentiam, quodcumque libeat, vel faciendi vel a marito exigendi, magna dote aut pulcritudine quasi emtam ; (136-160) 4) superbiam, maxime earum, quæ nobilitate generis, castitate, forma, fecunditate aliisque naturæ ac fortunæ dotibus excellent, v. c. Corneliæ matris Gracchorum, Niobes et al. (161-183) 5) affectationem Græcæ linguae ; (184-199) 6) pertinaciam durumque in maritos imperium ; (202-223) 7) divortia crebra, quibus maritos mutant ; (224-230) 8) suspectam fidem aliosque pravae mores, vivente socru, quæ iis imbuat filiam ; (231-241) 9) cupiditatem litium, in quibus ipsæ accusatorum patronorumque partes agant : (242-245) 10) impudentiam, quæ nonnumquam tanta sit, ut ne in gymnasia quidem et arenam descendere vel ad palum exerceri erubescant ; (246-267) 11) studium rixandi cum maritis et die et noctu ; (268-270) 12) fictam tristitiam lacrimasque, quoties jubeant, manantes, quibus maritis exprobrent adulteria, ut sua celent ; (271-278) 13) insignem audaciam, qua deprehensa in stupris se defendant ; (279-285) 14) molliem et luxuriam, fontem reliquorum vitiorum ; (286-300) 15) temulentiam, qua augeatur libido et mulieres sæpe ad omnem turpitudinem, vel ad aram Pudicitiae et in sacris, inpr. Bonæ Deæ, rapiantur ; (300-345) 16) dolum, quo utantur in custodes sibi appositos, quos ipsæ primos ad stupra sollicitent ; (346-351) 17) ambitionem, quæ nullam paupertatis rationem habeat ; (352-365) 18) amorem, quo eunuchos amplectantur, ut indulgeant libidini, nec tamen con-

piant ; (366-378) 19) *studium cantus ac musicæ artis, cui multæ sint deditæ* ; (379-397) 20) *curiositatem credulitatemque* ; (398-412) 21) *iracundiam atque crudelitatem* ; (413-418) 22) *nocturnam lavationem cum multo strepitu et vomitionem ante cœnam, vino largius sumto concitatam* ; (418-433) 23) *affectationem sapientiæ et eruditionis* ; (434-456) 24) *nimum ornatum fastumque intolerabilem divitum feminarum* ; (457-460) 25) *studium moechis non maritis, placendi munditiæ ac nitore, quem pane siligineo, in lac asininum intincto, fucis unguentisque sibi concilient* ; (461-473) 26) *sævitiâ in servos servasque, in quas evomant iram, vel in maritos conceptam, vel eo incensam, quod ars ornatricis dare nequeat, quæ denegaverit natura* ; (474-495) 27) *nimiam decoris quærendi nullamque rei familiaris et impensarum curam* ; (495-511) 28) *stultam cujuscumque generis superstitionem* ; (511-591) 29) *improbritatem nobilium divitumque feminarum, quæ vel partum medicamentis abigant, (592-597), vel adulterinos pariant filios, (597-601), vel denique nothos sive subditivos pro suis ac legitimis alant* ; (602-609) 30) *usum incantationum ac philtorum, quibus nonnumquam maritos ad insaniam agant* ; (133-135, et 610-626) 31) *quæstus cupiditatem, qua incensæ privignos, immo (ut Pontia) suos filios maritosque, veneno vel ferro quoque necare conentur.* (627-661).

CREDO Pudicitiam Saturno rege moratam
 In terris visamque diu, quum frigida parvas
 Præberet spelunca domos ignemque laremque
 Et pecus et dominos communi clauderet umbra ;

Silvestrem montana torum quum sterneret uxor
 Frondibus et culmo vicinarumque ferarum
 Pellibus, haud similis tibi, Cynthia, nec tibi, cujus
 Turbavit nitidos exstinctus passer ocellos,
 Sed potanda ferens infantibus ubera magnis
 Et sæpe horridior glandem ructante marito. 10
 Quippe aliter tunc, orbe novo cosloque recenti,
 Vivebant homines, qui rupto robore nati
 Compositive luto nullos habuere parentes.
 Multa pudicitiae veteris vestigia forsan
 Aut aliqua exstiterint et sub Jove ; sed Jove
 nondum

Barbato, nondum Græcis jurare paratis
 Per caput alterius, quum furem nemo timeret
 Caulibus aut pomis et aperto viveret horto.
 Paulatim deinde ad superos Astræa recessit
 Hac comite, atque duæ pariter fugere sorores. 20
 Antiquum et vetus est alienum, Postume, lectum
 Concutere atque sacri Genium contemnere fulcri.
 Omne aliud crimen mox ferrea protulit ætas :
 Viderunt primos argentea sæcula moechos.

Conventum tamen et pactum et sponsalia nostra
 Tempestate paras, jamque a tonsore magistro
 Pectoris et digito pignus fortasse dedisti.
 Certe sanus eras ! Uxorem, Postume, ducis ?
 Dic, qua Tisiphone, quibus exagitare colubris ?
 Ferre potes dominam, salvis tot restibus, ullam ?
 Quum pateant altæ caligantesque fenestræ ? 31
 Quum tibi vicinum se præbeat Æmilius pons ?
 Aut si de multis nullus placet exitus, illud
 Nonne putas melius, quod tecum pusio dormit ?
 Pusio, qui noctu non litigat, exigit a te
 Nulla jacens illic munuscula, nec queritur, quod
 Et lateri parcas, nec, quantum jussit, anheles ?

Sed placet Ursidio lex Julia : tollere dulcem
Cogitat heredem, cariturus turture magno,
Mullorumque júbis et captatore macello. 40
Quid fieri non posse putes, si jungitur ulla
Ursidio ? si moechorum notissimus olim
Stulta maritali jam porrigit ora capistro,
Quem toties textit perituri cista Latini ?
Quid ? quod et antiquis uxor de moribus illi
Quæritur. O, medici, mediam pertundite venam !
Delicias hominis ! Tarpeium limen adora
Pronus et auratam Junoni cæde juvencam,
Si tibi contigerit capitis matrona pudici.
Paucæ adeo Cereris vittas contingere dignæ, 50
Quarum non timeat pater oscula. Necte coronam
Postibus et densos per limina tende corymbos !
Unus Iberinæ vir sufficit ? Ocius illud
Extorquebis, ut hæc oculo contenta sit uno.

Magna tamen fama est cujusdam rure paterno
Viventis. Vivat Gabiis, ut vixit in agro ;
Vivat Fidenis ! Et agello, cedo, paterno :
Quis tamen affirmat, nil actum in montibus aut in
Speluncis ? Adeo senuerunt Jupiter et Mars ?

Porticibusne tibi monstratur femina voto 60
Digna tuo ? Cuneis an habent spectacula totis,
Quod securus ames quodque inde excerpere
possis ?

Chironomon Ledam molli saltante Bathyllo,
Tuccia vesicæ non imperat ; Appula gannit,
Sicut in amplexu ; subitum et miserabile, longum
Attendit Thymeles ; Thymeles tunc rustica discit.
Ast aliæ, quoties aula recondita cessant
Et vacuo clausoque sonant fora sola theatro
Atque a plebeiis longe Megalesia, tristes
Personam thyrsumque tenent et subligar Acci. 70

Urbicus exodio risum movet Atellanæ
 Gestibus Autonoes : hunc diligit Ælia pauper.
 Solvitur his magno comœdi fibula : sunt quæ
 Chrysogonum cantare vetent : Hispulla tragoedo
 Gaudet. An expectas, ut Quintilianus ametur ?
 Accipis uxorem, de qua citharædus Echion
 Aut Glaphyrus fiat pater Ambrosiusque choraules.
 Longa per angustos figamus pulpita vicos :
 Ornentur postes et grandi janua lauro,
 Ut testudineo tibi, Lentule, conopeo 80
 Nobilis Euryalum mirmillonem exprimat infans.

Nupta Senatori comitata est Hippiâ ludium
 Ad Pharum et Nilum famosaque mœnia Lagi,
 Prodigia et mores Urbis damnante Canopo.
 Immemor illa domus et conjugis atque sororis
 Nil patriæ indulsit, plorantesque improba natos,
 Utque magis stupeas, ludos Paridemque reliquit.
 Sed quamquam in magnis opibus plumaque pa-
 terna

Et segmentatis dormisset parvula cunis,
 Contempsit pelagus : famam contemserat olim, 90
 Cujus apud molles minima est jactura cathedras.
 Tyrrhenos igitur fluctus lateque sonantem
 Pertulit Ionium constanti pectore, quamvis
 Mutandum toties esset mare. Justa pericli
 Si ratio est et honesta, timent pavidoque gelantur
 Pectore, nec tremulis possunt insistere plantis :
 Fortem animum præstant rebus, quas turpiter
 audent.

Si jubeat conjux, durum est conscendere navim ;
 Tunc sentina gravis, tunc summus veritur aer :
 Quæ mœchum sequitur, stomacho valet. Illa
 maritum 100
 Convomit : hæc inter nautas et prandet, et erret.

Per puppem, et duros gaudet tractare rudentes.
 Qua tamen exarsit forma, qua capta juventa est
 Hippiæ? quid vidit, propter quod ludia dici
 Sustinuit? nam Sergiolus jam radere guttur
 Cœperat et secto requiem sperare lacerto.
 Præterea multa in facie deformia, sicut
 Adtritus galea mediisque in naribus ingens
 Gibbus et acre malum semper stillantis ocelli.
 Sed gladiator erat: facit hoc illos Hyacinthos; 110
 Hoc pueris patriæque, hoc prætulit illa sorori
 Atque viro. Ferrum est, quod amant. Hic Sergius
 idem

Accepta rude cœpisset Veiento videri.

Quid privata domus, quid fecerit Hippiæ, curas?
 Respice rivales Divorum; Claudius audi
 Quæ tulerit. Dormire virum quum senserat uxor,
 Ansa Palatino tegetem præferre cubili,
 Sumere nocturnos meretrix Augusta cucullos,
 Linquebat comite ancilla non amplius una;
 Sed, nigrum flavo crinem abscondente galero, 120
 Intravit calidum veteri centone lupanar
 Et cellam vacuum atque suam. Tunc nuda papillis
 Constitit auratis, titulum mentita Lyciscæ,
 Ostenditque tuum, generose Britannice, ventrem.
 Excepit blanda intrantes atque æra poposcit,
 Et resupina jacens multorum absorbit ictus.
 Mox, lenone suas jam dimittente puellas,
 Tristis abit, et, quod potuit, tamen ultima cellam
 Clausit, adhuc ardens rigidæ tentigine vulvæ,
 Et lassata viris, nec dum satiata, recessit, 130
 Obscurisque genis turpis fumoque lucernæ
 Fœda lupanaris tulit ad pulvinar odorem.
 Hippomanes carmenque loquar coctumque ve-
 nenum

Privignoque datum? Faciunt graviora coactæ
Imperio sexus minimumque libidine peccant.

Optima sed quare Cesennia, teste marito?
Bis quingenta dedit; tanti vocat ille pudicam,
Nec Veneris pharetris macer est aut lampade
fervet:

Inde faces ardent; veniunt a dote sagittæ.
Libertas emitur: coram licet innuat atque 140
Rescribat, vidua est, locuples quæ nupsit avaro.

Cur desiderio Bibulæ Sertorius ardet?
Si verum excutias, facies, non uxor amatur.
Tres rugæ subeant, et se cutis arida laxet,
Fiant obscuri dentes oculique minores;
Collige sarcinulas, dicet libertus, et exi:
Jam gravis es nobis et sæpe emungeris; exi
Ocius et propera: sicco venit altera naso.
Interea calet et regnat poscitque maritum
Pastores et ovem Canusinam ulmosque Falernas.
Quantulum in hoc! Pueros omnes, ergastula
tota: 150

Quodque domi non est et habet vicinus ematur.
Mense quidem brumæ, quo* jam mercator Iason
Clausus et armatis obstat casa candida nautis,
Grandia tolluntur crystallina, maxima rursus
Murrhina, deinde adamas notissimus et Beronices
In digito factus pretiosior: hunc dedit olim
Barbarus incestæ, dedit hunc Agrippa sorori,
Observant ubi festa mero pede sabbata reges
Et vetus indulget senibus clementia porcis. 160

Nullane de tantis gregibus tibi digna videtur?
Sit formosa, decens, dives, fecunda, vetustos
Porticibus disponat avos, intactior omni

* *Quum.* Heinr.

Crinibus effusis bellum dirimente Sabina,
 Rara avis in terris nigroque simillima cygno :
 Quis ferat uxorem, cui constant omnia? Malo,
 Malo Venusinam, quam te, *Cornelia mater*
Gracchorum, si cum magnis virtutibus affers
 Grande supercilium et numeras in dote trium-
 phos.

Tolle tuum, precor, Hannibalem victumque
 Syphacem 170

In castris, et cum tota Carthagine migra!

Parce, precor, Pœan, et tu, Dea, pone* sagittas;
 Nil pueri faciunt, ipsam configite matrem!

Amphion clamat: sed Pœan contrahit arcum.

Extulit ergo greges natorum ipsumque parentem,
 Dum sibi nobilior Latonæ gente videtur

Atque eadem scrofa Niobe fecundior alba.

Quæ tanti gravitas, quæ forma, ut se tibi semper
 Imputet? Hujus enim rari summique voluptas

Nulla boni, quoties animo corrupta superbo 180
 Plus aloes, quam mellis habet. Quis deditus
 autem

Usque adeo est, ut non illam, quam laudibus
 effert,

Horreat inque diem septenis oderit horis?

Quædam parva quidem, sed non toleranda ma-
 ritis.

Nam quid rancidius, quam quod se non putat ulla
 Formosam, nisi quæ de Tusca Græcula facta est,

De Sulmonensi mera Cecropis? Omnia Græce,

Quum sit turpe magis nostris nescire Latine.

Hoc sermone pavent, hoc iram, gaudia, curas, 189

Hoc cuncta effundunt animi secreta. Quid ultra?

* *Et tu depone.* Heinr.

Concumbunt Græce. Dones tamen ista puellis:
Tunc etiam, quam sextus et octogesimus annus
Pulsat, adhuc Græce? Non est hic sermo pudicus

In vetula. Quoties lascivum intorvenit illud
Ζωή καὶ ψυχή? Modo sub lodice relictis
Uteris in turba. Quod enim non excitet inguen
Vox blanda et nequam? digitos habet. Ut tamen
omnes

Subsidant pennæ, dicas hæc mollius Hæmo
Quamquam et Carpophoro; facies tua computat
annos.

Si tibi legitimis pactam junctamque tabellis 200
Non es amaturus, ducendi nulla videtur
Causa; nec est, quare cœnam et mustacea perdas,
Labente officio, crudis donanda; nec illud,
Quod prima pro nocte datur, quum lance beata
Dacicus et scripto radiat Germanicus auro.
Si tibi simplicitas uxoriam, deditus uni
Est animus, submitte caput cervice parata
Ferre jugum: nullam invenies, quæ parcat amanti.
Ardeat ipsa licet, tormentis gaudet amanti
Et spoliis. Igitur longe minus utilis illi 210
Uxor, quisquis erit bonus optandusque maritus.
Nil unquam invita donabis conjuge; vendes
Hæc obstante nihil; nihil, hæc si nolet, emetur.
Hæc dabit affectus; ille excludetur* amicus
Jam senior, cujus barbam tua janua vidit.
Testandi quum sit lenonibus atque lanistis
Libertas et juris idem contingat arenæ,
Non unus tibi rivalis dicabitur heres.
Pone crucem servo.—Meruit quo crimine servus

* Excludatur. Heinw.

Supplicium? quistestis adest? quisdetulit? Audi,
Nulla unquam de morte hominis cunctatio longa
est.— 221:

O demens, ita servus homo est? nil fecerit, esto
Hoc volo, sic jubeo, sit pro ratione voluntas.

Imperat ergo viro; sed mox hæc regna relinquit
Permutatque domos et flamma conterit: inde
Advolat* et spreti repetit vestigia lecti.
Ornatas paulo ante fores, pendentia linquit
Vela domus et adhuc virides in limine ramos.
Sic crescit numerus; sic fiunt octo mariti
Quinque per autumnos: titulo res digna sepulcri.

Desperanda tibi salva concordia socru. 231
Illa docet spoliis nudi gaudere mariti;
Illa docet, missis a corruptore tabellis,
Nil rude nec simplex rescribere: decipit illa
Custodes aut ære domat: tunc corpore sano
Advocat Archigenen onerosaque pallia jactat.
Abditus interea latet et securus adulter,
Impatiensque moræ pavet et præputia ducit.
Scilicet exspectas, ut tradat mater honestos
Atque alios mores, quam quos habet! utile porro
Filiolam turpi vetulæ producere turpem. 241

Nulla fere causa est, in qua non femina litem
Moverit. Accusat Manilia, si rea non est.
Componunt ipsæ per se formantque libellos,
Principium atque locos Celso dictare paratæ.

Endromidas Tyrias et femineum ceroma
Quis nescit? vel quis non vidit vulnera pali?
Quem cavat adsiduus sudibus scutoque lacessit,
Atque omnes implet numeros, dignissima pror-

SUS

* *Avolat.* Heinr.

Floralī matrona tuba; nisi si quid in illo 250
 Pectore plus agitāt veræque paratur arenæ.
 Quem præstare potest mulier galeata pudorem,
 Quæ fugit a sexu? Vires amat. Hæc tamen
 ipsa

Vir nollet fieri: nam quantula nostra voluptas!
 Quale decus rerum, si conjugis auctio fiat,
 Balteus et manicæ et cristæ crurisque sinistri
 Dimidium tegmen! vel, si diversa movebit
 Prælia, tu felix, ocreas vendente puella!
 Hæ sunt, quæ tenui sudant in cyclade, quarum
 Delicias et panniculus bombycinus urit. 260
 Adspice, quo fremitu monstratos perferat ictus
 Et quanto galeæ curvetur pondere, quanta
 Poplitibus sedeat, quam denso fascia libro,
 Et ride, scaphium positis quum sumitur armis.
 Dicite vos neptes Lepidi cæcive Metelli,
 Gurgitis aut Fabii, quæ ludia sumserit unquam
 Hos habitus? quando ad palum gemat uxor Asyli?

Semper habet lites alternaque jurgia lectus,
 In quo nupta jacet: minimum dormitur in illo.
 Tunc gravis illa viro, tunc orba tigride pejor. 270
 Quum simulat* gemitus occulti conscia facti,
 Aut odit pueros, aut ficta pellice plorat,
 Uberibus semper lacrumis semperque paratis
 In statione sua atque expectantibus illam,
 Quo jubeat manare modo: tu credis amorem,
 Tu tibi tunc, curruca, places fletumque labellis
 Exsorbes, quæ scripta et quot[†] lecture tabellas,
 Si tibi zelotypæ retegantur scrinia mœchæ!

* *Tum gravis illa viro, tunc orba tigride pejor;*
Tum simulat et cet. Heinr.

† *Quas.* Heinr.

Sed jacet in servi complexibus aut equitis. Dic,
 Dic aliquem, sodes, hic, Quintilliane, colorem. 280
 Hæremus. Dic ipsa. Olim convenerat, inquit,
 Ut faceres tu, quod velles, nec non ego possem
 Indulgere mihi: clames licet et mare cælo
 Confundas, homo sum. Nihil est audacius illis
 Deprensus: iram atque animos a crimine sumunt.
 Unde hæc monstra tamen vel quo de fonte, re-
 quiris?

Præstabat castas humilis fortuna Latinas
 Quondam, nec vitiis contingi parva sinebant
 Tecta labor somnique breves et vellere Tusco
 Vexatæ duræque manus ac proximus Urbi 290
 Hannibal et stantes Collina turre mariti.
 Nunc patimur longæ pacis mala; sævior armis
 Luxuria incubuit victumque ulciscitur orbem.
 Nullum crimen abest facinusque libidinis, ex quo
 Paupertas Romana perit. Hinc fluxit ad istos
 Et Sybaris colles, hinc et Rhodos et Miletos
 Atque coronatum et petulans madidumque Taren-
 tum.

Prima peregrinos obscæna pecunia mores
 Intulit, et turpi fregerunt sæcula luxu
 Divitiæ molles. Quid enim Venus ebria curat?
 Inguinis et capitisquæ sint discrimina, nescit, 301
 Grandia quæ mediis jam noctibus ostrea mordet,
 Quum perfusa mero spumant unguenta Falerno,
 Quum bibitur concha, quum jam vertigine tectum
 Ambulat et geminis exsurgit mensa lucernis.
 I nunc et dubita, qua sorbeat æra sanna
 Tullia, quid dicat notæ collactea Mauræ,
 Maura Pudicitiae veterem quum præterit aram.
 Noctibus hic ponunt lecticas, micturiunt hic
 Effugiemque Deæ longis siphonibus implent, 310

Inque vices equitant ac luna teste moventur.
 Inde domos abeunt : tu calcas luce reversa
 Conjugis urinam magnos visurus amicos.
 Nota Bonæ secreta Deæ, quum tibia lumbos
 Incitat et cornu pariter vinoque feruntur
 Adtonitæ crinemque rotant ululantque Priapi
 Mænades. O quantus tunc illis mentibus ardor
 Concubitus ! quæ vox saltante libidine ! quantus
 Ille meri veteris per crura madentia torrens !
 Lenonum ancillas posita Laufella* corona 320
 Provocat et tollit pendentis præmia coxæ :
 Ipsa Medullinæ fluctum crissantis adorat.
 Palmam inter dominas virtus natalibus æquat.
 Nil ibi per ludum simulabitur : omnia fient
 Ad verum, quibus incendi jam frigidus ævo
 Laomedontiades et Nestoris hernia possit.
 Tunc prurigo moræ impatiens, tunc femina sim-
 plex

Et† toto pariter repetitus clamor ab antro :
 Jam fas est ; admitte viros ! Jam dormit adulter.
 Illa jubet sumto juvenem properare cucullo. 330
 Si nihil est, servis incurritur. Abstuleris spem
 Servorum, veniet‡ conductus aquarius. Hic si
 Quæritur et desunt homines, mora nulla per
 ipsam,

Quo minus imposito clunem submittat asello.
 Atque utinam ritus veteres et publica saltem
 His intacta malis agerentur sacra ! sed omnes
 Noverunt Mauri atque Indi, quæ psaltria penem
 Majorem, quam sunt duo Cæsaris Anticestones,

* *Saufeia.* Rup. et Heinr.

+ *tunc femina simplex.*

It toto pariter Heinr.

‡ *Venit et.* Heinr.

Illuc, testiculi sibi conscius unde fugit mus,
 Intulerit, ubi velari pictura jubetur, 340
 Quaecumque alterius sexus imitata figuram est.
 Et quis tunc hominum contemtor numinis? aut
 quis

Simpuvium ridere Numæ nigrumque catinum
 Et Vaticano fragiles de monte patellas
 Ausus erat? Sed nunc ad quas non Clodius aras?

Audio, quid veteres olim moneatis amici.
 Pone seram, cohibe. Sed quis custodiet ipsos
 Custodes? Cauta est et ab illis incipit uxor.
 Jamque eadem summis pariter minimisque libido:
 Nec melior, silicem pedibus quæ conerit atrum,
 Quam quæ longorum vehitur cervice Syrorum, 351

Ut spectet ludos, conduit Ogulnia vestem,
 Conducit comites, sellam, cervical, amicas,
 Nutricem et flavam, cui det mandata, puellam.
 Hæc tamen argenti superest quodcumque paterni
 Levibus athleticis ac vasa novissima donat.
 Multis res angusta domi: sed nulla pudorem
 Paupertatis habet, nec se metitur ad illum,
 Quem dedit hæc posuitque modum. Tamen
 utile quid sit,

Prospiciunt aliquando viri, frigusque famemque
 Fromica tandem quidam expavere magistra. 361
 Prodigæ non sentit pereuntem femina censem
 Ac,* velut exhausta redidivus pullulet arca
 Nummus et e pleno semper tollatur acervo,
 Non unquam reputat,† quanti sibi gaudia constant.

Sunt quas eunuchi imbelles ac mollia semper
 Oscula delectent et desperatio barbæ,
 Et quod abortivo non est opus. Illa voluptas

* *At.* Heinr.

† *Reputant.* Heinr.

Summa tamen, quod jam calida matura juventa
 Inguina traduntur medicis, jam pectine nigro. 370
 Ergo spectatos ac jussos crescere primum
 Testiculos, postquam cœperunt esse bilibres,
 Tonsoris damno tantum rapit Heliodorus.
 Conspicuus longe cunctisque notabilis intrat
 Balnea, nec dubie custodem vitis et horti
 Provocat, a domina factus spado. Dormiat ille
 Cum domina: sed tu jam durum, Postume, jamque
 Tondendum eunucho Bromium committere noli.

Si gaudet cantu, nullius fibula durat
 Vocem vendentis prætoribus; organa semper 380
 In manibus; densi radiant testudine tota
 Sardonyches; crispo numerantur pectine chordæ,
 Quo tener Hedymeles operam dedit: hunc tenet,
 hoc se

Solatur gratoque indulget basia plectro.
 Quædam de numero Lamiarum ac nominis alti
 Cum farre et vino Janum Vestamque rogabat,
 An Capitolinam deberet Pollio quercum
 Sperare et fidibus promittere. Quid faceret plus
 Ægrotante viro? medicis quid tristibus erga
 Filiolum? Stetit ante aram, nec turpe putavit
 Pro cithara velare caput, dictataque verba 391
 Pertulit, ut mos est, et aperta palluit agna.
 Dic mihi nunc, quæso, dic, antiquissime Divum,
 Respondes his, Jane pater? Magna otia cœli:
 Non est, ut video, non est quod agatur apud vos.
 Hæc de comœdis te consulit; illa tragœdum
 Commendare volet: varicosus fiet haruspex.

Sed cantet potius, quam totam pervolet urbem
 Audax, et cœtus possit quam ferre virorum
 Cumque paludatis ducibus præsentem marito 400
 Ipsa loqui recta facie strictisque mamillis.

Hæc eadem novit, quid toto fiat in orbe;
Quid Seres, quid Thraces agant; secreta novercæ
Et pueri; quis amet, quis diripiatur adulter.
Mense; quibus verbis concumbat quæque, nobis
quot.

Dicet, quis viduam prægnantem fecerit et quo
Instantem regi Armenio Parthoque cometen
Prima videt; famam rumoresque illa recentes
Excipit ad portas; quosdam facit isse Niphatem
In populos magnoque illic cuncta arva teneri 410
Diluvio; nutare urbes, subsidere terras,
Quocumque in trivio, cuicumque est obvia,
narrat.

Nec tamen id vitium magis intolerabile, quam
quæ

Vicinos humiles rapere et concidere loris
Exorata solet. Nam si latratibus alti
Rumpuntur somni; Fustes huc ocius, inquit,
Afferte, atque illis dominum jubet ante feriri,
Deinde canem. Gravis occurru, teterrima vultu*
Balnea nocte subit; conchas et castra moveri
Nocte jubet; magno gaudet sudare tumultu. 420
Quum lassata gravi ceciderunt brachia massa
Callidus et cristæ digitos impressit aliptes
Ac summum dominæ femur exclamare coegit,
(Convivæ miseri interea somnoque fameque
Urgentur) tandem illa venit rubicundula, totum
Enophorum sitiens, plena quod tenditur urna
Admotum pedibus, de quo sextarius alter
Ducitur ante cibum, rabidam facturus orexim,
Dum redit et loto terram ferit intestino.

* *Deinde canem, gravis occurru, teterrima vultu.*
Heinr.

Marmoribus rivi properant, aut lata* Falernum 240
 Pelvis olet: nam sic, tanquam alta in dolia longus
 Deciderit serpens, bibit et vomit. Ergo maritus
 Nauseat atque oculis bilem substringit operis.

Illa tamen gravior, quæ quum discumbere
 cœpit,

Laudat Virgilium, perituræ ignoscit Elissæ,
 Committit vates et comparat; inde Maronem
 Atque alia parte in trutina suspendit Homerum.
 Cedunt grammatici, vincuntur rhetores, omnis
 Turba tacet; nec cœsardicus, nec præco loquatur,
 Altera nec mulier; verborum tanta cadit vis; 440
 Tot pariter pelves, tot tintinnabula dicas
 Pulsari. Jam nemo tubas, nemo æra fatiget;
 Una laboranti poterit succurrere lunæ.

Imponit finem sapiens et rebus honestis.
 Nam quæ docta nimis cupit et facunda videri,
 Crure tenuis medio tunicas succingere debet,
 Cædere Silvano porcum, quadrante lavari.
 Non habeat matrona, tibi quæ juncta recumbit,
 Dicendi genus, aut curtum sermone rotato
 Torqueat enthymema, nec historias sciat omnes:
 Sed quædam ex libris et non intelligat. Odi 451
 Hanc ego, quæ repetit volvitque Palæmonis artem,
 Servata semper lege et ratione loquendi,
 Ignotosque mihi tenet antiquaria versus,
 Nec curanda viris opicæ castigat amicæ
 Verba. Solæcismum liceat fecisse marito.

Nil non permittit mulier sibi, turpe putat nil,
 Quum virides gemmas collo circumdedit et quum
 Auribus extensis magnos commisit elenchos.
 Intolerabilius nihil est, quam femina dives. 460

* Pro "*aut lata*." Heinr. *aurata* legit.

Interea fœda aspectu ridendaque multo
 Pane tumet facies, aut pinguis Poppæana
 Spirat, et hinc miseri viscantur labra mariti.
 Ad mœchum veniet lota cute. Quando videri
 Vult formosa domi? mœchis foliata parantur;
 His emitur, quidquid graciles huc mittitis Indi.
 Tandem aperit vultum et tectoria prima reponit:
 Incipit agnosci, atque illo lacte fovetur,
 Propter quod secum comites educit asellas,
 Exsul Hyperboreum si dimittatur ad axem. 470
 Sed quæ mutatis inducitur atque fovetur
 Tot medicaminibus coctæque siliginis offas
 Accipit et madidæ, facies dicetur, an ulcus?

Est pretium curæ penitus cognoscere, toto
 Quid faciant agitentque die. Si nocte maritus
 Aversus jacuit, periit libraria, ponunt
 Cosmetæ tunicas, tarde venisse Liburnus
 Dicitur et pœnas alieni pendere somni
 Cogitur: hic frangit ferulas, rubet ille flagellis,*
 Hic scutica: sunt quæ tortoribus annua præ-
 stent. 480

Verberat atque obiter faciem linit; audit amicas
 Aut latum pictæ vestis considerat aurum,
 Et cædit; longi relegit transversa diurni,
 Et cædit, donec lassus cædentibus, EXI!
 Intonet horrendum, jam cognitione peracta.

Præfectura domus Sioula non mitior aula.
 Nam si constituit solitoque decentius optat
 Ornari et properat jamque exspectatur in hortis
 Aut apud Islacæ potius sacraria lenæ,
 Disponit crinem laceratis ipsa capillis, 490
 Nuda humero Pæcas infelix undisque mamillis.

* *Flagello.* Heinr.

Altior hio quare cincinnus? Taurea punit
 Continuo flexi crimen facinusque capilli.
 Quid Psecas admisit? quænam est hic culpa
 puellæ,

Si tibi displicuit nasus tuus? Altera lævum
 Extendit pectitque comas et volvit in orbem.
 Est in consilio matrona* admotaque lanis
 Emerita quæ cessat acu: sententia prima
 Hujus erit; post hanc ætate atque arte minores
 Censebunt, tanquam famæ discrimen agatur 500
 Aut animæ: tanta est quærendi cura decoris,
 Totpremit ordinibus, tot adhuc compagibus altum
 Edificat caput. Andromachen a fronte videbis:
 Post minor est: credas aliam. Cedo, si breve parvi
 Sortita est lateris spatium breviorque videtur
 Virgine Pygmæa, nullis adjuncta cothurnis,
 Et levis erecta consurgit ad oscula planta?

Nulla viri cura interea, nec mentio flet
 Damnorum: vivit tanquam vicina marito,
 Hoc solo propior, quod amicos conjugis odit 510
 Et servos, gravis est rationibus. Ecce furentis
 Bellonæ matrisque Deum chorus intrat et ingens
 Semivir, obsceno facies reverenda minori,
 Mollia qui rupta secuit genitalia testa
 Jam pridem, cui rauca cohors, cui tympana cedunt
 Plebeia et Phrygia vestitur bucca tiara.
 Grande sonatmetnique jubet Septembris et Austri
 Adventum, nisi se centum lustraverit ovis
 Et xerampelinas veteres donaverit ipsi,
 Ut, quidquid subiti et magni discriminis instat,
 In tunicas eat et totum semel expiet annum. 521
 Hibernum fracta glacie descendet in amnem,

* *Materna.* Heinr.

Ter matutino Tiberi mergetur, et ipsis
 Vorticibus timidum caput abluet: inde superbi
 Totum regis agrum nuda ac tremebunda cruentis
 Erepet genibus, si candida jusserit lo;
 Ibit ad Ægypti finem calidaque petitas
 A Meroe portabit aquas, ut spargat in ædem
 Isidis, antiquo quæ proxima surgit Ovili.
 Credit enim ipsius dominæ se voce moneri. 530
 (En animam et mentem, cum qua Di nocte
 loquantur!)

Ergo hic præcipuum summumque meretur honorem,

Qui, grege linigero circumdatus et grege calvo.
 Plangentis populi currit derisor Anubis.
 Ille petit veniam, quoties non abstinet uxor
 Concubitu sacris observandisque diebus,
 Magnaque debetur violato pœna cadurco,
 Et movisse caput visa est argentea serpens.
 Illius lacrumæ meditataque murmura præstant,
 Ut veniam culpæ non abnuat ansere magno 540
 Scilicet et tenui popano corruptus Osiris.

Quum dedit ille locum; cophino fœnoque relicto,
 Arcanam Judæa tremens mendicat in aurem,
 Interpres legum Solymarum et magna sacerdos
 Arboris ac summi fide* internuntia cœli;
 Implet et illa manum, sed parcius: ære minuto,
 Quali acumque voles, Judæi somnia vendunt.
 Spondet amatorem tenerum vel divitis orbi
 Testamentum ingens, calidæ pulmone columbæ
 Tractato, Armenius vel Commagenus haruspex;
 Pectora pullorum rimatur et† exta catelli, 551

* *Fida.* Rup. et Heinr.

† *Rimabitur, exta catelli,* Heinr.

Interdum ut pueri : faciet, quod deferat ipse.

Chaldæis sed major erit fiducia : quidquid
 Dixert Astrologus, credent a fonte relatum
 Hammonis ; quoniam Delphis oracula cessant
 Et genus humanum damnat caligo futuri.
 Præcipuus tamen est horum, qui sæpius exsul,
 Cujus amicitia conducendaque tabella
 Magnus civis obit et formidatus Othoni.
 Inde fides arti ; sonuit si dextera ferro 560
 Lævaque, si longo castrorum in carcere mansit.
 Nemo mathematicus genium indemnatus habebit;
 Sed qui pæne perit, cui vix in Cyclada mitti
 Contigit et parva tandem caruisse Seripho.
 Consulit ictericæ lento de funere matris,
 Ante tamen de te, Tanaquil tua : quando sororem
 Efferat et patruos ; an sit victurus adulter
 Post ipsam : quid enim majus dare numina pos-
 sunt?

Hæc tamen ignorat, quid sidus triste minetur
 Saturni, quo læta Venus se proferat astro, 570
 Qui mensis damnis, quæ dentur tempora lucro.
 Illius ocurso etiam vitare memento,
 In cujus manibus, ceu pinguis succina, tritas
 Cernis ephemeridas ; quæ nullum consulit et jam
 Consulitur : quæ castra viro patriamque petente
 Non ibit pariter, numeris revocata Thrasylli.
 Ad primum lapidem vectari quum placet, hora
 Sumitur ex libro : si prurit frictus ocelli
 Angulus, inspecta genesi collyria poscit.
 Egra licet jaceat, capiendo nulla videtur 580
 Aptior hora cibo, nisi quam dederit Petosiris.

Si mediocris erit ; spatium lustrabit utrimque

* *Artis*, Heiur.

Metarum et sortes ducet frontemque manumque
 Præbebit vati crebrum poppysma roganti.
 Divitibus responsa dabunt Phryx augur et Indus
 Conductus, dabit astrorum mundique peritus
 Atque aliquis senior, qui publica fulgura condit:
 Plebeium in circo positum est et in aggere fatum.
 Quæ nudis longum ostendit cervicibus aurum,
 Consulit ante phalas delphinorumque columnas,
 An saga vendenti nubat, caupone relicto. 591

Hæ tamen et partus subeunt discrimen et omnes
 Nutricis tolerant fortuna urgente labores;
 Sed jacet aurato vix ulla puerpera lecto.
 Tantum artes hujus, tantum medicamina possunt,
 Quæ steriles facit atque homines in ventre ne-
 candos

Conducit. Gaude, infelix, atque ipse bibendum
 Porrige, quidquid erit: nam si distendere vellet
 Et vexare uterum pueris salientibus, esses
 Æthiopis fortasse pater; mox decolor heres 600
 Impleret tabulas, nunquam tibi mane videndus.

Transeo suppositos et gaudia votaue sæpe
 Ad spurcos decepta lacus atque inde petitos
 Pontifices, Salios, Scaurorum nomina falso
 Corpore laturus. Stat Fortuna improba noctu
 Arridens nudis infantibus. Hos fovet omnes
 Involvitque sinu: domibus tunc porrigit altis
 Secretumque sibi mimum parat. Hos amat, his se
 Ingerit utque suos ridens producit alumnos.

Hic magicos affert cantus, hic Thessala vendit
 Philtra, quibus valeat* mentem vexare mariti 611
 Et solea pulsare nates. Quod desipis, inde est;
 Inde animi caligo et magna oblivio rerum,

* *Valeant.* Heinr.

Quas modo gessisti. Tamen hoc tolerabile, si non
 Et furere incipias, ut avunculus ille Neronis,
 Cui totam tremuli frontem Cæsonia pulli
 Infudit. Quæ non faciet quod Principis uxor?
 Ardebant cuncta et fracta compage ruebant,
 Non aliter, quam si fecisset Juno maritum
 Insanum. Minus ergo nocens erit Agrippinæ
 Boletus: siquidem unius præcordia pressit 621
 Ille senis tremulumque caput descendere jussit
 In cælum et longam* manantia labra salivam.†
 Hæc poscit ferrum atque ignes, hæc potio torquet,
 Hæc lacerat mixtos Equitum cum sanguine
 Patres.

Tanti partus equæ, tanti una venefica constat!

Oderunt natos de pellice; nemo repugnet,
 Nemo vetet; jam jam privignum occidere fas est.
 Vos ego, pupilli, moneo, quibus amplior est res,
 Custodite animas et nulli credite mensæ: 630
 Livida materno fervent adipata veneno.
 Mordeat ante aliquis quidquid porrexerit illa,
 Quæ peperit: timidus prægustet pocula pappas.
 Fingimus hæc, altum Satira sumente cothurnum,
 Scilicet, et finem egressi legemque priorum
 Grande Sophocleo carmen hæcchamur hiatu,
 Montibus ignotum Rutulis cœloque Latino!
 Nos utinam vani! sed clamat Pontia, Feci,
 Confiteor, puerisque meis aconita paravi, 640
 Quæ deprensa patent; facinus tamen ipsa peregi.
 Tune duos una, sævissima vipera, cœna?
 Tune duos? Septem, si septem forte fuissent.
 Credamus tragicis, quidquid de Colchide torrat

* *Longa.* Heinr. † *Saliva.* Heinr. ‡ *Sæva*
 Rup. et Heinr.

Dicitur et Proene : nil contra conor : et illæ
 Grandia monstra suis audebant temporibus ; sed
 Non propter numos. Minor admiratio summis
 Debetur monstis, quoties facit ira nocentem
 Hunc sexum, et* rabie jecur incedente feruntur
 Præcipites ; ut saxa jugis abrupta, quibus mons
 Subtrahitur clivoque latus pendente recedit. 650

Illam ego non tulerim, quæ computat et scelus
 ingens

Sana facit. Spectant subeuntem fata mariti
 Alcestim et, similis si permutatio detur,
 Morte viri cupiant animam servare catellæ.
 Occurrent multæ tibi Belides atque Eriphylæ
 Mane : Clytæmnestram nullus non vicus habebit.
 Hoc tantum refert, quod Tyndaris illa bipennem
 Insulsam et fatuam dextra lævaque tenebat :
 At nunc res agitur tenui pulmone rubetæ :
 Sed tamen et ferro, si prægustabit Atrides 660
 Pontica ter victi cautus medicamina Regis.

* *Hunc sexum : rabie jecur incedente, feruntur*
 Heinr.

D. JUNII JUVENALIS

AQUINATIS

SATIRARUM

LIBER TERTIUS.

SATIRA VII.

ARGUMENTUM.

*Artes et studia foveantur tantum a Cæsare, a reliquis vero proceribus ita contemnuntur, ut jam doctissimi celeberrimique viri ad vilia quæque ministeria paupertate adigantur. (1-29). Nobiles enim divitesque Romani poetas admirantur tantum ac laudant, vel carmen sibi oblatum carmine re-
pendunt et ruinosas quidem recitantibus ædes, non vero subsellia quoque aliasque impensas sup-
peditant. (30-47). Nihilo secius multi ad versus faciendos gloriæ cupiditate impelluntur, quum tamen mens, nisi expers sit curarum, non facile numine quasi afflari sensusque excelsiores concipere, neque præstantissimi poetæ, si desint Mæcenates, vitam sustentare possint. (48-97). Non fructuosior nunc est labor historicorum, etei plus temporis, olei ac chartæ poscat. (98-105). Neque*

majora ex ingenti vocis laterumque contentione præmia ac comoda redundant in causidicos, patronos causarum et jureconsultos, qui præterea, ut plebem, hominum ingenia ex cultu et magnificentia æstimantem, alliciant, se divites esse simulant ac nobiles, et ita ære alieno obruuntur. (106-149) Omnium tamen ingratus est labor et merces vilissima rhetorum atque grammaticorum. Illi enim continuis puerorum eadem recinentium declamationibus excarnificantur et, si pueri jvenesque obtusi ingenii nihil in literis proficiunt, soli in culpa esse dicuntur, nec, ut olim præceptores, a discipulis coli atque amari, sed derideri vel adeo cædi solent, a parentibus vero, qui magnam vulgo in ædificia et epulas impensam et nullam fere in educationem institutionemque liberorum faciunt, exiguum laboris molestissimi mercedem capiunt: unde perrarum est locupletis rhetoris, qualis Quintilianus fuit, exemplum. (150-214). Hivero, grammatici, a quibus non multiplex tantum et perfecta eruditio, sed summa quoque discipulorum cura exigitur, non tantum nihilo plus præmii ferunt, sed etiam parte mercedulæ fraudantur eamque vix sine lite obtinent. (215-243).

ET spes et ratio studiorum in Cæsare tantum :
 Solus enim tristes hac tempestate Camenas
 Respexit, quum jam celebres notique poetæ
 Balneolum Gabiis, Romæ conducere furnos
 Tentarent, nec fœdum alii, nec turpe putarent
 Præcones fieri ; quum, desertis Aganippes
 Vallibus, esuriens migraret in atria Clio.

Nam si Pieria quadrans tibi nullus in umbra
 Ostendatur, ames nomen victumque Machærus
 Et vendas potius, commissa quod auctio vendit 10
 Stantibus, ænophorum, tripodas,* armaria, cistas,
 Alcithoen Pacci, Thebas et Terea Fausti.
 Hoc satius, quam si dicas sub iudice, Vidi,
 Quod non vidisti. Faciant equites Asiani,
 (Quamquam et Cappadoces faciant equitesque
 Bithyni,) *probat. in d. i. i. i. i.*
 Altera quos nudo traduciſ Gallia talo.
 Nemo tamen studiis indignum ferre laborem
 Cogetur posthac, nectit quicumque canoris
 Eloquentium vocale modis laurumque momordit.
 Hoc agite, o juvenes: circumspectit et stimulat
 vos 20

Materiamque sibi Ducis indulgentia quærit.
 Si qua aliunde putas rerum expectanda tuarum
 Præsidia, atque ideo crocæ membra tabellæ
 Impletur; lignorum aliquid posce ocius et, quæ
 Componis, dona Veneris, Thelesine, marito,
 Aut claude et positos tineæ pertunde libellos.
 Fruge miser calamos vigilataque proelia dele,
 Qui facis in parva sublimia carmina cella,
 Ut dignus venias hederis et imagine macra.
 Spes nulla ulterior: didicit jam dives avarus 30
 Tantum admirari, tantum laudare disertos,
 Ut pueri Junonis avem. Sed defuit ætas
 Et pelagi patiens et cassidis atque ligonis.
 Tædia tunc subeunt animos, tunc seque suamque
 Terpsichoren odit facunda et nuda senectus.

Accipe nunc artes, ne quid tibi conferat iste,
 Quem colis, et Musarum et Appollinis æderelecta.

f. 3. d. i. i. i. i. i.
 * Tripodes. Heintz.
 F 3

Ipse facit versus atque uni cedit Homero
 Propter mille annos; et, si dulcedine famæ
 Succensus recites, maculosas commodat ædes; 40
 Hæc longe ferrata domus servire jubetur,
 In qua sollicitas imitatur janua portas.
 Scit dare libertos extrema in parte sedentes
 Ordinis et magnas comitum disponere voces.
 Nemo dabit regum, quanti subsellia constant
 Et quæ conducto pendent anabathra tigillo
 Quæquereportandis posita est orchestra cathedris.
 Nos tamen hoc agimus tenuique in pulvere sulcos
 Ducimus et litus sterili versamus aratro.
 Nam si discedas, laqueo tenet ambitiosi 50
 Consuetudo mali; tenet insanabile multos
 Scribendi cacoethes et ægro in corde senescit.
 Sed vatem egregium, cui non sit publica vena,
 Qui nihil expositum soleat deducere, nec qui
 Communi feriat carmen triviale moneta, 55
 Hunc, qualem nequeo monstrare et sentio tantum,
 Anxietate carens animus facit, omnis acerbi
 Impatiens, cupidus silvarum aptusque bibendis
 Fontibus Aonidum. Neque enim cantare sub
 antro
 Pierio thyrsumve potest contingere sana* 60
 Paupertas atque æris inops, quo nocte dieque
 Corpus eget: satur est, quum dicit Horatius,
 Evoc!
 Quis locus ingenio, nisi quum se carmine solo
 Vexant et dominis Cirrhæ Nysæque feruntur
 Pectora nostra,† duas non admittentia curas?
 Magnæ mentis opus nec de lodice paranda
 Adtonitæ, currus et equos faciesque Deorum

* *Moesta.* Heinr.† *Vestra.* Heinr.

Adspicere, et qualis Rutulum confundat Erinys.
 Nam si Virgilio puer et tolerabile deesset
 Hospitium, caderent omnes a crinibus hydri: 70
 Surda nihil gemeret grave buccina. Poscimus,
 ut sit

Non minor antiquo Rubrenus Lappa cothurno,
 Cujus et alveolos et lænam pignerat Atreus.
 Non habet infelix Numitor, quod mittat amico:
 Quintillæ quod donet, habet; nec defuit illi,
 Unde emeret multa pascendum carne leonem
 Jam domitum: constat leviori bellus sumtu
 Nimirum, et capiunt plus intestina poetæ.
 Contentus fama jaceat Lucanus in hortis
 Marmoreis: at Serrano tenuique Saleio 80
 Gloria quantalibet quid erit, si gloria tantum est?
 Curritur ad vocem jucundam et carmen amicæ
 Thebaidos, lætam fecit quum Statius Urbem
 Promisitque diem. Tanta dulcedine captos
 Afficit ille animos, tantaque libidine vulgi
 Auditur; sed, quum fregit subsellia versu,
 Esurit, intactam Paridi nisi vendat Agaven.
 Ille et militiæ multis largitur honorem,
 Semestri vatū digitos circumligat auro.
 Quod non dant procures, dabit histrio: tu Came-
 rinos

Et Bareas, tu nobilium magna atria curas? 90
 Præfectos Pelopea facit, Philomela tribunos.
 Haud tamen invidas vati, quem pulpita pascunt.
 Quis tibi Mæcenæ? quis nunc erit aut Procu-
 leius,
 Aut Fabius? quis Cotta iterum? quis Lentulus
 alter?

Tunc par ingenio pretium; tunc utile multis,
 Pallere et vinum toto nescire Decembri.

Vester porro labor fecundior, historiarum
 Scriptores? petit hic plus temporis atque olei plus;
 Namque oblita modi millesima pagina surgit 100
 Omnibus et multa crescit damnosa papyro.
 Sic ingens rerum numerus jubet atque operum lex.
 Quæ tamen inde seges? terræ quis fructus apertæ?
 Quis dabit historico, quantum daret acta legenti?
 Sed genus ignavum, quod lecto gaudet et umbra!

Dic igitur, quid causicidicis civilia præsent
 Officia et magno comites in fasce libelli?
 Ipsi magna sonant, sed tunc, quum creditor audit,
 Præcipue, vel si tetigit latus acrior illo,
 Qui venit ad dubium grandi cum codice nomen.
 Tunc immensa cavi spirant mendacia folles 111
 Conspuiturquesinus. Veram deprendere messem
 Si libet; hinc centum patrimonia causicidorum,
 Parte alia solum russati pone Lacernæ. *Heinr. Salt* 1
 Consedere Duces: surgis tu pallidus Ajax
 Dicturus dubia pro libertate, bubulco
 Judice. Rumpe miser tensum jecur, ut tibi lasso
 Figantur virides, scalarum gloria, palmæ.
 Quod vocis pretium? siccus petasunculus et vas
 Pelamydum, aut veteres, Afrorum epimenia,
 bulbi, 120

Aut vinum Tiberi devectum, quinque lagenæ.

Si quater egisti, si contigit aureus unus,*
 Inde cadunt partes, ex fœdere, pragmaticorum.
 Æmilio dabitur, quantum licet,† et melius nos
 Egimus: hujus enim stat currus æneus, alti
 Quadrijuges in vestibulis, atque ipse feroci
 Bellatore sedens curvatum hastile minatur

* *Quinque lagenæ, Si quater egisti. Si con. a. u.*
Heinr.

† *Petet. Heinr.*

Eminus et statua meditatur proelia lusca.
 Sic Peto conturbat, Matho deficit: exitus hic est
 Tongilli, magno cum rhinocerote lavari 130
 Qui solet et vexat lutulenta balnea turba,
 Perque forum juvenes longo premit assere Medos,
 Emturus pueros, argentum, murrhina, villas:
 Spondet enim Tyrio stlataria purpura filo.
 Et tamen est illis hoc utile: purpura vendit
 Causidicum, vendunt amethystina: convenit illis
 Et strepitu et facie majoris vivere census.
 Sed finem impensæ non servat prodiga Roma.
 Fidimus eloquio? Ciceroni nemo ducentos
 Nunc dederit numos, nisi fulserit annulus ingens.
 Respicit hæc primum, qui litigat, an tibi servi 141
 Octo, decem comites, an post te sella, togati
 Ante pedes. Ideo conducta Paulus agebat
 Sardonyche, atque ideo pluri, quam Cossus agebat,
 Quam Basilus. Rara in tenui facundia panno.
 Quando licet Basilo fientem producere matrem?
 Quis bene dicentem Basilum ferat? Accipiat te
 Gallia vel potius nutricula causidicorum
 Africa, si placuit mercedem ponere* linguae.
 Declamare doces? O ferrea pectora Vetti, 150
 Quum perimit sævos classis numerosa tyrannos!
 Nam quæcunque sedens modo legerat, hæc eadem
 stans
 Proferet† atque eadem cantabit versibus isdem.
 Occidit miseros crambe repetita magistros.
 Quis color et quod sit causæ genus atque ubi
 summa
 Quæstio, quæ veniant diversa parte† sagittæ,

* *Imponere.* Heinr. † *Perferet.* Heinr.

‡ *Diversæ forte.* Rup.

Nosse velint omnes, mercedem solvere nemo.

Mercedem appellas? quid enim scio? Culpa do-
centis

Scilicet arguitur, quod læva in parte mamillæ

Nil salit Arcadio juveni, cujus mihi sexta 160

Quaque diem miserum dirus caput Hannibal implet;

Quidquid id est, de quo deliberat, an petat Urbem

A Cannis, an post nimbos et fulmina cautus

Circumagat madidas a tempestate cohortes.

Quantum vis stipulare, et protenus accipe quod do,

Ut toties illum pater audiat. Hæc alii sex

Vel plures uno conclamant ore Sophistæ,

Et veras agitant lites, raptore relicto;

Fusa venena silent, malus ingratusque maritus,

Et quæ jam veteres sanant mortaria cæcos. 170

Ergo sibi dabit ipse rudem, si nostra movebunt

Consilia, et vitæ diversum iter ingreditur,

Ad pugnam qui rhetorica descendit ab umbra,

Summula ne pereat, qua vilis tessera venit

Frumenti: quippe hæc merces lautissima. Tenta,

Chrysogonus quanti doceat, vel Pollio quanti

Lautorum pueros, artem scindens Theodori.

Balnea sexcentis et pluris porticus, in qua

Gestetur dominus, quoties pluit Anne serenum

Expectet spargatque luto jumenta recenti? 180

Hic potius: namque hic mundæ nitet ungula
mulæ.

Parte alia longis Numidarum fulta columnis

Surgat et argentem rapiat cœnatio solem.

Quanticumque domus, veniet qui fercula docte

Componat; veniet qui pulmentaria condat.

Hos inter sumtus sestertia Quintiliano,

Ut multum, duo sufficient. Res nulla minoris

Constabit patri, quam filius. Unde igitur tot

Quintilianus habet saltus ? Exempla novorum
 Fatorum transi. Felix et pulcer et acer; 190
 Felix et sapiens et nobilis et generosus,
 Appositam nigræ lunam subtextit alutæ;
 Felix orator quoque maximus et jaculator:
 Et si perfrixit, cantat bene. Distat enim, quæ
 Sidera te excipiant modo primos incipientem
 Edere vagitus et adhuc a matre rubentem.
 Si Fortuna volet, fies de rhetore Consul:
 Si volet hæc eadem, fies de Consule rhetor.
 Ventidius quid enim ? quid Tullius ? anne aliud,
 quam
 Sidus et occulti miranda potentia fati ? 200
 Servis regna dabunt, captivis Fata triumphos.
 Felix ille tamen corvo quoque rarior albo.
 Poenituit multos vanæ sterilisque cathedræ,
 Sicut Thrasy Machi probat exitus atque Secundi
 Carrinatis : et hunc inopem vidistis, Athenæ,
 Nil præter gelidas aursæ conferre cicutas.
 Di, majorum umbris tenuem et sine pondere
 terram
 Spirantesque crocos et in urna perpetuum ver,
 Qui præceptorem sancti voluere parentis
 Esse loco ! Metuens virgæ jam grandis Achilles
 Cantabat patriis in montibus : etcui non tunc 211
 Eliceret risum citharædi cauda magistri ?
 Sed Rufum atque alios cædit sua quæque*
 juvenus,
 Rufum, qui toties Ciceronem Allobroga dixit.
 Quis gremio Enceladi doctique Palæmonis affert
 Quantum grammaticus meruit labor ? et tamen
 ex hoc

* Quemque. Heiur.

Quodcumque est (minus est autem, quam rhetoris
sra)

Discipuli custos præmordet Acoënonetus
Et, qui dispensat, frangit sibi. Cede, Palæmon,
Et patere inde aliquid decrescere, non aliter,
quam 220

Institor hibernæ tegetis niveique cadurci :
Dummodo non pereat, mediæ quod noctis ab hora
Sedisti, qua nemo faber, qua nemo sederet,
Qui docet obliquo lanam deducere ferro ;
Dummodo non pereat totidem olfecisse lucernas,
Quot stabant pueri, quum totus decolor esset
Flaccus et hæreret nigro fuligo Maroni.
Rara tamen merces, quæ cognitione tribuni
Non egeat. Sed vos sævas imponite leges,
Ut præceptori verborum regula constet, 230
Ut legat historias, auctores noverit omnes,
Tanquam ungues digitosque suos ; ut forte ro-
gatus,

Dum petit aut thermas aut Phœbi balnea, dicat
Nutricem Anchisæ, nomen patriamque novercæ
Anchemoli ; * dicat, quot Acestes vixerit annos,
Quot Siculus Phrygibus vini donaverit urnas.
Exigite, ut mores teneros ceu pollice ducat,
Ut si quis cera vultum facit : exigite, ut sit
Et pater ipsius cœtus, ne turpia ludant,
Ne faciant vicibus. Non est leve tot puerorum 240
Observare manus oculosque in fine trementes.
Hæc, inquit, cures et, quum se veterit annus,
Accipe, victori populus quod postulat, aurum.

* *Archemori*, al.

SATIRA VIII.

ARGUMENTUM.

Quid refert, nobilem esse et originem a summis ducere viris, si male vivitur noctisque tempus extrahitur alea et epulis? (1-12). Quo jure majorum gloria insolentius se jactat, qui avaritia et mollitie labem ei adspersit? (13-18). Sola nobilitas est virtus; et qui animi bonis morumque probitate excellit, vir patriæ utilis, is profecto, quodcumque illi sit nomen ac genus, dignus est, qui in nobilium referatur numerum et de quo, tamquam raro cive, rei publicæ gratulemur. (19-30). Qui vero præter titulos nihil habet, quo gloriari possit, non re vera generosus est, quamvis speciosum ferat nomen, quod turpidus quoque rebus eoque indignis per ludum nonnumquam et jocum damus. (30-38). Nemopotius stolidior eo, qui, quum nihil ipse præclari fecerit, cur vere nobilis sit censendus, natalium splendore inflatur hominesque obscuro loco campano supercilio despicit. (39-46). Horum enim multi sunt utilissimi rei publicæ cives, qui vel de jure respondent ipsasque indocti nobilis causas agunt, vel operam in re militari præstant: at ille, qua est ignavia et stupiditate, a trunco seu statua non differt, nisi quod vivit et spirat. (46-55). In brutis quoque animalibus non genus spectatur, sed virtus, et generosus appellatur equus, qui alios cursu superat; qui vero degener est et ignavus, vili pretio redactis venditur aut molitoribus. (56-67). Quodsi igitur admiratione et laude nostra dignus videri cupis, operam da, ut ipse egregia eam facinoribus

merearis, neque omnia debeas majoribus, vel totus ex eorum gloria pendeas, similis tecto, quod subductis columnis corrui, vel viti, quæ, nisi ulmo alligatur, humi jacet et marcescit. (68-78). Esto bonus miles, tutor, iudex; et, si vel tyrannus tormentorum metu falsum tibi testimonium extorquere conabitur, cave ne vitam præferas virtuti bonæque conscientiæ quibus amissis ne dignus quidem es, qui vivas. (79-86). Provinciam si aliquando obtinueris, cogita, quæso, quæ præmia te maneant, si bene, quæ pænæ, si male eam administraveris, neque avaros imitare præsides, qui provincialibus olim omne, quo abundabant, aurum, argentum, ebur et marmor per vim eripuerunt et nunc ne viliores quidem res atque ad vitam sustentandam necessarias iis relinquunt. (87-112). Impune quidem diripies imbelles et luxu effeminatas gentes; sed cave saltem, ne magnam bellicosam injuriam facias, quibus auro argentoque spoliatis arma certe supersunt. (112-126). Si neque tu ipse neque uxor et comites tui quidquam rapiunt vel pecunia corrumpuntur, facile patiar, te originem tuam, a quocumque velis, repetere: si vero libidinose socios et crudeliter tractas, eo notiora omnibus et manifestiora sunt flagitia tua, quo illustriore loco natus es. (127-141). Quare vero nobilitatem tuam prædicas, si sceleribus eam polluis? (142-145). Lateranus, quum consul esset, noctu et summo magistratu deposito medio die aurigabat frequentabatque popinas ubi ab unguentariis, cauponibus et scortis blande excipiebatur, versabaturque cum sicariis, nautis, latronibus, carnificibus et fabris: quæ flagitia pueris et adolescentibus condonanda sunt, non viris, nedum summo loco natis; qui tamen id sibi licere

putant, vel adeo laudi ducunt, quod in vilissimæ conditionis hominibus damnant pœnaque dignum censent. (145-182). Turpiora etiam his committunt nobiles et, consumtis per luxum opibus, alii operam scenæ addicunt mimorumque agunt partes, alii ad ipsas gladiatorum artes descendunt, et nunc quidem sponte, non, ut olim, coacti a Nerone, citharædo. (183-199). Quin eo impudentiæ progrediuntur, ut in arena ab omnibus cognosci cupiant et hinc Retiarii esse velint, qui soli ex gladiatoribus nudo vultu pugnant. (200-210). Vera nobilitas a virtute, non a titulis et generosa stirpe pendet, nec quisquam dubitabit, Senecam, virum ignobilem, sed bonum, præferre Neroni Imperatori, qui matrem, uxores, sororem, fratrem aliosque propinquos occidit, in theatris cantavit et Troica scripsit. (211-230). Catilina et Cethegus nobilissimi fuere viri, sed patriæ perdendæ consilium inierunt, quam interitu vindicavit Cicero consul, novus homo, qui pacis artibus plus gloriæ, quam Octavius victoria Actiaca et Philippica, adeptus est primusque decreto Senatus Partis patriæ cognomen accepit. (231-244). Marius, alius Arpinus, qui mercenarius olim arator alieni agri et miles gregarius fuit, vicit Cimbro præsensque a re publica periculum propulsavit, adjuvante quidem Catulo, viro nobilissimo, qui tamen non triumphasset, nisi ignobilis collega, duobus sibi oblatiis triumphis, uno contentus fuisset. (245-253). Decii, plebeiis et humili familia geniti homines, pro patria se devoverunt, et hæc piacula, propter personarum dignitatem, averruncandæ Deorum iræ suffecere. (254-258). Servius, captivus natus, regnum adeptus est et donorum regum ultimus fuit. (259-260). Filii contra Bruti, primi consules, cum

*aliis adolescentibus nobilibus de patria ejectis re-
gibus prodenda conjuraverunt, et servus rem ad
Patres detulit. (261-268). Præstat itaque humili
loco natum esse et virtutibus excellere, quam ma-
jorum gloriam vitiis flagitiisque contaminare.
(269-271). Quicumque vero vel antiquissima stirpe
orti sunt, ab ignobilibus certe aut sceleratis adeo
hominibus genus ducunt. (272-275).*

STEMMATA quid faciunt? quid prodest, Pontice,
longo

Sanguine censerī pictosque ostendere vultus
Majorum et stantes in curribus Æmilianos
Et Curios jam dimidios humerosque minorem
Corvinum et Galbam auriculis nasoque carentem?
Quis fructus, generis tabula jactare capaci
Corvinum, posthac multa contingere virga
Fumosos Equitum cum Dicatore magistros,
Si coram Lepidis male vivitur? Effigies quo
Tot bellatorum, si luditur alea pernox 10
Ante Numantinos? si dormire incipis ortu
Luciferi, quo signa duces et castra movebant?
Cur Allobrogicis et magna gaudeat ara
Natus in Herculeo Fabius lare, si cupidus, si
Vanus et Euganea quantumvis mollior agna;
Si tenerum adtritum Catinensi pumice lumbum
Squalentes traducit avos emtorque veneni
Frangenda miseram funestat imagine gentem?
Tota licet veteres exornent undique ceræ
Atria, nobilitas sola est atque unica virtus. 20
Paulus vel Cossus vel Drusus moribus esto;
Hos ante effigies majorum pone tuorum;

Præcedant ipsas illi te Consule virgas.
 Prima mihi debes animi bona. Sanctus haberi
 Justitiæque tenax factis dictisque mereris,
 Agnosco procerem. Salve, Gætulice, seu tu
 Silanus, quocumque alio de sanguine, rarus
 Civis et egregius patriæ contingis ovanti.
 Exclamare libet, populus quod clamat, Osiri
 Invento. Quis enim generosum dixerit hunc,
 qui 30

Indignus genere et præclaro nomine tantum
 Insignis? Nanum cujusdam Atlanta vocamus,
 Æthiopem cynum, pravam extortamque puellam
 Europen: canibus pigris scabieque vetusta
 Levibus et siccæ lambentibus ora lucernæ
 Nomen erit pardus, tigris, leo, si quid adhuc est,
 Quod fremat in terris violentius. Ergo cavebis
 Et metues, ne tu sis Creticus aut Camerinus.

His ego quem monui? tecum est mihi sermo,
 Rubelli

Blande.* Tumes alto Drusorum stemmate, tan-
 quam 40

Feceris ipse aliquid, propter quod nobilis esses,
 Ut te conciperet quæ sanguine fulget Iuli,
 Non quæ ventoso conducta sub aggere textit.
 Vos humiles, inquis, vulgi pars ultima nostri,
 Quorum nemo queat patriam monstrare parentis
 Ast ego Cecropides! Vivas et originis hujus
 Gaudia longa feras: tamen ima plebe Quiritem
 Facundum invenies; solet hic defendere causas
 Nobilis indocti; veniet de plebe togata,
 Qui juris nodos et legum ænigmata solvat. 50
 Hic petit Euphraten juvenis domitique Batavi

* *Plaute. Heine.*

Custodes aquilas, armis industrius; at tu
 Nil nisi Cecropides truncoque simillimus *Hermæ*.
 Nullo quippe alio vincis discrimine, quam quod
 Illi marmoreum caput est, tua vivit imago.
 Dic mihi, Teucrorum proles, animalia muta
 Quis generosa putet, nisi fortia? nempe volucrem
 Sic laudamus equum, facili cui plurima palma
 Fervet et exsultat rauco victoria Circo.
 Nobilis hic, quocumque venit de gramine, cujus 60
 Clara fuga ante alios et primus in æquore pulvis:
 Sed venale pecus *Corythæ* posteritas et
 Hirpini, si rara jugo Victoria sedit.
 Nil ibi majorum respectus, gratia nulla
 Umbrarum: dominos pretiis mutare jubentur
 Exiguïs tritoque trahunt* epiredia collo
 Segnipedes dignique molam versare *Nepotis*.
 Ergo ut miremur te, non tua, primum aliquid da,
 Quod possim titulis incidere, præter honores,
 Quos illis damus et dedimus, quibus omnia
 debes. 70

Hæc satis ad juvenem, quem nobis fama super-
 bum

Tradit et inflatum plenumque Nerone propinquo:
 Rarus enim ferme sensus communis in illa
 Fortuna. Sed te censeri laude tuorum,
 Pontice, noluerim sic, ut nihil ipse futuræ
 Laudis agas. Miserum est aliorum incumbere
 famæ,

Ne collapsa ruant subductis tecta columnis.
 Stratus humi palmes viduas desiderat ulmos.
 Esto bonus miles, tutor bonus, arbiter idem
 Integer: ambigues si quando citabere testis 80

* *Ducunt.* Heinr.

Incertæque rei, Phalaris licet imperet, ut sis
 Falsus, et admoto dictet perjurio tauro :
 Summum crede nefas animam præferre pudori
 Et propter vitam vivendi perdere causas.
 Dignus morte perit, cœnet licet ostrea centum
 Gaurana et Cosmi toto mergatur aeno.
 Expectata diu tandem provincia quum te
 Rectorem accipiet, pone iræ frena modumque,
 Pone et avaritiæ ; miserere inopum sociorum ;
 Ossa vides regum vacuis exsucta medullis. 90
 Respice, quid moneant leges, quid curia mandet,
 Præmia quanta bonos maneant, quam fulmine justo
 Et Capito et Numitor ruerint, damnante Senatu,
 Piratæ Cilicum. Sed quid damnatio confert,
 Quum Pansa eripiat, quidquid tibi Natta reliquit?
 Præconem, Chærippe, tuis circumspice pannis,
 Jamque tace. Furor est post omnia perdere nau-
 lum.

Non idem gemitus olim, neque vulnus erat par
 Damnorum, sociis florentibus et modo victis.
 Plena domus tunc omnis, et ingens stabat acervus
 Numorum, Spartana chlamys, conchyliæ Coa, 101
 Et cum Parrhasii tabulis signisque Myronis
 Phidiacum vivebat ebur ; nec non Polyoleti
 Multus ubique labor ; raræ sine Mentore mensæ.
 Inde Dolabella est atque hinc Antonius, inde
 Sacrilegus Verres : referebant navibus altis
 Occulta spolia et plures de pace triumphos.
 Nunc sociis juga pauca boum, grex parvus equa-
 rum

Et pater armenti capto eripiat* agello ;
 Ipsi deinde Lares, si quod spectabile signum, 110

* *Eripietur.* Heinr.

Si quis in ædícula Deus unicus. Hæc etenim
sunt

Pro summis: nam sunt hæc maxima. Despicias t
Forsitan imbelles Rhodios unctamque Corinthor
Despicias merito. Quid resinata juvenus
Cruraque totius facient tibi levía gentis?

Horrida vitanda est Hispania, Gallicus axis
Illyricumque latus: parce et messoribus illis,
Qui saturant Urbem Circo scenæque vacantem.
Quanta autem inde feres tam diræ præmia culpæ
Quum tennes nuper Marius discinxerit Afros?
Curandum in primis, ne magna injuria fiat 12
Fortibus et miseris: tollas licet omne, quod us
quam est

Auri atque argenti; scutum gladiumque relin
ques*

Et jacula et galeam: spoliatis arma supersunt.
Quod modo proposui, non est sententia: verum
Credite me vobis folium recitare Sibyllæ.
Si tibi sancta cohors comitum, si nemo tribunal
Vendit Acersecomes, si nullum in conjuge ori
men,

Nec per conventus et cuncta per oppida curvis
Unguibus ire parat numos raptura Celæno: 13
Tunc licet a Pico numeres genus, altaque si te
Nomina delectant, omnem Titanida pugnam
Inter majores ipsumque Promethea ponas:
De quocumque voles proavum tibi sumito libro.
Quod si præcipitem rapit ambitio atque libido,
Si frangis virgas sociorum in sanguine, si te
Delectant hebetes lasso liotore secures;

* *Auri atque argenti, scutum gladiumque relin-
quens* Heins.

Incipit ipsorum contra te stare parentum
 Nobilitas claramque facem præferre pudendis.
 Omne animi vitium tanto conspectius in se 140
 Crimen habet, quanto major qui peccat habetur.
 Quo mihi, te solitum falsas signare tabellas
 In templis, quæ fecit avus, statuamque parentis
 Ante triumphalem? quo, si nocturnus adulter
 Tempora Santonico velas adoperta cucullo?
 Præter majorum cineres atque ossa volucris
 Carpentis rapitur pinguis Damasippus,* et ipse,
 Ipse rotam adstringit multo sufflamine Consul;
 Nocte quidem; sed luna videt, sed sidera testes
 Intendunt oculos. Finitum tempus honoris 150
 Quum fuerit, clara Damasippus luce flagellum
 Sumet et occursum nunquam trepidabit amici
 Jam senis, ac virga prior adnuet atque maniplos
 Solvet et infundet jumentis hordea lassis.
 Interea, dum lanatas torvumque juvenum
 More Numæ cædit Jovis ante altaria, jurat
 Solam Eponam et facies olida ad præsepia pictas.
 Sed quum pervigiles placet instaurare popinas;
 Obvius adsiduo Syrophœnix udus amomo
 Currit, Idumææ Syrophœnix incola portæ, 160
 Hospitis affectu Dominum Regemque salutat,
 Et cum venali Cyane succincta lagena.

Defensor culpæ dicet mihi, fecimus et nos
 Hæc juvenes. Esto. Desisti nempe, nec ultra
 Fovisti errorem. Breve sit, quod turpiter andes;
 Quædam cum prima resecantur crimina barba;
 Indulge veniam pueris. Damasippus ad illos
 Thermarum calices inscriptaque lintea vadit,
 Maturus bello, Armeniæ Syriæque tuendis

* *Lateranus*, adde etiam l. 151 et 167. *Heinr.*

Amnibus et Rheno atque Istro. Præstare Ne-
ronem 170

Securum valet hæc ætas. Mitte Ostia, Cæsar,
Mitte; sed in magna legatum quære popina;
Invenies aliquo cum percussore jacentem,
Permixtum nautis et furibus ac fugitivis,
Inter carnifices et fabros sandapilarum
Et resupinati cessantia tympana Galli.
Æqua ibi libertas, communia pocula, lectus
Non alius cuiquam, nec mensa remotior ulli.
Quid facias talem sortitus, Pontice, servum?
Nempe in Lucanos aut Tusca ergastula mittas. 180
At vos, Trojugenæ, vobis ignoscitis, et quæ
Turpia cerdoni, Volesos Brutumque decebunt.
Quid, si nunquam adeo fœdis adeoque pudendis
Utimur exemplis, ut non pejora supersint?
Consumtis opibus vocem, Damasippe, locasti
Sipario, clamosum ageres ut Phasma Catulli.
Laureolum volox etiam bene Lentulus egit,
Judice me dignus vera cruce. Nec tamen ipsi
Ignoscas populo; populi frons durior hujus,
Qui sedet et spectat triscurria patriciorum, 190
Planipedes audit Fabios, ridere potest qui
Mamercorum alapas. Quanti sua funera vendant,
Quid refert? Vendunt nullo cogente Nerone,
Nec dubitant celsi prætoris vendere ludis.
Finge tamen gladios inde, atque hinc pulpita
pone:

Quid satius? Mortem sic quisquam exhorruit,
ut sit

Zelotypus Thymeles, stupidi collega Corinthi?
Res haud mira tamen, citharædo Principe, mimus
Nobilis. Hæc ultra quid erit, nisi ludus? Et illud
Dedecus Urbis habes: nec mirmillonis in armis,

Nec clypeo Gracchum pugnantem aut falce
 supina; 201
 (Damnat enim tales habitus; sed damnat et odit)
 Nec galea frontem* abscondit: movet ecce tri-
 dentem,

Postquam librata pendentia retia dextra
 Nequidquam effudit, nudum ad spectacula vultum
 Erigit et tota fugit agnoscendus arena.
 Credamus tunicæ, de faucibus aurea quum se
 Porrigat et longo jactetur spira galero.
 Ergo ignominiam graviozem pertulit omni
 Vulnere cum Graccho jussus pugnare secutor. 210

Libera si dentur populo suffragia, quis tam
 Perditus, ut dubitet Senecam præferre Neroni;
 Cujus supplicio non debuit una parari
 Simia, nec serpens unus, nec culeus unus?
 Par Agamemnonidæ crimen; sed causa facit rem
 Dissimilem. Quippe ille Deis auctoribus ultor
 Patris erat cæsi media inter pocula; sed nec
 Electræ jugulo se polluit aut Spartani
 Sanguine conjugii; nullis aconita propinquis
 Miscuit, in scena nunquam cantavit Orestes, 220
 Troica non scripsit. Quid enim Verginius armis
 Debuit ulcisci magis, aut cum Vindice Galba?
 Quid Nero tam sæva crudaque tyrannide fecit?
 Hæc opera atque hæc sunt generosi Principis artes,
 Gaudentis fœdo peregrina ad pulpita saltu
 Prostitui Graiæque apium meruisse coronæ.
 Majorum effigies habeant insignia vocis:
 Ante pedes Domiti longum tu pone Thyestæ
 Syrma vel Antigones, seu personam Menalippes,

* *Faciem.* Heine. † *Cantu.* Heine.
 ‡ *Tu.* Heine.

Et de marmoreo citharam suspende colosso. 230
Quid, Catilina, tuis natalibus atque Cethegi
Inveniet quisquam sublimius? Arma tamen vos
Nocturna et flammæ domibus templisque parastis,
Ut Bracatorum pueri Senonumque minores,
Ausi quod liceat tunica punire molesta.
Sed vigilat Consul vexillaque vestra coercet.
Hic novus Arpinas, ignobilis et modo Romæ
Municipalis Eques, galeatum ponit ubique
Præsidium adtonitis et in omni gente laborat.
Tantum igitur muros intra toga contulit illi 240
Nominis et tituli, quantum non Leucade, quantum
Thessaliæ campis Octavius abstulit udo
Cædibus adsiduus gladio. Sed Roma parentem,
Roma Patrem patriæ Ciceronem libera dixit.
Arpinas alius Volscorum in monte solebat
Poscere mercedes, alieno lassus aratro;
Nodosam post hæc frangebatur vertice vitem,
Si lentus pigra muniret castra dolabra:
Hic tamen et Cimbros et summa pericula rerum
Excipit, et solus trepidantem protegit Urbem; 250
Atque ideo, postquam ad Cimbros stragemque
volabant
Qui nunquam attigerant majora cadavera corvi,
Nobilis ornatur lauro collega secunda.
Plebeiæ Deciorum animæ, plebeia fuerunt
Nomina: pro totis legionibus hi tamen et pro
Omnibus auxiliis atque omni pube Latina
Sufficiunt Dis infernis Terræque parenti:
Pluris enim Decii, quam quæ servantur ab illis.
Ancilla natus trabeam et diadema Quirini
Et fasces meruit, regum ultimus ille bonorum.
Proditæ laxabant portarum claustra tyrannis 261
Exsulibus juvenes ipsius Consulis et quos

Magnum aliquid dubia pro libertate deceret,
 Quod miraretur cum Coclite Mucius et quæ
 Imperii fines, Tiberinum, virgo natavit.
 Occulta ad Patres produxit crimina servus,
 Matronis lugendus: at illos verbera justis
 Afficiunt pœnis et legum prima securis.

Malo pater tibi sit Thersites, dummodo tu sis
 Æacidæ similis Vulcaniaque arma capessas, 270
 Quam te Thersitæ similem producat Achilles.
 Et tamen, ut longe repetas longeque revolvās
 Nomen, ab infami gentem deducis asylo.
 Majorum primus quisquis fuit ille tuorum,
 Aut pastor fuit aut illud, quod dicere nolo.

SATIRA IX.

ARGUMENTUM.

Nævolum pædiconem tristi vultu obvium poeta percontatur, quæ sit mæstitiæ ipsius, rugarum ac maciei causa, et utrum vitæ genus mutaverit. (1-26). Ille respondet, hoc vitæ institutum aliis quidem fuisse perutile, s. vero, præter tenuia quædam munera, nihil inde fructus percepisse, quod et necessitati durissimæ fati tribuendum sit, et avaritiæ Virronis aliorumque divitum cinædorum, qui levissima quæque dona ac beneficia, in draucos collata, iis exprobrent, et gratis operam sibi ab illis cupiant præstari, quamvis deformes sint et hisce clientibus suis omnem conjugii felicitatem et jura parentum legatorumque capiendorum debeant. (27-90). Poeta miseratur sortem Nævoli, isque rogat, ut occulta ipsi credita reticeat, quoniam pathici

odio prosequantur eum, a quo timeant libidines suas evulgari, et vel necem illi machinentur. (90-101). Juvenalis contra monet, ab eo, qui plures servos habeat, nihil, ne noctu quidem, clam posse perpetrari, et recte vivendum esse, cum alias ob causas, tum præcipue, ut contemnere liceat linguam mancipiorum, quæ quidem pessima eorum pars sit. (102-122). Hoc consilium salutare quidem esse fatetur Nævulus, sed nunc rationibus suis parum conducere post consumtum jam ætatis robur et spes deceptas. (123-129). Poeta eum meliora sperare jubet, quum stante Roma numquam defuturi sint homines molles ac cinædi. (130-134). At Nævulus spem, inde concipiendam felicibus tantum propositam esse dicit, non sibi, quem Fatum velit tenui victu contentum esse, et in cujus vota Fortuna sit surda. (135-150).

SCIRE velim, quare toties mihi, Nævole, tristis
 Occurras fronte obducta, ceu Marsya victus.
 Quid tibi cum vultu, qualem deprensus habebat
 Ravola, dum Rhodopes uda terit inguina barba?
 Nos colaphum incutimus lambenti crustulaservo.
 Non erat hac facie miserabilior Crepereius
 Pollio, qui triplicem usuram præstare paratus
 Circuit et fatuos non invenit. Unde repente
 Tot rugæ? certe modico contentus agebas
 Vernam equitem, conviva joco mordente facetus
 Et salibus vehemens intra pomœria natis. 11
 Omnia nunc contra: vultus gravis, horrida siccæ
 Silva comæ, nullus tota nitor in cute, qualem
 Bruttia præstabat calidi tibi fascia visci:

Sed fruticante pilo neglecta et squalida crura.
 Quid macies ægri veteris, quem tempore longo
 Torret quarta dies olimque domestica febris?
 Deprendas animi tormenta latentis in ægro
 Corpore, deprendas et gaudia : sumit utrumque
 Inde habitum facies. Igitur flexisse videris 20
 Propositum et vitæ contrarius ire priori.
 Nuper enim, ut repeto, fanum Isidis et Gany-
 meden,

Pacis et advectæ secreta palatia Matris
 Et Cererem (nam quo non prostat femina templo?)
 Notior Aufidio moechus celebrare solebas,
 Quodque taces, ipsos etiam inclinare maritos.
 Utile et hoc multis vitæ genus : at mihi nullum
 Inde operæ pretium. Pingues aliquando lacernas,
 Munimenta togæ, duri crassique coloris,
 Et male percussas textoris pectine Galli 30
 Accipimus, tenue argentum venæque secundæ.
 Fata rogunt homines : fatum est et partibus illis,
 Quas sinus abscondit. Nam si tidi sidera cessant,
 Nil faciet longi mensura incognita nervi,
 Quamvis te nudum spumanti Virro labello
 Viderit, et blandæ assidue densæque tabellæ
 Sollicitent : *Αὐτὸς γὰρ ἐφέλκεται ἄνδρα κίναϊ-*
δος.

Quod tamen ulterius monstrum, quam mollis
 avarus?

Hæc tribui, deinde illa dedi, mox plura tulisti.
 Computat ac cevet. Ponatur calculus, adsint 40
 Cum tabula pueri : numera : sestertia quinque
 Omnibus in rebus ; numerentur deinde labores.
 An facile et pronum est agere intra viscera penem
 Legitimum atque illio hesternæ occurrere cœnæ?
 Servus erit minus ille miser, qui foderit agrum,

Quam dominum. Sed tu sane tenerum et puerum te

Et pulcrum et dignum cyatho cœloque putabas.

Vos humili adseculæ, vos indulgebitis unquam

Cultori, jam nec morbo donare parati?

En, cui tu viridem umbellam, cui succina mittas

Grandia, natalis quoties redit, aut madidum ver 51

Incipit et strata positus longaue cathedra

Munera femineis tractas secreta Calendis!

Dic, passer, cui tot montes, tot prædia servas

Appula, tot milvos intra tua pascua lassos?

Te Trifolinus ager fecundis vitibus implet

Suspectumque jugum Cumis et Gaurus inanis.

Nam quis plura linit victuro dolia musto?

Quantum erat exhausti lumbos donare clientis

Jugeribus paucis! meliusne hic rusticus infans,

Cum matre et casulis et collusore catello, 60

Cymbala pulsantis legatum fiet amici?

Improbos es, quum poscis, ais:* sed pensio clamat,

Posce; sed appellat puer unicus, ut Polyphemi

Lata acies, per quam sollers evasit Ulixes.

Alter emendus erit; namque hic non sufficit:

ambo

Pascendi. Quid agam bruma spirante? quid, oro,

Quid dicam scapulis puerorum Aquilone Decem-

bris

Et pedibus? durate atque exspectate cicadas?

Verum, ut dissimules, ut mittas cetera, quanto 70

Metiris pretio, quod, ni tibi deditus essem

Devotusque cliens, uxor tua virgo maneret?

Scis certe, quibus ista modis, quam sæpe rogaris

Et quæ pollicitus. Fugientem sæpe puellam

* *Ait.* Heinr.

Amplexu rapui: tabulas quoque ruperat, et jam
Signabat. Tota vix hoc ego nocte redemi,
Te plorante foris. Testis mihi lectulus et tu,
Ad quem pervenit lecti sonus et dominæ vox.
Instabile ac dirimi ceptum et jam pæne solutum
Conjugium in multis domibus servabit adulter. 80
Quo te circumagas? quæ prima aut ultima ponas?
Nullum ergo meritum est, ingrâte ac perfide,
nullum,

Quod tibi filiulus vel filia nascitur ex me?
Tollis enim et libris actorum spargere gaudes
Argumenta viri. Foribus suspende coronas,
Jam pater es: dedimus, quod famæ opponere
possis:

Jura parentis habes, propter me scriberis heres,
Legatum omne capis, nec non et dulce caducum.
Commoda præterea jungentur multa caducis,
Si numerum, si tres implevero.—Justa doloris, 90
Nævole, causa tui. Contra tamen ille quid affert?—
Negligitatque alium bipedem sibi quærit asellum.

Hæc soli commissæ tibi celare memento,
Et tacitus nostras intra te fige querelas.
Nam res mortifera est inimicus pumice levis.
Qui modo secretum commiserat, ardet et odit,
Tanquam prodiderim, quidquid scio. Sumere
ferrum,

Fuste aperire caput, candelam apponere valvis
Non dubitat. Nec contemnas aut despicias, quod
His opibus nunquam cara est annona veneni. 100
Ergo occulta teges, ut curia Martis Athenis.—
O Corydon, Corydon, secretum divitis ullum
Esse putas? Servi ut taceant, jumenta loquentur
Et canis et postes et marmora. Claude fenestras,
Vela tegant rimas, junge ostia, tollite lumen

E medio, clamant omnes, prope nemo recumbat:
 Quod tamen ad cantum galli facit ille secundi,
 Proximus ante diem caupo sciet; audiet et quæ
 Finxerunt pariter librarius, archimagiri,
 Carptores. Quod enim dubitant componere cri-
 men

In dominos, quoties rumoribus ulciscuntur 110
 Baltea? Nec deerit qui te per compita quærat
 Nolentem et miseram vinosus inebriet aurem.
 Illos ergo roges, quidquid paulo ante petebas
 A nobis; taceant illi: sed prodere malunt
 Arcanum, quam subrepti potare Falerni,
 Pro populo faciens quantum Saufeia bibebat.
 Vivendum recte est cum propter plurima, tum his
 Præcipue causis, ut linguas mancipiorum
 Contemnas: nam lingua mali pars pessima servi.
 Deterior tamen hic, qui liber non erit illis, 121
 Quorum animas et farre suo custodit et ære.

Idcirco ut possim linguam contemnere servi,
 Utile consilium modo, sed commune, dedisti:
 Nunc mihi quid suades post damnum temporis et
 spes

Deceptas? Festinat enim decurrere velox
 Flosculus angustæ miseræque brevissima vitæ
 Portio: dum bibimus, dum sarta, unguenta,
 puellas

Poscimus, obrepat non intellecta senectus.—

Ne trepida: nunquam pathicus tibi deerit ami-
 cus, 130

Stantibus et salvis his collibus; undique ad illos
 Convenient et carpentis et navibus omnes,
 Qui digito scalpunt uno caput. Altera major
 Spes superest: tu tantum erucis imprime den-
 tem.—

Hæc exempla para felicibus : at mea Clotho
Et Lachesis gaudent, si pascitur inguine venter.
O parvi nostrique Lares, quos thure minuto
Aut farre et tenui soleo exorare corona,
Quando ego figam aliquid, quo sit mihi tuta se-
nectus

A tegete et baculo ? viginti millia fenus 140
Pignoribus positis, argenti vascula puri,
Sed quæ Fabricius censor notet, et duo fortes
De grege Mæsorum, qui me cervice locata
Securum jubeant clamoso insistere Circo ?
Sit mihi præterea curvus cælator et alter,
Qui multas facies fingat* cito. Sufficiunt hæc,
Quando ego pauper ero. Votum miserabile, nec
spes

His saltem : nam, quum pro me Fortuna rogatur,
Affixit ceras illa de nave petitas,
Quæ Siculos cantus effugit remige surdo. 150

* *Fingit.* Heinr. *Pignat* vel *pignit* alii.

D. JUNII JUVENALIS
AQUINATIS
S A T I R A R U M
LIBER QUARTUS.

S A T I R A X.

ARGUMENTUM.

Homines ubivis fere terrarum veru ignorunt bona et opinata omnibus plerumque votis expetunt, in primis divitias, honores, eloquentiam, militarem gloriam, senectutem, pulcritudinem et robur corporis, quæ tamen vel supervacua, vel etiam prenciosa sunt optantibus. (1-11). Divitias qui possident, iis verendum est, ne jussu tyrannorum, ut Cassius Longinus et Seneca, vel manu latronum, vel veneno necentur. (12-27). Non mirum itaque, stultitiam hominum semper Heraclito fletum movisse et risum contra Democrito, qui multo magis risisset, si nostris vixisset temporibus, quibus longe major est luxus ac fastus. (28-55). Maxima potentia summique honores, ad quos nonnulli adspirant, magnam iis invidiam, perniciem ruinamque parant, nec nisi a mobili plebis animo et Fortunæ favore

pendent, quo mutato is, qui paulo ante adorabatur a vulgo, ab eodem male tractatur et ad scalas Gemonias indeque in Tiberim unco trahitur; quod suo damno experti sunt *Sejanus*, (56-107), et jam ante eum *Crassi*, *Pompeius*, *Cæsar* et alii: nam pauci fuere reges vel principes civitatis et tyranni, qui non violentam passi sint mortem. (108-113). Eloquentia summis nonnumquam oratoribus, ut *Ciceroni* ac *Demostheni*, mortis causa fuit. (114-132). Gloria bellica cum vana brevisque est, tum maximis sæpe imperatoribus exitiosa, ut olim *Hannibali*, *Alexandro* et *Xerxi*. (133-187). Longa vita multis obnoxia est incommodis ac malis; quippe senes plerumque deformes, rugosi, infirmi, tremuli, calvi, mucidi, edentuli, uxori, liberis, sibi ipsisque captatoribus graves, expertes gustus, ad rem *Venerream* inhabiles, surdi, cæci, manci, obli-viosi. (188-239.) Quodsi vero corpore etiam ac mente valent in senectute homines, sentiunt tamen ac lugent alia eaque majora mala, vel publica vel privata ac propria, qualia passi sunt *Nestor*, *Peleus*, *Priamus*, *Hecuba*, *Mithridates*, *Cræsus*, *Marius Pompeius*, quibus feliciores fuere *Lentulus*, *Cethegus* et *Catilina*. (240-288). Pularitudo denique raro pudicitiam tuetur, multisque insidiis, injuriis ac periculis subjecta est; quod docent exempla *Lucretiæ*, *Virginie*, *Hippolyti*, *Bellerophontis* et *C. Sillii*. (289-345). Quæ quum ita sint, Diis potius judicium de eo, quod vere nobis conducatur, permittendum, aut, si optandum aliquid, orandum est, ut mens sit sana in corpore sano, ut ea sit fortis carens terrore mortis, laborum patiens et experta acrium affectuum cupiditatumque: ita enim tran-

quillam atque beatam agemus vitam, quæ a sola virtute ac sapientia, non a Fortuna, pendet. (346-366).

OMNIBUS in terris, quæ sunt a Gadibus usque
Auroram et Gangen, pauci dignoscere possunt
Vera bona atque illis multum diversa, remota
Erroris nebula. Quid enim ratione timemus
Aut cupimus? quid tam dextro pede concipis,
ut te

Conatus non pœniteat votique peracti?
Evertere domos totas optantibus ipsis
Dî faciles; nocitura toga, nocitura petuntur
Militia; torrens dicendi copia multis
Et sua mortifera est facundia; viribus ille 10
Confusus periit admirandisque* lacertis.
Sed plures nimia congesta pecunia cura
Strangulat et cuncta exsuperans patrimonia
census,

Quanto delphinis balsena Britannica major.
Temporibus diris igitur jussuque Neronis
Longinum et magnos Senecæ prædivitis hortos
Clausit, et egregias Lateranorum obsidet aedes
Tota cohors: rarus venit in coenacula miles.
Pauca licet portas argenti vascula puri,
Nocte iter ingressus gladium contumque time-
bis, 20

Et motæ ad lunam trepidabis arundinis umbram:
Cantabit vacuus coram latrone viator.
Prima fere vota et cunctis notissima templis
Divitiæ, crescant ut opes, ut maxima toto

* *Admirandusque.* Heinr.

Nostra sit arca foro. Sed nulla aconita bibuntur
 Fictilibus. Tunc illa time, quum pocula sumes
 Gemmata et lato Setinum ardebit in auro.
 Jamne igitur laudas, quod de sapientibus alter
 Ridebat, quoties de limine moverat unum
 Protuleratque pedem; flebat contrarius auctor? *
 Sed facilis cuivis rigidi censura cachinni: 31
 Mirandum est, unde ille oculis suffecerit humor.
 Perpetuo risu pulmonem agitare solebat
 Democritus, quanquam non essent urbibus illis
 Prætexta et trabes, fascēs, lectica, tribunal.
 Quid, si vidisset Prætores curribus altis
 Exstantem et medio sublimem in pulvere Circi,
 In tunica Jovis et pictæ Sarrana ferentem
 Ex humeris aulæa togæ magnæque coronæ
 Tantum orbem, quanto cervix non sufficit ulla? 40
 Quippe tenet sudans hanc publicus et, sibi Consul
 Ne placeat, curru servus portatur eodem.
 Da nunc et volucrem, sceptro quæ surgit eburno,
 Illinc cornicines, hinc præcedentia longi
 Agminis officia et niveos ad frena Quirites,
 Defossa in loculis quos sportula fecit amicos.
 Tunc quoque materiam risus invenit ad omnes
 Occursus hominum, cujus prudentia monstrat,
 Summos posse viros et magna exempla daturos
 Verveum in patria crassoque sub aere nasci. 50
 Ridebat curas, nec non et gaudia vulgi,
 Interdum et lacrimas, quum Fortunæ ipse minaci
 Mandaret laqueum mediumque ostenderet un-
 quem.

Ergo supervacua aut perniciose petuntur,
 Propter quæ fas est genua incutere Deorum.

* *Alter?* Heintz.

Quosdam præcipitat subjecta potentia magnæ
 Invidiæ ; mergit longa atque insignis honorum
 Pagina ; descendunt status restemque sequuntur.
 Ipsas deinde rotas bigarum impacta securis
 Cædit, et immeritis franguntur crura caballis. 60
 Jam stridunt ignes, jam foliibus atque caminis
 Ardet adoratum populo caput et crepat ingens
 Sejanus : deinde ex facie toto orbe secunda
 Fiunt urceoli, pelves, sartago, patellæ.
 Pone domi lauros, duc in Capitolia magnum
 Cretatumque bovem : Sejanus ducitur unco
 Spectandus ! gaudent omnes. Quæ labra ? quis

illi

Vultus erat ? nunquam, si quid mihi credis, amavi
 Hunc hominem. Sed quo cecidit sub crimine ?
 quisnam

Delator ? quibus indicibus, quo teste probavit ? 70
 Nil horum : verbosa et grandis epistola venit
 A Capreis. Bene habet ; nil plus interrogo. Sed
 quid

Turba Remi ? Sequitur fortunam, ut semper, et
 odit

Damnatos. Idem populus, si Nurtia Tusco
 Favisset, si oppressa foret secunda senectus
 Principis, hac ipsa Sejanum diceret hora
 Augustum. Jam pridem, ex quo suffragia nulli
 Vendimus, effudit curas. Nam qui dabat olim
 Imperium, fascēs, legiones, omnia, nunc se
 Continet atque duas tantum rex anxius optat, 80
 Panem et Circenses. Perituros audio multos.
 Nil dubium ; magna est fornacula : pallidulus mi
 Brutidius meus ad Martis fuit obvis aram.
 Quam timeo, victus ne pœnas exigat Ajax,
Ut male defensus ! Curramus præcipientes et,

Dum jacet in ripa, calcemus Cæsaris hostem.
Sed videant servi, ne quis neget et pavidum in jus
Cervice obstricta* dominum trahat. Hi sermones
Tunc de Sejano, secreta hæc murmura vulgi.

Visne salutari sicut Sejanus ? habere 90
Tantundem atque illi summas donare curules,
Illum exercitibus præponere ? tutor haberi
Principis angusta Caprearum in rupe sedentis
Cum grege Chaldæo ? Vis certe pila, cohortes,
Egregios equites et castra domestica. Quidni
Hæc cupias ? et qui nolunt occidere quemquam,
Posse volunt. Sed quæ præclara et prospera
tanti,†

Ut rebus lætis par sit mensura malorum ?
Hujus, qui trahitur, prætextam sumere mavis,
An Fidenarum Gabiorumque esse potestas 100
Et de mensura jus dicere, vasa minora
Frangere, pannosus vacuis Edilis Ulubris ?
Ergo quid optandum foret, ignorasse fateris
Sejanum : nam qui nimios optabat honores
Et nimias poscebat opes, numerosa parabat
Excelsæ turris tabulata, unde altior esset
Causus et impulsæ præceps immane ruinas.
Quid Crassos, quid Pompeios evertit ? et illum,
Ad sua qui domitos deduxit flagra Quirites ?
Summus nempe locus nulla non arte petitus 110
Magnaue numinibus vota exandita malignis.
Ad generum Cereris sine cæde et vulnere pauci
Descendunt reges et sicca morte tyranni.

Eloquium ac famam Demosthenis aut Ciceronis
Incipit optare et totis Quinquatribus optat,

* *Astricta*. Heinr.

† *Prospera, tantum Ut rebus &c.* Heinr.

Quisquis adhuc uno partem colit asse Minervam.
 Quem sequitur custos angustæ vernula capssæ.
 Eloquentio sed uterque perit orator: utrumque
 Largus et exundans leto dedit ingenii fons.
 Ingenio manus est et cervix cæsa; nec unquam
 Sanguine caudidici maduerunt rostra pusilli. 120
 "O fortunatam natam me consule Romam!"

Antoni gladios potuit contemnere, si sic
 Omnia dixisset. Ridenda poemata malo,
 Quam te conspicuæ, divina Philippica, famæ,
 Volveris a prima quæ proxima. Sævus et illum
 Exitus eripuit, quem mirabantur Athenæ
 Torrentem et pleni moderantem frena theatri.
 Dis ille adversis genitus fatoque sinistro,
 Quem pater, ardentis massæ fuligine lippus, 130
 A carbone et forcipibus gladiosque parante
 Incude et luteo Vulcano ad rhetora misit.

Bellorum exuvias, truncis affixa tropæis
 Lorica et fracta de casside buccula pendens
 Et curtum temone jugum victæque triremis
 Aplustre et summo tristis captivus in arcu
 Humanis majora bonis creduntur: ad hæc* se
 Romanus Graiusque ac barbarus endoperator
 Erexit; causas discriminis atque laboris
 Inde habuit. Tanto major famæ sitis est, quam 140
 Virtutis. Quis enim virtutem amplectitur ipsam,
 Præmia si tollas? Patriam tamen obruit olim
 Gloria paucorum et landis titulique cupido
 Hæsurî saxis cinerum custodibus, ad quæ
 Discutienda valent sterilis mala robora fœus:
 Quandoquidem data sunt ipsis quoque fata sepul-
 cris.

Hoc. Heinr.

Expende Hannibalem; quot libras in duce summo
 Invenies? hic est quem non capit Africa Mauro
 Percussa Oceano Niloque admota tepenti,
 Rarsus ad Æthiopum populosaltosqueelephantos.
 Additur imperiis Hispania: Pyrenæum 151
 Transilit. Opposuit natura Alpemque nivemque:
 Diducit scopulos et montem rumpit aceto.
 Jam tenet Italiam: tamen ultra pergere tendit.
 Actum, inquit, nihil est, nisi Poeno milite portas
 Frangimus et media vexillum pono Subura.
 (O qualis facies et quali digna tabella,
 Quum Gætula ducem portaret belua luscum!)
 Exitus ergo quis est? O gloria! vincitur idem
 Nempe et in exsilium præceps fugit atque ibi
 magnus
 Mirandusque cliens sedet ad prætoria regis. 160
 Donec Bithyno libeat vigilare tyranno.
 Finem animæ, quæ res humanas miscuit olim,
 Non gladii, non saxa dabunt, nec tela: sed ille
 Cannarum vindex ac tanti sanguinis ultor,
 Annulus. I, demens, et æevas curre per Alpes,
 Ut pueris placeas et declamatio fias!
 Unus Pellæo juveni non sufficit orbis:
 Æstuat infelix angusto limite mundi,
 Ut Gyari* clausus scopulis parvaque Seripho: 170
 Quum tamen a figulis munitam intraverit ur-
 bem,
 Sarcophago contentus erit. Mors sola fatetur,
 Quantula sint hominum corpuscula. Creditur
 olim
 Velificatus Athos et quidquid Græcia mendax
 Audet in historia: constratum classibus idem

* Gyari. Heinv.

Suppositumque rotis solidum mare: credimus
altos

Defecisse amnes epotaque flumina, Medo
Prudente, et madidis cantat quæ Sostratus alia.
Ille tamen qualis rediit Salamine relictæ,
In Corum atque Eurum solitus sævire flagellis 180
Barbarus, Æolio nunquam hoc in 'carcere passeos,
Ipsam compedibus qui vinxerat Ennosigæum?
(Mitius id sane, quod non et stigmata dignum
Credidit. Huic quisquam vellet servire Deorum!)
Sed qualis rediit? nempe una nave, cruentis
Fluctibus ac tarda per densa cadavera prora.
Has toties optata exegit gloria pomas!

Da spatium vitæ, multos da, Jupiter, annos!
Hoc recto vultu solum, hoc et pallidus optas.
Sed quam continuus et quantis longa senectus 190
Plena malis! Deformem et tetrum ante omnia
vultum

Dissimilemque sui, deformem pro cute pellem
Pendentesque genas et tales adspice rugas,
Quales, umbriferos ubi pandit Tabraca saltus,
In vetula scalpit jam mater simia bucca.
Plurima sunt juvenum discrimina: pulcrior ille
Hoc, atque ille alio; multum hic robustior illo.
Una senum facies, cum voce trementia membra
Et jam leve caput madidique infantia nasi.
Frangendus misero gingiva panis inermi: 200
Usque adeo gravis uxori natiqque sibi que,
Ut captatori moveat fastidia Cossæ.
Non eadem vini atque cibi, torpente palato,
Gaudia; nam coitus jam longa oblivio; vel si
Coneris, jacet exiguus cum ramice nervus
Et, quamvis tota palpetur nocte, jacebit.
Anne aliquid sperare potest hæc inguinis ægri

Canities? quid? quod merito suspecta libido est,
 Quæ Venerem adfectat sine viribus. Adspice
 partis

Nunc damnum alterius: nam quæ cantante
 voluptas, 210

Sit licet eximius citharædus sitve Seleucus,
 Et quibus aurata mos est fulgere lacerna?
 Quid refert, magni sedeat qua parte theatri,
 Qui vix cornicines exaudiet atque tubarum
 Conventus? clamore opus est, ut sentiat auris,
 Quem dicat venisse puer, quot nuntiet horas.
 Præterea minimus gelido jam in corpore sanguis
 Febre calet sola; circumssilit agmine facto
 Morborum omne genus: quorum si nomina quæ-
 ras

Promptius expediam, quot amaverit Hippia moe-
 chos, 220

Quot Themison ægros auctumno occiderit uno,
 Quot Basilus socios, quot circumscripserit Hirrus
 Pupillos, quot longa viros exsorbeat uno
 Maura die, quot discipulos inclinet Hamillus;
 Percurram citius, quot villas possideat nunc,
 Quo tondente gravis juveni mihi barba sonabat.
 Ille humero, hic lumbis, hic coxa debilis; ambos
 Perdidit ille oculos et luscis invidet; hujus
 Pallida labra cibum accipiunt digitis alienis.
 Ipse ad conspectum coenæ diducere rictum 230
 Suetus, hiat tantum, ceu pullus hirundinis, ad
 quem

Ore volat pleno mater jejuna. Sed omni
 Membrorum damno major dementia, quæ nec
 Nomina servorum, nec vultum agnoscit amici,
 Cum quo præterita cœnavit nocte, nec illos,
 Quos genuit, quos eduxit. Nam codice ætæ

Heredes vetat esse suos ; bona tota feruntur
Ad Phialen : tantum artificis valet halitus oris,
Quod steterat multis in carcere fornicis annis.
Ut vigeant sensus animi, ducenda tamen sunt 240
Funera natorum, rogi adspiciendus amatae
Conjugis et fratris plenaeque sororibus urnae.
Hæc data poena diu viventibus, ut renovata
Semper clade domus, multis in luctibus inque
Perpetuo mœrore et nigra veste senescant.
Rex Pylius, magno si quidquam credis Homero,
Exemplum vitæ fuit a cornice secundæ.
Felix nimirum, qui tot per sæcula mortem
Distulit atque suos jam dextra computat annos
Quique novum toties mustum bibit. Oro, pa-
rumper 250

Adtendas, quantum de legibus ipse queratur
Fatorum et nimio de stamine, quum videt acris
Antilochi barbam ardentem ; quum quærit ab
omni,

Quisquis adest socius, cur hæc in tempora duret,
Quod facinus dignum tam longo admiserit ævo ?
Hæc eadem Peleus, raptum quum luget Achillem,
Atque alius, cui fas Ithacum lugere natantem.
Incolumi Troja Priamus venisset ad umbras
Assaraci, magnis solennibus, Hectore funus
Portante ac reliquis fratrum cervicibus inter 260
Iliadum lacrimas, ut primos edere planctus
Cassandra inciperet scissaeque Polyxena palla,
Si foret exstinctus diverso tempore, quo non
Cœperat audaces Paris ædificare carinas.
Longa dies igitur quid contulit ? omnia vidit
Eversa et flammis Asiam ferroque cadentem.
Tunc miles tremulus posita tulit arma tiara
Et ruit ante aram summi Jovis, ut vetulus bos,

Qui domini cultris tenue et miserabile collum
 Præbet, ab ingrato jam fastiditus aratro. 270
 Exitus ille utcunque hominis: sed torva canino
 Latravit rictu, quæ post hunc vixerat, uxor.
 Festino ad nostros, et regem transeo Ponti
 Et Cræsum, quem vox justi facunda Solonis
 Respicere ad longæ jussit spatia ultima vitæ.
 Exsilium et carcer Minturnarumque paludes
 Et mendicatus victa Carthagine panis
 Hinc causas habuere. Quid illo cive tulisset
 Natura in terris, quid Roma beatius unquam,
 Si, circumducto captivorum agmine et omni 280
 Bellorum pompa, animam exhalasset opimam,
 Quum de Teutonico vellet descendere curru?
 Provida Pompeio dederat Campania febres
 Optandas: sed multæ urbes et publica vota
 Vicerunt. Igitur Fortuna ipsius et Urbis
 Servatum victo caput abstulit. Hoc cruciatu
 Lentulus, hac poena caruit ceciditque Cethegus
 Integer, et jacuit Catilina cadavere toto.

Formam optat modico pueris, majore puellis
 Murmure, quum Veneris fanum videt anxia
 mater,

Usque ad delicias votorum. Cur tamen, inquit, 291
 Corripias? Pulcra gaudet Latona Diana.
 Sed vetat optari faciem Lucretia, qualem
 Ipsa habuit: cuperet Rutilæ Virginia gibbum
 Accipere atque suam Rutilæ dare. Filius autem
 Corporis egregii miseros trepidosque parentes
 Semper habet. Rara est adeo concordia formæ
 Atque pudicitiae. Sanctos licet horrida mores
 Tradiderit domus ac veteres imitata Sabinos,
 Præterea castum ingenium vultumque modesto
 Sanguine ferventem tribuat natura benigna. 301

Larga manu ; (quid enim puero conferre potest
plus

Custode et cura natura potentior omni ?)

Non licet esse viris :* nam prodiga corruptoris

Improbilas ipsos audet tentare parentes.

Tanta in muneribus fiducia ! Nullus ephebum

Deformem sæva castravit in arce tyrannus ;

Nec prætextatum rapuit Nero loripedem, velt

Strumosum atque utero pariter gibboque tumen-
tem.

I nunc et juvenis specie lætare tui ! quem 310

Majora oxspectant discrimina ? fiet adulter

Publicus et pœnas metuet, quascumque mariti

Exigere irati ;† nec erit felicior astro

Martis, ut in laqueos nunquam incidat. Exigit
autem

Interdum ille dolor plus, quam lex ulla dolori

Concessit. Necat hic ferro, secat ille cruentis

Verberibus, quosdam moechos et mugilis intrat.

Sed tuus Endymion dilectæ fiet adulter

Matronæ : mox quam dederit Servilia numos,

Piet et illius, quam non amat : exuat omnem 320

Corporis ornatum. Quid enim ulla negaverit
udis

Inguinibus, sive est hæc Oppia, sive Catulla ?

Deterior totos habet illic femina mores.

Sed casto quid forma nocet ? Quid profuit immo

Hippolyto grave propositum ? quid Bellerophonti ?

Erubuit nempe hæc, ceu fastidita, repulsa.¶

* *Viros.* Heinr.

† *Nec.* Heinr.

‡ *quascumque maritis*

Iratis debet : nec erit felicior astro Heinr.

¶ *Fastidita ; repulso* Nec *Sitheneb.* &c. Heinr.

Nec Sthenebcea minus, quam Cressa, excanduit,
et se

Concussere ambæ. Mulier sæviissima tunc est,
Quum stimulos odio pudor admovet. Elige,
quidnam

Suadendum esse putes, cui nubere Cæsaris uxor
Destinat. Optimus hic et formosissimus idem 331
Gentis patriciæ rapitur miser exstinguendus
Messalinæ oculis: dudum sedet illa parato
Flameolo, Tyriusque palam genialis in hortis
Sternitur, et ritu decies centena dabuntur
Antiquo; veniet cum signatoribus auspex.

Hæc tu secreta et paucis commissa putabas?
Non nisi legitime vult nubere. Quid placeat, dic:
Ni parere velis, pereundum erit ante lucernas:
Si scelus admittas, dabitur mora parvula, dum
res 340

Nota Urbi et populo contingat Principis aures.
Dedecus ille domus sciet ultimus: interea tu
Obsequere imperio; sit tanti vita dierum
Paucorum. Quidquid melius leviusque putaris,
Præbenda est gladio pulcra hæc et candida cervix.

Nil ergo optabunt homines? Si consilium vis,
Permites ipsis expendere numinibus, quid
Conveniat nobis rebusque sit utile nostris.
Nam pro jucundis aptissima quæque dabunt Di.
Carior est illis homo, quam sibi. Nos animorum
Impulsu et cæca magnaue cupidine ducti 351
Conjugium petimus partumque uxoris: at illis
Notum, qui pueri qualisque futura sit uxor.
Ut tamen et poscas aliquid voveasque sacellis
Exta et candiduli divina tomacula porci;
Orandum est, ut sit mens sana in corpore sano.
Fortem posce animum, mortis terrore carentem,

Qui spatium vitæ extremum inter munera ponat
 Naturæ, qui ferre queat quoscunque labores,
 Nesciat irasci, cupiat nihil et potiores 360
 Herculis ærumnas credat sævosque labores
 Et Venere et cœnis et pluma Sardanapali.
 Monstro quod ipse tibi possis dare : semita certe
 Tranquillæ per virtutem patet unica vitæ.
 Nullum numen habes,* si sit Prudentia: nos te,
 Nos facimus, Fortuna, Deam cœloque locamus.

SATIRA XI.

ARGUMENTUM.

Juvenalis ad frugalem cœnam Persicum, amicum suum, invitaturus primum perstringit stultitiam eorum, qui lautiores parent epulas, quam facultatum suarum modus ferat, donec absumto omni patrimonio redigantur ad mendicitatem, quæ vel vitam ac potissimum senectutem ipsa morte gravitatem efficiat, vel eos cogat patria cedere, ne a creditoribus sæpe elusis comprehendantur. (1-55). Quidus præmissis fercula a se parata, una cum supellectile ac ministris, recenset. Cibus dicit esse inemptos et in villa Tiburtina natos, hædulum, gallinam, ova, asparagos, uvas, pira et mala, quæ olim luxuriosa fuerit cœna Senatorum clarissimorumque Romanæ gentis nominum, Curii, Fabiorum, Catonis, Scaurorum, Fabriciorum, aliorumque; (56-92). supellectilem non magnificam, testudineam, argenteam, auream, citream, vel eburneam, sed simplicem, æream, ligneam, fictilem, osseam, mensas

* *Abest.* Heinr.

nuceas et domi natas ; (94-135). servos, non perite opsonia scindentes, nec peregrinos et care entos, vel bene comtos, ornatos et doctos, sed rudes et Italos, pastoris et bubulci filios, indutos crasso eodemque vestitu, nec nisi nunc propter convivium pezos, at ingenui vultus ac pudoris, castos et libidinis ignaros, qui viles calices et vina patria porrecturi sint. (136-161). Præterea non lascivias saltationes et cantilenas Gaditanarum puellarum, sed honestiora Persico promittit ucroamata, recitationes carminum Homeri et altisoni Maronis. (162-180). Denique ab amico petit, ut omnibus dimissis curis hilari animo et, dum omnis Roma ad ludos Megalesiacos spectandos in Circum effusa sit, jam sexta hora veniat : quod sine pudore fieri posse monet, quum nonnumquam fas sit genio indulgere, et rariori usu voluptates commendentur. (181-208).

ATTICUS eximie si cœnat, lautus habetur;
 Si Rutillus, demens. Quid enim majore cachinno
 Excipitur vulgi, quam pauper Apicius? Omnis
 Convictus, thermæ, stationes, omne theatrum
 De Rutilo. Nam dum valida ac juvenilia membra
 Sufficiunt galeæ dumque ardent* sanguine, fertur,
 (Non cogente quidem, sed nec prohibente tribuno,)
 Scripturus leges et regia verba lanistæ.
 Multos porro vides, quos sæpe elusus ad ipsum
 Creditor introitum solet expectare macelli 10
 Et quibus in solo vivendi causa palato est.
 Egregius cœnat meliusque miserrimus horum
 Et cito casurus jam perlucente ruina.

* *Ardens* Heinr.

Interea gustus elementa per omnia quærun-
 Nunquam animo pretiis obstantibus. Interius;
 Attendas, magis illa juvant, quæ pluris emuntur
 Ergo haud difficile est perituram arcessere sum-
 mam,

Lancibus oppositis vel matris imagine fracta,
 Et quadringentis numis condire gulosum
 Fictile. Sic veniunt ad miscellanea ludi. 2
 Refert ergo, quis hæc eadem paret: in Rutilo nam
 Luxuria est, in Ventidio laudabile nomen
 Sumit et a censu famam trahit. Illum ego jure
 Despiciam, qui scit, quanto sublimior Atlas
 Omnibus in Libya sit montibus, hio tamen idem
 Ignoret, quantum ferrata distet ab arca
 Sacculus. E cælo descendit Ἰνῶθι σεαυτὸν,
 Figendum et memori tractandum pectore, sive
 Conjugium quæras, vel sacri in parte Senatus
 Esse velis, (nec enim loricam poscit Achillis 3
 Thersites, in qua se traducebat Ulixes
 Ancipitem), seu tu* magno discrimine causam
 Protegere affectas; te consule, dic tibi, qui sis,
 Orator vehemens, an Curtius et Matho buccæ.
 Noscenda est mensura sui spectandaque rebus
 In summis minimisque; etiam quum pisci
 emetur,

Ne nullum cupias, quum sit tibi gobio tantum
 In loculis. Quis enim te, deficiente crumena
 Et crescente gula, manet exitus, ære paterno
 Ac rebus mersis in ventrem, fenerator atque 4
 Argenti gravis et pecorum agrorumque capacem!

* *Esse velis: nec enim loricam poscit Achillis
 Thersites, in qua se transducebat Ulixes.*

Ancipitem, seu tu &c. Rap.
 † *Quis Heinr.*

Talibus a dominis post cuncta novissimus exit
Annulus, et digito mendicat Pollio nudo.

Non præmaturi cineres, nec funus acerbum
Luxuriæ, sed morte magis metuenda senectus.

Hi plerumque gradus: conducta pecunia Romæ
Et ceram dominis consumitur: inde ubi paulum

Nescio quid superest et pallet fenoris auctor,

Qui ~~vetere~~ solum, Baias et ad ostrea* currunt. *venere.*

Cedere namque foro jam non est deterius, quam

Esquilias a ferventi migrare Subura. 51

Ille dolor solus patriam fugientibus, illa

Mœstitia est caruisse anno Circensibus uno.

Sanguinis in facie non hæret gutta: morantur

Pauci ridiculam effugientem ex Urbe Pudorem.

Experire hodie, numquid pulcerrima dictu,

Persice, non præstem vita vel moribus et re;

Sed laudem siliquas occultus ganeo; pultes

Coram aliis dictem puero, sed in aure placentas.

Nam quum sis conviva mihi promissus, habebis

Evandrum, venies Tiryntius aut minor illo 61

Hospes et ipse tamen contingens sanguine cœ-

lum;

Alter aquis, alter flammis ad sidera missus.

Fercula nunc audi nullis ornata macellis.

De Tiburtino veniet pinguis ager

Hædulus et toto grege mollior, inscius herbæ,

Necdum ausus virgas humilis mordere salicti,

Qui plus lactis habet, quam sanguinis; et montani

Asparagi, posito quos legit villica fuso.

Grandia præterea tortoque calentia fœno 70

Ova absunt ipsis cum matribus et servatæ

Parte anni, quales fuerant in vitibus, uvæ:

* Ostia. Heiur.

Signinum Syriumque pyrum, de corbibus isdem
 Æmula Picenis et odoris mala recentis,
 Nec metuenda tibi, siccatum frigore postquam
 Auctumnum et erudi posuere pericula suci.
 Hæc olim nostri jam luxuriosa Senatus
 Cœna fuit. Curius, parvo quæ legerat horto,
 Ipse focus brevibus ponebat oluscula, quæ nunc
 Squalidus in magna fastidit compede fossor, 80
 Qui meminit, calidæ sapiat quid vulva popinæ.
 Sicci terga suis, rara pendentia crata,
 Moris erat quondam festis servare diebus
 Et natalitium cognatis ponere lardum,
 Accedente nova, si quam dabat hostia, carne.
 Cognatorum aliquis titulo ter Consulis atque
 Castrorum imperiis et Dictatoris honore
 Functus ad has epulas solito maturius ibat,
 Erectum domito referens a monte ligonem.
 Quum tremarent autem Fabios durumque Cato-
 nem 90

Et Scauros et Fabricios, postremo severos
 Censoris mores etiam collega timeret;
 Nemo inter ouas et seria duxit habendum,
 Qualis in Oceani fluctu testudo nataret,
 Clarum Trojugenis factura ac nobile fulcrum:
 Sed nudo latere et parvis frons ærea leotis
 Vile coronati caput ostendebat aselli,
 Ad quod lascivi ludebant ruris alumni.
 Tales ergo cibi, qualis domus atque supellex.
 Tunc rudis et Graias mirari nescius artes, 100
 Urbibus eversis, prædarum in parte reperta
 Magnorum artificum frangebatur pocula miles,
 Ut phaleris gauderet equus, cœlataque cassis
 Romulæ simulacra feræ mansuescere jussæ
Imperii fato, geminos sub rupe Quirinos,

Ac nudam effigiem clypeo venientis et hasta
 Pendentisque Dei perituro ostenderet hosti.
 Argenti quod erat solis fulgebat in armis.
 Ponebant igitur Tusco farrata catino;
 Omnia tunc, quibus invideas, si lividulus sis. 110
 Templorum quoque majestas præsentiore et vox
 Nocte fere media mediamque audita per Urbem,
 Litore ab Oceani Gallis venientibus et Dis
 Officium vatis peragentibus, his monuit nos.
 Hanc rebus Latlis curam præstare solebat
 Fictilis et nullo violatus Jupiter auro.
 Illa domi natus nostraque ex arbore mensas
 Tempora viderunt; hoc lignum stabat in usus,
 Annosam si forte nucem dejecerat Eurus.
 At nunc divitibus cœnandi nulla voluptas, 120
 Nil rhombus, nil dama sapit, putere videntur
 Unguenta atque rosæ, latos nisi sustinet orbes
 Grande ebur et magno sublimis pardus hiatu,
 Dentibus ex illis, quos mittit porta Syenes
 Et Mauri celeres et Mauro obscurior Indus,
 Et quos deposuit Nabatæo belua saltu,
 Jam nimio capitiq; graves. Hinc surgit orexis,
 Hinc stomacho bilis: * nam pes argenteus illis,
 Annulus in digito quod ferreus. Ergo superbum
 Convivam caveo, qui me sibi comparat et res 130
 Despicit exiguas. Adeo nulla uncia nobis
 Est eboris, nec tessellæ, nec calculus ex hac
 Materia: quin ipsa manubria cultellorum
 Ossea: non tamen his ulla unquam opsonia fiunt
 Rancidula, aut ideo pejor gallina secatur.
 Sed nec structor erit, cui cedere debeat omnis
 Pergula, discipulus Trypheri doctoris, apud quem

* Vires: Heinv.

Sumine cum magno lepus atque aper et pygargus
Et Scythicæ volucres et phœnicopterus ingens
Et Gaetulus oryx hebeti lautissima ferro 140
Cæditur et tota sonat ulmea cœna Subura.
Nec frustum capræ subducere, nec latus Afræ
Nœvit avis noster tirunculus ac rudis omni
Tempore et exiguæ furtis imbutus ofellæ.
Plebeios calices et paucis assibus emtos
Porriget incultus puer atque a frigore tutus :
Non Phryx aut Lycius, non a mangone petitus
Quisquam erit, et magno. Quam posces, posce
Latine.

Idem habitus cunctis, tonsi rectique capilli
Atque hodie tantum propter convivia pexi. 150
Pastoris duri est hic filius, ille bubulci.
Suspirat longo non visam tempore matrem
Et casulam et notos tristis desiderat hædes
Ingenui vultus puer ingenuique pudoris,
Quales esse decet, quos ardens purpura vestit ;
Nec pugillares defert in balnea raucus
Testiculos, nec vellendas jam præbuit alas,
Crassa nec opposito pavidus tegit inguina gutto.
Hic tibi vina dabit, diffusa in montibus illis,
A quibus ipse venit, quorum sub vertice lusit : 160
Namque una atque eadem est vini patria atque
ministri.

Forsitan expectes, ut Gaditana canoro
Incipiat prurire choro plausuque probatæ
Ad terram tremulo descendant clune puellæ,*
Irritamentum Veneris languentis et acres
Divitis urticæ. Major tamen ista voluptas
Alterius sexus : magis ille extenditur, et mox

* Vide l. 202.

Auribus atque oculis concepta urina movetur.
 Non capit has nugas humilis domus: audiat ille
 Testarum crepitus cum verbis, nudum olido
 stans 170

Fornice mancipium quibus abstinet; ille fruatur
 Vocibus obscænis omnique libidinis arte,
 Qui Lacedæmonium pytismate lubricat orbem.
 Namque ibi fortunæ veniam damus: alea turpis,
 Turpe et adulterium mediocribus. Hæc eadem illi
 Omnia quum faciant*, hilares nitidique vocantur.
 Nostra dabunt alios hodie convivia ludos:
 Conditor Iliados cantabitur atque Maronis
 Altisoni dubiam facientia carmina palmam.
 Quid refert, tales versus qua voce legantur? 180

Sed nunc dilatis averte negotia curis
 Et gratam requiem dona tibi, quando licebit
 Per totam cessare diem: non feneris ulla
 Mentio, nec, prima si luce egressa reverti
 Nocte solet, tacito bilem tibi contrahat uxor,
 Humida suspectis referens multicia rugis
 Vexatasque comas et vultum auremque calentem.
 Protenus ante meum, quidquid dolet, exue limen:
 Pone domum et servos et quidquid frangitur illis
 Aut perit: ingratos ante omnia pone sodales. 190

Interea Megalesiacæ spectacula mappæ,
 Idæum solenne, colunt, similisque triumpho
 Præda caballorum Prætor sedet ac, mihi pace
 Immensæ nimisæque licet si dicere plebis,
 Totam hodie Romam circus capit et fragor aurem
 Percutit, eventum viridis quo colligo panni.
 Nam si deficeret, moestam attonitamque videres
 Hanc urbem, veluti Cannarum in pulvere victis

* *Faciunt*, Heint.

Consulibus. Spectent juvenes, quos clamor et
audax

Sponsio, quos cultæ decet adsedisse puellæ; 200

Spectent hoc nuptæ juxta recubante marito,

Quod pudeat narrasse aliquem præsentibus ipsis.*

Nostra bibat vernum contracta cuticula solem

Effugiatque togam. Jam nunc in balnea, salva

Fronte, licet vadas, quanquam solida hora supersit

Ad sextam. Facere hoc non possis quinque die-
bus

Continuis, quia sunt talis quoque tædia vitæ

Magna. Voluptates commendat rarior usus.

SATIRA XII.

ARGUMENTUM.

Juvenalis scribit Corvino, se ob redivitum Catulli, amici sui, ex periculosa navigatione vota Diis persoluturum esse. (1-16). Tum describit sævissimam tempestatem, qua coorta arserint vela, et amicus, ut præsentissimum effugeret periculum, pretiosam suppellectilem in mare abjicere malumque amputare coactus sit, donec tandem, tranquilla cæli serenitate ac sole cum spe vitæ redeunte, lacera navis portum Ostiensem tenuerit. (17-82). Itaque poeta præ gaudio vix sui compos servos seque ipsum ad festam hujus diei lætitiâ et sacra Diis, tum majoribus tum domesticis, faciendâ excitat. (83-92). Ne vero quis suspicetur, hæc ad hereditatem Catulli captandam spectare, monet, ei tres esse liberos et

* Inseruit Heinr. l. 201, 202 inter 164 et 165 :
idem pro spectent legit spectant.

Novii aut Pacuvii aliorumque heredipetarum, his similibus, mores ingeniumque ita ferre, ut patribus ne ægram quidem gallinam aut coturnicem impendant, at pro salute orbis divitumque, Gallitæ et Paccii, si vel primum levemque febris sentiant æstum, non modo hecatomben Diis voveant, sed etiam elephantos, si hæc animalia in Italia cælo gignerentur, et servos vel adeo liberos suos, si liceret per leges, immolarent, quum jucundam, etsi incertam, alant spem, fore, ut, si ægri ex morbo convalescant, ipsi, testamentis mutatis, heredes ex asse scribantur. (93-127). Hinc indignatione accensus Juvenalis ejusmodi captatoribus vitam Nestoris et auri montes precatur, sed ea lege, ut nec ament quemquam nec amentur ab ullo. (128-139).

NATALI, Corvine, die mihi dulcior hæc lux,
Qua festus promissa Deis animalia cespes
Exspectat, niveam Reginæ ducimus agnam,
Par vellus dabitur pugnant Gorgone Maura.
Sed procul extensum petulans quatit hostia funem,

Tarpeio servata Jovi, frontemque coruscat:
Quippe ferox vitulus, templis maturus et aræ
Spargendusque mero, quem jam pudet ubera
matris

Ducere, qui vexat nascenti robora cornu.
Si res ampla domi similisque affectibus esset, 10
Pinguior Hispulla traheretur taurus et ipsa
Mole piger nec finitima nutritus in herba,
Læta sed ostendens Clitumni pasoua sanguis
Iret et a grandi cervix ferienda ministro
Ob reditum trepidantis adhuc horrendaque passæ

Nuper et incolumem sese mirantis amici.
 Nam præter pelagi casus et fulguris ictum
 Evasi, densæ* cælum abscondere tenebræ
 Nube una, subitusque antennas impulit ignis,
 Quum se quisque illo percussus crederet et mo
 Attonitus nullum conferri posse putaret 2
 Naufragium velis ardentibus. Omnia fiunt
 Talia, tam graviter, si quando poetica surgit
 Tempestas. Genus ecce aliud discriminis: auct
 Et miserere iterum: quanquam sint cetera sorti
 Ejusdem: pars dira quidem, sed cognita multis
 Et quam votiva testantur fana tabella
 Plurima. Pictores quis nescit ab Iside pasci?
 Accidit et nostro similis fortuna Catullo.
 Quum plenus fluctu medius foret alveus et jam,
 Alternum puppis latus evertentibus undis 3
 Arboris incertæ, nullam prudentia cani
 Rectoris conferret opem; decidere jactu
 Cœpit eum ventis, imitatus castora, qui se
 Eunuchum ipse facit, cupiens evadere damno
 Testiculi: adeo medicatum intelligit inguen.
 Fundite, quæ measunt, dicebat, cuncta, Catullus
 Præcipitare volens etiam pulcerrima, vestem
 Purpuream, teneris quoque Mæcenatibus aptam,
 Atque alias, quarum generosi graminis ipsum 4
 Infecit natura pecus, sed et egregius fons
 Viribus occultis et Bæticus adjuvat aer.
 Ille nec argentum dubitabat mittere, lances
 Parthenio factas, urnæ cratera capacem
 Et dignum sitiente Pholo vel eonjuge Fusci;
 Adde er bascaudas et mille escaria, multum
 Cælati, biberat quo calidus emtor Olynthi.

* *Ictus evasit. Densæ et cet. Heinr.*

Sed quis nunc alius qua mundi parte, quis audet
 Argento præferre caput rebusque salutem?
 Non propter vitam faciunt patrimonia quidam, 50
 Sed vitio cæci propter patrimonia vivunt.
 Jactatur rerum utilium pars maxima: sed nec
 Damna levant. Tunc, adversis urgentibus, illuc
 Recidit,* ut malum ferro submitteret, ac se
 Explicat angustum. Discriminis ultima, quando
 Præsidia afferimus navem factura minorem.
 I nunc et ventis animam committe, dolato
 Confusus ligno, digitis a morte remotus
 Quatuor aut septem, si sit latissima tæda!
 Mox cum reticulis et pane et ventre lagenæ 60
 Adspice sumendas in tempestate secures.
 Sed postquam jacuit planum mare, tempora post-
 quam

Prospera vectoris fatumque valentius Euro
 Et pelago; postquam Parcæ meliora benigna
 Pensa manu ducunt hilares et staminis albi
 Lanificæ, modica nec multum fortior aura
 Ventus adest; inopi miserabilis arte cucurrit
 Vestibus extentis et, quod superaverat unum,
 Velo prora suo. Jam deficientibus Austris,
 Spes vitæ cum sole redit: tum gratus Iulo, 70
 Atque novercali sedes prælata Lavino,
 Conspicitur sublimis apex, cui candida nomen
 Scrofa dedit, lætis Phrygibus mirabile sumen,
 Et nunquam visis tritiginta clara mamillis.
 Tandem intrat positas inclusa per æquora moles
 Tyrrhenamque Pharon porrectaque brachia rur-
 sum,

* *Decidit, ut malum ferro submitteret; hac re
 Explicat angustum; discriminis ultima, quando
 Heinr.*

Quæ pelago occurrunt medio longeque relinquunt
 Italiam. Non sic igitur mirabere portus,
 Quos natura dedit: sed trunca puppe magister
 Interiora petit, Baianæ pervia cymbæ, 80
 Tuti stagna sinus. Gaudent ibi vertice raso*
 Garrula securi narrare pericula nautæ.
 Itē igitur, pueri, linguis animisque faventes,
 Sertaque delubris et farra imponite cultris,
 Ac molles ornate focos glebamque virentem!
 Jam sequar et, sacro quod præstat rite peracto,
 Inde domum repetam, graciles ubi parva coronas
 Accipiunt fragili simulacra nitentia cæra.
 Hic nostrum placabo Jovem Laribusque paternis
 Thura dabo atque omnes violæ jactabo colores. 90
 Cuncta nitent: longos erexit janua ramos
 Et matutinis operatur festa lucernis.

Nec suspecta tibi sint hæc, Corvine: Catullus,
 Pro cuius reditu tot pono altaria, parvos
 Tres habet heredes. Libet exspectare, quis ægram
 Et claudentem oculos gallinam impendat amico
 Tam sterili. Verum hæc nimia est impensa:
 coturnix

Nulla unquam pro patre cadet. Sentire calorem
 Si cœpit locuples Gallita et Paccius orbi,
 Legitime fixis vestitur tota tabellis 100
 Porticus; existunt qui promittant† hecatomben,
 Quatenus hic non sunt nec venales elephantī,
 Nec Latio aut usquam nostro sub sidere talis
 Belua concipitur; sed furva gente petita
 Arboribus Rutulis et Turni pascitur agro,
 Cæsaris armentum, nulli servire paratum

* *Tuti stagna sinus, gaudent ubi vertice raso*
Heinr. † *Promittunt.* Heinr.

Privato : siquidem Tyrio parere solebant
 Hannibali et nostris ducibus regique Molosso
 Horum majores ac dorso ferre cohortes,
 Partem aliquam belli et euntem in prœlia tur-
 rim. 110

Nulla igitur mora per Novium, mora nulla per
 Histrum

Pacuvium, quin illud ebur ducatur ad aras
 Et cadat ante Lares Gallitæ victima, sola
 Tantis digna Deis et captatoribus horum.
 Alter enim, si concedas mactare, vovebit
 De grege servorum magna aut pulcerrima quæque
 Corpora ; vel pueris et frontibus ancillarum
 Imponet vittas et, si qua est nubilis illi
 Iphigenia domi, dabit hanc altaribus, etsi
 Non sperat tragicæ furtiva piacula cervæ. 120
 Laudo meum civem, nec comparo testamento
 Mille rates: nam si Libitinam evaserit æger,
 Delebit tabulas, inclusus carcere nassæ,
 Post meritum sane mirandum, atque omnia soli
 Forsan Pacuvio breviter dabit. Ille superbus
 Incedet victis rivalibus. Ergo vides, quam
 Grande operæ pretium faciat jugulata Mycenis.

Vivat Pacuvius, queso, vel Nestora totum ;
 Possideat, quantum rapuit Nero; montibus aurum
 Exæquet; nec amet quemquam, nec ametur ab
 ullo! 130

D. JUNII JUVENALIS
AQUINATIS
SATIRARUM
LIBER QUINTUS.

SATIRA XIII.

ARGUMENTUM.

Calvinum, cum gemitu et luctu querentem de perfidia amici, qui depositum (decem sestertia) abnegaverat, consolaturus poeta, ipso statim principio, (1-12), breviter recenset inculcatque solatia, quæ deinde (13-249), uberius planiusque persequitur, docens, non tenuem Calvino censum, adeoque damnum, quod passus sit, mediocre esse et æquo ferendum animo; (7, 8, 13-16) tale flagitium non rarum esse inde ab Saturni ævo, neque viro jam sexagenario longoque rerum usu imbuto miraculo debere esse, his præsertim temporibus, quibus multo graviora quotidie committantur, et egregius sanctusve homo monstro portentoque similis sit; (16-74, et 120-173), hanc vero improbitatem summamque, qua nunc pejeretur, audaciam minime miram videri propter perversas de Diis opiniones ineptamque

theologiam, quæ contentum gignat divini numinis efficiatque, ut alii omnino negent Deos esse, qui res humanas curent, alii pœnas iis solvere malint, quam perjuriarum flagitiorumque fructu carere, alii denique spem impunitatis inde concipiant, quod lenta Deorum ira ipsique exorabiles sint et quod ille crucem pretium sceleris tulerit, hic diadema, (75-119); damna et injurias suppliciis improborum vel ira ac vindicta non sarciri, et ultionem minuti atque infirmi animi, ideoque maxime feminarum, non virorum, minimeque philosophorum, voluptatem esse, (174-192); improbos mala conscientia, quæ pœna sit omnium gravissima cruciari et nocte dieque suum gestare in pectore testem; hinc iis cibum inter dentes crescere, vina displicere vetera, somnos breves ac turbidos esse, minima tonitrua fulguraque pavorem inculere et quemcumque morbum ab infesto Numine immissum videri, (192-235); malos homines, libidini indulgentes, sensim adsciscere consuetudinam peccandi et sic plerumque serius aut citius pœnas dare. (236-249).

EXEMPLO quodcumque malo committitur, ipsi Displicet auctori. Prima est hæc ultio, quod se Judice nemo nocens absolvitur, improba quamvis Gratia fallaci Prætoris vicerit urna. Quid sentire putas omnes, Calvine, recenti De scelere et fidei violatæ crimine? Sed nec Tam tenuis census tibi contigit, ut mediocris Jacturæ te mergat onus; nec rara videmus, Quæ pateris. Casus multis hic cognitus ac jam Tritus et e medio fortunæ ductus acervo.

Ponamus nimios gemitus : flagrantior æquo
 Non debet dolor esse viri, nec vulnere major.
 Tu quamvis levium minimam exiguanque malorum

Particulam vix ferre potes, spumantibus ardens
 Visceribus, sacrum tibi quod non reddat amicus
 Depositum ? Stupet hæc, qui jam post terga reliquit

Sexaginta annos, Fonteio Consule natus ?
 An nihil in melius tot rerum proficis usu ?
 Magna quidem, sacris quæ dat præcepta libellis,
 Victrix fortunæ sapientia: ducimus autem 20
 Hos quoque felices, qui ferre incommoda vitæ,
 Nec jactare jugum, vita didicere magistra.
 Quæ tam festa dies, ut cesset prodere furem,
 Perfidiam, fraudes atque omni ex crimine lucrum
 Quæsitum et partos gladio vel pyxide numos ?
 Bari quippe boni : numerus vix est totidem, quot
 Thebarum portæ vel divitis ostia Nili.

Nona ætas agitur pejoraque sæcula ferri
 Temporibus, quorum scelerei non invenit ipsa 30
 Nomen et a nullo posuit Natura metallo.
 Nos hominum Divumque fidem clamore clemus,
 Quanto Fœsidium laudat vocalis agentem
 Sportula. Dic, senior bulla dignissime, nescis,
 Quas habeat Veneres aliena pecunia ? nescis,
 Quem tua simplicitas risum vulgo moveat, quum
 Exigis a quoquam, ne pejeret et putet ullis
 Esse aliquod numen templis aræque rubenti ?
 Quondam hoc indigenæ vivebant more, priusquam
 Sumeret agrestem posito diademate falcem
 Saturnus fugiens, tunc, quum virguncula Juno
 Et privatus adhuc Idæis Jupiter antris, 40
 Nulla super nubes convivia Cœlicolarum,

Nec puer Iliacus, formosa nec Herculis uxor
 Ad cyathos et jam siccato nectare tergens
 Brachia Vulcanus Liparæa nigra taberna.
 Prandeat sibi quisque Deus, nec turba Deorum
 Talis, ut est hodie, contentaque sidera paucis
 Numinibus miserum urgebant Atlanta minori
 Pondere. Nondum aliquis sortitus triste pro-
 fundi

Imperium aut Sicula torvus cum conjuge Pluton;
 Nec rota, nec Furis, nec saxum aut vulturis
 atri 51

Pœna; sed infernis hilares sine regibus umbræ.
 Improbis illo fuit admirabilis sevo.
 Credebant hoc grande nefas et morte piandum,
 Si juvenis vetulo non adsurrexerat et si
 Barbato cuicumque puer, licet ipse videret
 Plura domi fraga et majores glandis acervos.
 Tam venerabile erat, præcedere quatuor annis,
 Priamque par adeo sacris lanugo senectæ!
 Nunc, si depositum non infitietur amicus, 60
 Si reddat veterem cum tota ærugine follem,
 Prodigiosa fides et Tuscis digna libellis,
 Quæque coronata lustrari debeat agna.
 Egregium sanctumque virum si cerno, bimembri
 Hoc monstrum puero aut miranti sub aratro
 Piscibus inventis et fætæ comparo mulæ,
 Sollicitus, tanquam lapides effuderit imber,
 Examenve* apium longa consederit uva
 Culmine delubri, tanquam in mare fluxerit amnis
 Gurgitibus miris et lactis vortice torrens. 70

Intercepta decem quereris sestertia fraude
 Sacriliga? Quid si bis centum perdidit alter

* *Examenque* Heinr.

Hoc arcana modo? majorem tertius illa
 Summam, quam patulæ vix ceperat angulus arcæ?
 Tam facile et pronum est superos contemnere
 testes,

Si mortalis idem nemo sciat! Adspice, quanta
 Voce neget; quæ sit ficti constantia vultus.
 Per Solis radios Tarpeiaque fulmina jurat
 Et Martis frameam et Cirrhæi spicula vatis,
 Per calamos venatricis pharetramque Puellæ, 80
 Perque tuum, pater Ægæi Neptunæ, tridentem;
 Addit et Herculeos arcus hastamque Minervæ,
 Quidquid habent telorum armamentaria oculi.
 Si vero et pater est,—Comedam, inquit, flebile nati
 Sinciput elixi Pharioque madentis aceto.

Sunt in Fortunæ qui casibus omnia ponant*
 Et nullo credant† mundum rectore moveri,
 Natura volvente vices et lucis et anni,
 Atque ideo intrepidi quæcumque altaria tangunt.
 Est alius metuens, ne crimen Pœna sequatur. 90
 Hic putat esse Deos et pejerat, atque ita secum:
 Decernat, quodcumque volet, de corpore nostro
 Isis et irato feriat mea lumina sistro,
 Dummodo vel cæcusteneam, quos abnego, numos.
 Et phthisis et vomicæ putres et dimidium crus
 Sunt tanti? Pauper locupletem optare podagram
 Ne dubitet Ladas, si non eget Anticyra nec
 Archigene. Quid enim velocis gloria plantæ
 Præstat et esuriens Pisææ ramus olivæ?
 Ut sit magna, tamen certe lenta ira Deorum est.
 Si curant igitur cunctos punire nocentes, 101
 Quando ad me venient? sed et exorabile Numen
 Fortasse experiar: solet his ignoscere. Multi

* *Ponunt* Heinr.

† *Credunt* Heinr.

Committunt eadem diverso crimina fato :
 Ille crucem sceleris pretium tulit, hic diadema.
 Sic animum diræ trepidum formidine culpæ
 Confirmant. Tunc te sacra ad delubra vocantem
 Præcedit, trahere immo ultro ac vexare paratus.
 Nam quum magna malæ superest audacia causæ,
 Creditur a multis fiducia. Mimam agit ille, 110
 Urbani qualem fugitivus scurra Catulli :
 Tu miser exclamas, ut Stentora vincere possis,
 Vel potius, quantum Gradivus Homericus : Audis,
 Jupiter, hæc, nec labra moves, quum mittere
 vocem

Debueras vel marmoreus vel æneus ? ant cur
 In carbone tuo charta pia thura soluta
 Ponimus et sectum vituli jecur albaque porci
 Omenta ? Ut video, nullum discrimen habendum est

Effigies inter vestras statuamque Vagelli.
 Accipe quæ contra valeat solatia ferre, 120
 Et qui nec Cynicos, nec Stoica dogmata legit
 A Cynicis tunica distantia, non Epicurum
 Suspicit exigui lætum plantaribus horti.
 Curentur dubii medicis majoribus ægri ;
 Tu venam vel discipulo committe Philippi.
 Si nullum in terris tam detestibile factum
 Ostendis, taceo ; nec pugnis cædere pectus
 Te veto, nec plana faciem contundere palma,
 Quandoquidem accepto claudenda est janua
 damno.

Et majore domus gemitu, majore tumultu 130
 Planguntur numi, quam funera. Nemo dolorem
 Fingit in hoc casu, vestem deducere summam
 Contentus, vexare oculos humore coacto.
 Ploratur lacrumis amissa pecunia veris.

Sed si cuncta vides simili fora plena querela,
 Si, decies lectis diversa parte tabellis,
 Vana supervacui dicunt chirographa ligni,
 Arguit ipsorum quos litera gemmaque princeps
 Sardonychum, loculis quæ custoditur eburnis :
 Ten', o delicias!* extra communia censes 140
 Ponendum? Qui tu gallinæ filius albæ,
 Nos viles pulli nati infelicibus ovis?
 Rem pateris modicam et mediocri bile ferendam,
 Si flectas oculos majora ad crimina. Confer
 Conductum latronem, incendia sulphure cœpta
 Atque dolo, primos quum janua colligit ignes;
 Confer et hos, veteris qui tollunt grandia templi
 Pocula adorandæ robignis et populorum
 Dona vel antiquo positas a rege coronas.
 Hæc ibi si non sunt, minor exstat sacrilegus,
 qui
 Radat inurati femur Herculis et faciem ipsam 151
 Neptuni; qui bracteolam de Castore ducat.
 An dubitet solitus totum conflare Tonantem?
 Confer et artifices mercatoremque veneni
 Et deducendum corio bovis in mare, cum quo
 Clauditur adversis innoxia simia fatis.
 Hæc quota pars scelerum, quæ custos Gallicus
 Urbis
 Usque a Lucifero, donec lux occidat, audit?
 Humani generis mores tibi nosse volenti
 Sufficit una domus. Paucos consume dies, et 160
 Dicere te miserum, postquam illinc veneris,
 aude.
 Quis tumidum guttur miratur in Alpibus? aut
 quis

* *Te nunc, delicias, &c.* Heinr.

In Meroe crasso majorem infante mamillam ?
 Cœrula quis stupuit Germani lumina, flavam
 Cæsariem et madido torquentem cornua cirro ?
 Nempe quod hæc illis natura est omnibus una.
 Ad subitas Thracum volucres nubemque sonoram
 Pygmæus parvis currit bellator in armis :
 Mox impar hosti raptusque per æera curvis
 Unguibus a sæva fertur grue. Si videas hoc 170
 Gentibus in nostris, risu quatiare : sed illic,
 Quanquam eadem assidue spectentur proelia, ridet
 Nemo, ubi tota cohors pede non est altior uno.

Nullane perjuri capitis fraudisque nefandæ
 Poena erit? Abreptum crede hunc graviore catena
 Protenus et nostro (quid plus velit ira ?) necari
 Arbitrio : manet illa tamen jactura, nec unquam
 Depositum tibi sospes erit : sed corpore trunco
 Invidiosa dabit minimus solatia sanguis :
 At vindicta bonum vita jucundius ipsa. 180
 Nempe hoc indocti, quorum præcordia nullis
 Interdum aut levibus videas flagrantia causis.
 Quantulacumque adeo est occasio, sufficit iræ :
 Chrysippus non dicet idem nec mite Thaletis
 Ingenium dulcique senex vicinus Hymetto,
 Qui partem acceptæ sæva inter vincla cicutæ
 Accusatori nolle dare. Plurima felix
 Paulatim vitia atque errores exiit omnes,
 Prima docet rectum Sapientia : quippe minuti
 Semper et infirmi est animi exiguique voluptas
 Ultio. Continuo sic collige, quod vindicta 191
 Nemo magis gaudet, quam femina. Cur tamen
 hos tu

Evasisse putes, quos diri conscia facti
 Mens habet attonitos et surdo verberare cædit
 Occultum, quatiente animo tortore flagellum ?

Pœna autem vehemens ac multo sævior illis,
Quas et Cædicius gravis invenit et Rhadamanthus,
Nocte dieque suum gestare in pectore testem.
Spartano cuidam respondit Pythia vates :
Haud impunitum quondam fore, quod dubitaret
Depositum retinere et fraudem jure tueri 201
Jurando : quærebat enim, quæ numinis esset
Mens et an hoc illi facinus suaderet Apollo ?
Reddidit ergo, metu, non moribus ; et tamen
omnem

Vocem adyti dignam templo veramque probavit
Exstinctus tota pariter cum prole domoque
Et, quamvis longa deductis gente, propinquis.
Has patitur pœnas peccandi sola voluntas.
Nam scelus intra se tacitum qui cogitat ullum,
Facti crimen habet. Cedo, si conata peregit? 210
Perpetua anxietas nec mensæ tempore cessat,
Faucibus, ut morbo, siccis interque molares
Difficili crescente cibo: sed vina misellus
Exspuit; Albani veteris pretiosa senectus
Displicet; ostendas melius, densissima ruga
Cogitur in frontem, velut acri ducta Falerno.
Nocte brevem si forte indulsit cura soporem
Et toto versata toro jam membra quiescunt:
Continuo templum et violati numinis aras
Et, quod præcipuis mentem sudoribus urget,
Te videt in somnis; tua sacra et major imago 221
Humana turbat pavidum cogitque fateri.
Hi sunt, qui trepidant et ad omnia fulgura pallent,
Quum tonat, exanimes primo quoque murmure
cœli;
Non quasi fortuitus, nec ventorum rabie, sed
Iratus cadat in terras et judicet ignis.
Illa nihil nocuit, cura graviore timetur

Proxima tempestas, velut hoc dilata sereno.
Præterea, lateris vigili cum febre dolorem
Si cœpere pati, missum ad sua corpora morbum
Infesto credunt a numine; saxa Deorum 231
Hæc et tela putant. Pecudem spondere sacello
Balantem et Laribus cristam promittere galli
Non audent: quid enim sperare nocentibus ægris
Concessum? vel quæ non dignior hostia vita?
Mobilis et varia est ferme natura malorum.
Quum scelus admittunt, superest constantia:
 quid fas
Atque nefas, tandem incipiunt sentire peractis
Criminibus. Tamen ad mores natura recurrit
Damnatos, fixa et mutari nescia. Nam quis 240
Peccandi finem posuit sibi? quando recepit
Ejectum semel adtrita de fronte ruborem?
Quisnam hominum est, quem tu contentum
 videris uno
Flagitio? Dabit in laqueum vestigia noster
Perfidus, et nigri patietur carceris uncum
Aut maris Ægæi rupem scopulosque frequentes
Exsulis magnis. Pœna gaudebis amara
Nominis invisi tandemque fatebere lætus,
Nec surdum, nec Tiresiam quemquam esse Deo-
rum.

SATIRA XIV.

ARGUMENTUM.

*Plurima sunt turpia, quæ parentes tam exemplis,
quam institutione ac præceptis liberos docent.
(13). Si illi oblectantur alea, vel delicate et mol-
liter viriut, vel servos inhumane tractant, etiam hi*

mature discunt ludere, epulari ac sævire. (4-25). *Filia adulteræ iisdem, quibus mater, amoribus indulget.* (25-30). *Nec mirum: natura enim ita comparatum est, ut in exemplis, præcipue parentum, maxima sit vis, et animus hominum magis ad vitia, quam ad virtutem inclinet.* (31-43). *Quæ quum ita sint, cave ne quidquam inhonesti et obsceni vel dicas vel facias coram liberis.* (44-49). *Qui si non oris tantum et corporis, sed animi quoque habitu moribusque tibi fuerint similes et exemplo tuo peccaverint, tuorum tibi conscius vitiorum eos castigare et punire non audebis.* (50-58). *Amicis ad cœnam invitatis omni opera eniteris, ut supellex lauta sit atque magnifica; illud vero non curas, ut filii domum a culpa quasi flagitiisque vacuam et probos mores, tamquam speculum, intueantur.* (59-69). *Bene de patria meretur, qui liberos ei gignit, modo curet, ut eidem utiles sint.* (70-72). *Plurimum vero interest, quibus illi moribus artibusque instituantur et quales sint parentes, quoniam ab his exempla sumunt et, quæ a teneris unguiculis discuntur, mentibus infixa hærent, quod vel animalium exempla probant: nam ciconiæ, vulturis et aquilæ pulli eandem, quam parentes, victus consuetudinem per totam vitam servant.* (73-85). *Similiter ædificatorem filius imitatur,* (86-95), *et parvuli Judæorum: nihil de superstitione, institutis moribusque paternis mutant.* (96-106). *Ita in reliquis quoque rebus sponte sua liberi vestigia parentum persequuntur: sola pecuniæ cupiditate inviti inscitique inflammantur, quoniam pater, ut virtutis eos specie fallat, quæ avaritia est, parsimoniam appellat tenerasque illorum mentes paulatim hujus vitii elementis imbuat.* (107-124). *Quæ si rite*

animis imbiberunt, extremas eos sordes docet, defraudans servos demensis suis, famemque sibi explens imucidis panis frustis et opsoniis æstu corruptis, quæ vel mendici respuerent. (125-134). Nullum vero vitium stultius est turpiusque avaritia: potestne enim quidquam esse absurdius, quam misere duriterque vivere, ut dives moriaris? (135-137). Præterea avarus, quo plura possidet, eo plura cupit et, quamvis agros agris adjiciat, vicinum, si non jure et pretio, certe injuria et fraudibus pellit, parum sollicitus, utrum bene, an male audiat. (138-155). Nec tamen divitiis suis vel corpus vel animum ægritudine levare potest. (156-160). Veteres Romani, ætate bellicę laboribus confecti, post tam egregie navatam reipublicę operam, binis jugeribus, præmii loco acceptis, contenti erant et pulte vivebant. (161-171). Nunc horti ampliores sunt, quam olim agri, et insatiabilis habendi cupiditas plurima veneficia, cædes et scelera cujuscumque generis gignit. (172-178). Prisci Marsi, Hernici ac Vestini frugalitatem agrique culturam filiis suis commendabant, tenuique victu vitam sustentare solebant. (178-188). Nostris contra temporibus et partes et nutrices parvulos omnibus iis artibus, etiam vilissimis, instruunt, e quibus lucrum possint facere, et diligenter iis inculcant illam poetę sententiam: unde habeas, quærît nemo, sed oportet habere. (189-200). Cur vero tantopere urges filium tuum, stultissime parens, ut mature parvus sit et pecunię avidus? Quam primum enim adoleverit, non est, quod dubites, quin te ipsum avaritia superet, et falsis testimoniis, perjuriis uxorisque cæde divitias quærat. (210-224). Horum scelerum ipse auctor es censendus:

quicumque enim malis artibus rem familiarem alicui augere permittit et stultum dicit esse, qui amicorum propinquorumque inopiæ subveniat, is quoque spoliare, decipere et quovis modo opes sibi acquirere docet ac suadet. (225-243) Filium itaque tuum adulta ætate inexplebilis, quæ eum incendisti, pecuniæ cupiditas in omne scelus rapiet, nec tibi ipsi parcat, si vita nimis longa votis ejus obstiterit. (244-255). Minus profecto jucundum nobis spectaculum præbent ludi scenici ludicræque artes, quam labores et pericula, quæ lucri causa avarus suscipit. (256-264). Periculosa quidem est ars petauristarum et funambulorum, sed ad vitam sustentandam spectat: avarus contra majori vitæ discrimine omnia percurrit maria, ut divitiis affluat. (265-283). Alii aliis modis insaniunt, sed nemo magis eo, qui lucri spe captus ne sæva quidem tempestate deterretur, quo minus se suæque omnia uni tabulæ committat. (284-295.) Quo fit persæpe, ut stultus ille homo, qui modo omni, quod usquam est, auro inhiabat, mox stipem colligat eique vix suppetant panni, quibus corpus velare possit. (296-302). Quam misera denique est avari conditio, qui divitias, quas, tantis sibi paravit curis periculisque, majore metu et sollicitudine custodit? Quanto felicior pauper, qui pauca quidem possidet, sed nihil cupit, et prudentiæ confidit, non fortunæ? (303-316). Quæ quum ita sint, auctor tibi sum, ut plura non concupiscas, quam quæ ad victum vitæque usum pertineant: ita enim tibi persuadeas velim, nulla divitiarum magnitudine expleri posse, qui rebus ad vivendum necessariis non sit contentus. (316-331).

PLURIMA sunt, Fuscine, et fama digna sinistra
 Et nitidis maculam hæsuram figentia rebus,
 Quæ monstrant ipsi pueris traduntque parentes.
 Si damnosa senem juvat alea, ludit et heres
 Bullatus parvoque eadem movet arma fritillo.
 Nec melius de se cuiquam sperare propinquo
 Concedet juvenis, qui radere tubera terræ,
 Boletum condire et eodem jure natantes
 Mergere ficedulas didicit nebulone parente
 Et cana monstrante gula. Quum septimus annus
 Transierit puero, nondum omni dente renato, 11
 Barbatos licet admoveas mille inde magistros,
 Hinc totidem, cupiet lauto cenare paratu
 Semper et a magna non degenerare culina.
 Mitem animum et mores modicis erroribus æquos
 Præcipit atque animas servorum et corpora nostra
 Materia constare putat paribusque elementis :
 An sævire docet Rutilus, qui gaudet acerbo
 Plagarum strepitu et nullam Sirena flagellis
 Comparat, Antiphates trepidi Laris ac Polyphe-
 mus, 20

Tum felix, quoties aliquis tortore vocato
 Uritur ardenti duo propter lintea ferro ?
 Quid suadet juveni lætus stridore catenæ,
 Quem mire afficiunt inscripta ergastula, carcer
 Rusticus ? Expectas, ut non sit adultera Largæ
 Filia, quæ nunquam maternos dicere mœchos
 Tam cito, nec tanto poterit contexere cursu,
 Ut non ter decies respiret ? Conscia matri
 Virgo fuit : ceras nunc hæc dictante pusillas
 Implet et ad mœchos* dat eisdem ferre cinædis. 30
 Sic natura jubet : velocius et citius nos

* *Mæchum* Heinr.

Corrumpunt vitiorum exempla domestica, magnis
Quum subeunt animos auctoribus. Unus et alter
Forsitan hæc spernant juvenes, quibus arte be-
nigna

Et meliore luto finxit præcordia Titan :
Sed reliquos fugienda patrum vestigia ducunt,
Et monstrata diu veteris trahit orbita culpæ.
Abstineas igitur damnandis : hujus enim vel
Una potens ratio est, ne crimina nostra sequantur
Ex nobis geniti ; quoniam dociles imitandis 40
Turpibus ac pravis omnes sumus, et Catilinam
Quocumque in populo videas, quocumque sub axe:
Sed nec Brutus erit, Bruti nec avunculus usquam.
Nil dictu fœdum visuque hæc limina tangat,
Intra quæ puer est. Procul hinc, procul inde
puellæ

Lenonum et cantus pernoctantis parasiti.
Maxima debetur puero reverentia. Si quid
Turpe paras, ne tu pueri contemseris annos :
Sed peccaturo obstat* tibi filius infans.
Nam si quid dignum Censoris fecerit ira 50
Quandoque et similem tibi se non corpore tantum
Nec vultu dederit, morum quoque filius et qui
Omnia deterius tua per vestigia peccet ;
Corripies nimirum et castigabis acerbo
Clamore ac post hæc tabulas mutare parabis !
Unde tibi frontem libertatemque parentis,
Quum facias pejora senex vacuumque cerebro
Jam pridem caput hoc ventosa cucurbita quærat ?
Hospite venturo, cessabit nemo tuorum.
Verre pavementum, nitidas ostende columnas, 60
Arida cum tota descendat aranea tela ;

* *Obsistat* Heinr.

Hic leve argentum, vasa aspera tergeat alter:
 Vox domini furit instantis virgamque tenentis.
 Ergo miser trepidas, ne stercore fœda canino
 Atria displiceant oculis venientis amici,
 Ne perfusa luto sit porticus; (et tamen uno
 Semodio scobis hæc emundat* servulus unus:)
 Illud non agitas, ut sanctam filius omni
 Aspiciat sine labe domum vitioque carentem?
 Gratum est, quod patriæ civem populoque dedisti,
 Si facis, ut patriæ sit idoneus, utilis agris, 71
 Utilis et bellorum et pacis rebus agendis.
 Plurimum enim intererit, quibus artibus et qui-

bus hunc tu

Moribus instituas. Serpente ciconia pullos
 Nutrit et inventa per devia rura lacerta:
 Illi eadem sumtis quærant animalia pinnis.
 Vultur, jumento et canibus crucibusque relictis,
 Ad fetus properat partemque cadaveris affert.
 Hic est ergo cibus magni quoque vulturis et æ
 Pascentis, propria quum jam facit arbore nidos. 80
 Sed leporem aut capream famulæ Jovis et ge-
 nerossæ

In saltu venantur aves: hinc præda cubili
 Ponitur: inde autem, quum se matura levarit†
 Progenies stimulante fame, festinat ad illam,
 Quam primum prædam rupto gustaverat ovo.

Ædificator erat Cetrionius et modo curvo
 Litore Caietæ, summa nunc Tiburis arce,
 Nunc Prænестinis in montibus alta parabat
 Culmina villarum, Græcis longeque petitis
 Marmoribus vincens Fortunæ atque Herculis
 sedem: 90

* *Emendat* Heinr.

† *Levabit* Heinr.

Ut spado vincebat Capitolia nostra Posides.
Dum sic ergo habitat Cetronius, imminuit rem,
Fregit opes, nec parva tamen mensura relictæ
Partis erat: totam hanc turbavit filius amens,
Dum meliore novas attollit marmore villas.

Quidam sortiti metuentem sabbata patrem,
Nil præter nubes et cœli numen adorant,
Nec distare putant humana carne suillam,
Qua pater abstinuit; mox et præputia ponunt:
Romanas autem soliti contemnere leges, 100
Judæicum ediscunt et servant ac metuunt jus,
Tradidit arcano quodcumque volumine Moses:
Non monstrare vias eadem nisi sacra colenti,
Quæsitum ad fontem solos deducere verpos.
Sed pater in causa, cui septima quæque fuit lux
Ignava et partem vitæ non attigit ullam.

Sponte tamen juvenes imitantur cetera: solam
Inviti quoque avaritiam exercere jubentur.
Fallit enim vitium specie virtutis et umbra,
Quum sit triste habitu vultuque et veste severum.
Nec dubie tanquam frugi laudatur avarus, 111
Tanquam parcus homo et rerum tutela suarum
Certa magis, quam si fortunas servet easdem
Hesperidum serpens aut Ponticus. Adde quod
hunc, de

Quo loquor, egregium populus putat acquirendi
Artificem: quippe his crescunt patrimonia fabris!
Sed crescunt quocumque modo majoraque fiunt
Incude assidua semperque ardente camino.
Et pater ergo animi felices credit avaros,
Qui miratur opes, qui nulla exempla beati 120
Pauperis esse putat: juvenes horatur, ut illam
Ire viam pergant et eidem incumbere sectæ.

Sunt quædam vitiorum elementa: his protenus
illos

Imbuit et cogit minimas ediscere sordes.

Mox acquirendi docet insatiabile votum.

Servorum ventres modio castigat iniquo,

Ipse quoque esuriens: neque enim omnia susti-
net unquam

Mucida cærulei panis consumere frusta,

Hesternum solitus medio servare minutal

Septembri, nec non differre in tempora cœnæ

Alterius conchem æstivam cum parte lacerti 131

Signatam vel dimidio putrique siluro,

Filaque sectivi numerata includere porri.

Invitatus ad hæc aliquis de ponte negabit.

Sed quo divitias hæc per tormenta coactas,

Quum furor hand dubius, quum sit manifesta
phrenesis,

Ut locuples moriaris, agentis vivere fato?

Interea pleno quum turget sacculus ore,

Crescit amor numi, quantum ipsa pecunia crevit;

Et minus hanc optat qui non habet. Ergo pa-
ratur 140

Altera villa tibi, quum rus non sufficit unum,

Et proferre libet fines, majorque videtur

Et melior vicina seges: mercaris et hanc et

Arbusta et densa montem qui canet oliva.

Quorum si pretio dominus non vincitur ullo,

Nocte boves macri lassoque famelica collo

Jumenta ad virides hujus mittentur aristas;

Nec prius inde domum, quam tota novalia sævos

In ventres abeant, ut credas falcibus actum.

Dicere vix possis, quam multi talia plorent 150

Et quot venales injuria fecerit agros.

Sed qui sermones! quam fœdæ buccina famæ!—

Quid nocet hæc ? inquit. Tunicam mihi malo
lupini,

Quam si me toto laudet vicinia pago,
Exigui ruris paucissima farra secantem.—
Scilicet et morbis et debilitate carebis
Et luctum et curam effugies, et tempora vitæ
Longa tibi post hæc fato meliore dabuntur,
Si tantum culti solus possederis agri,
Quantum sub Tatío populus Romanus arabat.
Mox etiam fractis ætate ac Punica passis 161
Prælia vel Pyrrhum immanem gladiosque Mo-
lossos

Tandem pro multis vix jugera bina dabantur
Vulneribus. Merces hæc sanguinis atque laboris
Nullis visa unquam meritis minor, aut ingratis
Curta fides patriæ. Saturabat glebula talis
Patrem ipsum turbamque casæ, qua feta jacebat
Uxor et infantes ludebant quatuor, unus
Vernula, tres domini: sed magnis fratribus horum
A scrobe vel sulco redeuntibus, altera cœna 170
Amplior et grandes fumabant pultibus ollæ.
Nunc modus hic agri nostro non sufficit horto.
Inde fere scelerum causæ; nec plura venena
Miscuit aut ferro grassatur sæpius ullum
Humanæ mentis vitium, quam sæva cupido
Indomiti* census: nam dives qui fieri vult,
Et cito vult fieri. Sed quæ reverentia legum,
Quis metus aut pudor est unquam propterantis
avari?

Vivite contenti casulis et collibus istis,
O pueri! Marsus dicebat et Hernicus olim 180
Vestinusque senex; panem quæramus aratro,

* *Immodici* Heinr.

Qui satis est mensis : laudant hoc numina ruris,
 Quorum ope et auxilio gratæ post munus aristæ
 Contingunt homini veteris fastidia quercus.
 Nil vetitum fecisse volet, quem non pudet alto
 Per glaciem perone tegi ; qui submovet Euros
 Pellibus inversis. Peregrina ignotaque nobis
 Ad scelus atque nefas, quæcumque est, purpura
 ducit.—

Haec illi veteres præcepta minoribus : at nunc
 Post finem auctumni media de nocte supinum 190
 Clamosus juvenem pater excitat ; Accipe ceras,
 Scribe, puer, vigila, causas age, perlege rubras
 Majorum leges aut vitem posce libello.
 Sed caput intactum buxo naresque pilosas
 Adnotet et grandes miretur Lælius alas.
 Diræ Maurorum attegias, castella Brigantum,
 Ut locupletem aquilam tibi sexagesimus annus
 Afferat : aut, longos castrorum ferre labores
 Si piget et trepidum solvunt tibi cornua ventrem
 Cum lituis audita, pares, quod vendere possis 200
 Pluris dimidio, nec te fastidia mercis
 Ullius subeant ablegandæ Tiberim ultra,
 Neu credas ponendum aliquid discriminis inter
 Unguenta et corium. Lucri bonus est odor ex re
 Qualibet. Illa tuo sententia semper in ore
 Versetur, Dis atque ipso Jove digna, poetæ :
 Unde habeas, quærit nemo ; sed oportet habere.—
 Hoc monstrant vetulæ pueris repentibus assæ ;
 Hoc discount omnes ante alpha et beta puellæ.
 Talibus instantem monitis quemcumque paren-
 tem

210

Sic possem affari : Dic, o vanissime, quis te
 Festinare jubet ? meliorem præsto magistro
 Discipulum. Securus abi : vinceris, ut Ajax

Præterit Telamonem, ut Pelea vicit Achilles.
 Parcendum est teneris: nondum implevere medullas

Maturæ mala nequitiae. Quum pectere barbam
 Cœperit et longi mucronem admittere cultri,
 Falsus erit testis, vendet perjurâ summa
 Exigua, et Cereris tangens aramque pedemque.
 Elatam jam crede nurum, si limina vestra 220
 Mortifera cum dote subit. Quibus illa premetur
 Per somnum digitis! nam quæ terraque marique
 Acquirenda putas, brevior via conferet illi.
 Nullus enim magni sceleris labor. Hæc ego nunquam

Mandavi, dices olim, nec talia suasi.
 Mentis causa malæ tamen est et origo penes te.
 Nam quisquis magni census præcepit amorem,
 Et lævo monitu pueros producit avaros,
 Et qui per fraudes patrimonia conduplicare
 Dat libertatem et totas effundit habenas 230
 Curriculo: quem si revoces, subsistere nescit
 Et te contempto rapitur metisque relictis.
 Nemo satis credit tantum delinquere, quantum
 Permittas: adeo indulgent sibi latius ipsi.
 Quum dicis juveni, stultum, qui donet amico,
 Qui paupertatem levet attollatque propinqui;
 Et spoliare doces et circumscribere et omni
 Crimine divitias acquirere, quarum amor in te,
 Quantum erat patriæ Deciorum in pectore, quantum

Dilexit Thebas, si Græcia vera, Menœceus: 240
 In quorum sulcis legiones dentibus anguis
 Cum clypeis nascuntur et horrida bella capessunt
 Continuo, tanquam et tubicen surrexerit una.
 Ergo ignem, cujus scintillas ipse dedisti,

Flagrantem late et rapientem cuncta videbis.
Nec tibi parceretur misero, trepidumque magistrum
In cavea magno fremitu leo tollet alumnus.

Nota mathematicis genesis tua: sed grave
tardas

Expectare colus. Morieris stamine nondum
Abrupto. Jam nunc obstat et vota moraris, 250
Jam torquet juvenem longa et cervina senectus.
Ocius Archigenen quære atque eme quod Mith-
ridates

Composuit, si vis aliam decerpere ficum
Atque alias tractare rosas. Medicamen habendum
est,

Sorbere ante cibum quod debeat et pater et rex.
Monstro voluptatem egregiam, cui nulla theatra,
Nulla æquare queas Prætoris pulpita lauti,
Si spectes, quanto capitis discrimine constant
Incrementa domus, aerata multus in arca
Fiscus et ad vigilem ponendi Castora numi, 260
Ex quo Mars Ultor galeam quoque perdidit et res
Non potuit servare suas. Ergo omnia Floræ
Et Cereris licet et Cybeles aulæa relinquo:
Tanto majores humana negotia ludi.

An magis oblectant animum jactata petauro
Corpora quique solet rectum descendere funem,
Quam tu, Corycia semper qui puppe moraris
Atque habitas, Coro semper tollendus et Austro,
Perditus ac vilis sacci mercator olentis:
Qui gaudes pingue antiquæ de litore Cretæ 270
Passum et municipes Jovis advexisse lagenas?
Hic tamen ancipiti figens vestigia planta
Victum illa mercede parat, brumamque famemque
Illa reste cavet: tu propter mille talenta
Et centum villas temerarius. Adspice portus

Et plenum magnis trabibus mare; plus hominum
est jam

In pelago; venit classis, quocumque vocarit
Spes lucri, nec Carpathium Gætulaque tantum
Æquora transiliet, sed, longe Calpe relicta,
Audiet Herculeo stridentem gurgite solem. 280
Grande operæ pretium est, ut tenso folle reverti
Inde domum possis tumidaque superbus aluta
Oceanî monstra et juvenes vidisse marinos.
Non unus mentes agitat furor. Ille sororis
In manibus vultu Eumenidum terretur et igni,
Hic bove percusso mugire Agamemnona credit
Aut Ithacum. Parcat tunicis licet atque lacernis
Curatoris eget qui navem mercibus implet
Ad summum latus et tabula distinguitur unda,
Quum sit causa mali tanti et discriminis hujus 290
Concisum argentum in titulos faciesque minutæ
Occurrunt nubes et fulgura: solvite funem,
Frumenti dominus clamat piperisque coemti;
Nil color hic cœli, nil fascia nigra minatur;
Æstivum tonat. Infelix hac forsitan ipsa
Nocte cadet fractis trabibus, fluctuque premetur
Obrutus et zonam læva morsuque tenebit.
Sed cujus votis modo non suffecerat aurum,
Quod Tagus et rutila volvit Pactolus arena,
Frigida sufficient velantes inguina panni 300
Exiguusque cibus, mersa rate naufragus assem
Dum rogat et picta se tempestate tuetur.

Tantis parta malis cura majore metuque
Servantur. Misera est magni custodia census.
Dispositis prædives hamis vigilare cohortem
Servorum noctu Licinus jubet, attonitus pro
Electro signisque suis *Phrygiaque* columna
Atque ebore et lata testudine. Dolia nudi.

Non ardent Cynici : si frigeris, altera fiet
 Cras domus, aut eadem plumbo commissamanebit.
 Sensit Alexander, testa quum vidit in illa 311
 Magnum habitatorem, quando felicior hic, qui
 Nil cuperet, quam qui totum sibi posceret orbem,
 Passurus gestis æquanda pericula rebus.
 Nullum numen habes,* si sit Prudentia : nos te,
 Nos facimus, Fortuna, Deam. Mensura tamen quæ
 Sufficiat census, si quis me consulat, edam :
 In quantum sitis atque fames et frigora poscunt,
 Quantum, Epicure, tibi parvis suffecit in hortis,
 Quantum Socratici ceperunt ante penates. 320
 Nunquam aliud Natura, aliud Sapientia dicit.
 Acribus exemplis videor te claudere. Misce
 Ergo aliquid nostris de moribus : effice summam,
 Bis septem ordinibus quam lex dignatur Othonis.
 Hæc quoque si rugam trahit extenditque labellum :
 Sume duos Equites, fac tertia quadringenta.
 Si nondum implevi gremium, si panditur ultra :
 Nec Cræsi fortuna unquam, nec Persica regna
 Sufficiant animo, nec divitiæ Narcissi,
 Indulsit Cæsar cui Claudius omnia, cujus 330
 Paruit imperiis, uxorem occidere jussus.

SATIRA XV.

ARGUMENTUM.

In hac Satira, ad Volusium Bithynicum scripta, Juvenalis gravissime invehitur in religiosam Ægyptiorum dementiam, qui non modo monstra Deorum, animalia et olera, sed etiam alii alia hujusmodi numina colant, et ob hanc religionis diversitatem tanto se invicem odio prosequantur, ut cæco non-

* Abest Heint.

numquam furore instincti eos, qui aliis utantur sacris, devorare non dubitent. (v. 1-13.) Quæ ne quis fabulosa esse censeat et similia iis, quæ Ulysses Alcinoos super cænam de Læstrygonum Cyclopumque immanitate et ἀνθρωποφάγῳ narraverit, (13-26.) exemplum memorat efferatissimæ hujus crudelitatis, quod sua ætas viderit, et refert, finitima oppida, Tentyra et Coptum, antiqua similitate, nullam aliam ob causam, quam quod diversa coluerint numina, ita arsisse, ut nuper Coptitæ cum Tentyritis, diem festum agentibus et larga meri potione oneratis, quo facilius victoria esset, jurgio contendendi occasionem inde ceperint, utque rixa primum conviciis ac clamore, deinde percussione capitum vulneribusque, pugnis et lapidibus inflictis, transacta, mox armis sumtis in prælium exarserit, in quo fugatis Coptitis, unus eorum, qui nimia formidine cursum præcipitans procubuerit, captus a Tentyritis et non modo in plurima sectus frustra et particulas, ut multis sufficeret, sed erudus etiam ac totus corrosis ossibus tanta aviditate devoratus sit, ut qui ex hostibus novissimi venerint, absumto jam toto corpore, ductis per terram digitis aliquid de sanguine ejus gustaverint. (27-92.) Tanta inhumanitate nullum unquam populum sævisse dicit: non Calaguritanos in Vasconum finibus, qui, longa demum obsidione ad diram redacti famem et ignari adhuc Stoicorum philosophiæ, vitam inhonesto modo, humanorum scilicet corporum lapidibus protraxerint: (93-114.) non Tauros, qui homines tantum immolaverint Dianæ, non etiam comederint; (115-119,) non Cimbro nec Britanno aut Sauromatas et Agathyrsos. (119-128.) Tum poeta acerbe inserebat inimicitiam et odium, quod feræ

*non nisi in dispar genus, homines autem in se ipsos
gerant, quodque prorsus contrarium sit naturæ,
quæ humano generi mollissima dederit corda, et
ceteris animalibus*

*Tantum animas, nobis animum quoque, mutus
ut nos*

*Affectus petere auxilium et præstare juberet.
(129-174.)*

Quis nescit, Volusi Bithynice, qualia demens
Ægyptus portenta colat? Crocodilon adorat
Pars hæc; illa pavet saturam serpentibus ibin.
Effigies sacri nitet aurea cercopitheci,
Dimidio magicæ resonant ubi Memnone chordæ
Atque vetus Thebe centum jacet obruta portis.
Illic cæruleos,* hic piscem fluminis, illic
Oppida tota canem venerantur, nemo Dianam.
Porrum et cæpe nefas violare et frangere morsu.
O sanctas gentes, quibus hæc nascuntur in hortis
Numina! Lanatis animalibus abstinet omnis 11
Mensa; nefas illic fetum jugulare capellæ:
Carnibus humanis vesci licet. Attonito quum
Tale super cœnam facinus narraret Ulixes
Alcinoo, bilem aut risum fortasse quibusdam
Moverat, ut mendax aretalogus. In mare nemo
Hunc abiecit, sæva dignum veraque Charybdi,
Fingentem immanes Læstrygonas atque Cyclopas?
Nam citius Scyllam vel concurrentia saxa
Cyaneas† plenos et tempestatibus utres 20
Crediderim, aut tenui percussum verbere Circes
Et cum remigibus grunnisse Elpenora porcis.
Tam vacui capitis populum Phæaca putavit?

* *Æluros*, Heinr.

† *Cyanea*, Heinr.

Sic aliquis merito nondum ebrius et minimum qui
 De Corcyræa temetum duxerat urna:
 Solus enim hoc Ithacus nullo sub teste canebat.
 Nos miranda quidem, sed nuper Consule Junio
 Gesta super calidæ referemus mœnia Copti,
 Nos vulgi scelus et cunctis graviora cothurnis.
 Nam scelus, a Pyrrha quanquam omnia syrmata
 volvas,

Nullus apud tragicos populus facit. Accipe, nostro
 Dira quod exemplum feritas produxerit ævo. 31

Inter finitimos vetus atque antiqua simultas,
 Immortale odium et nunquam sanabile vulnus
 Ardet adhuc, Coptos* et Tentyra. Summus
 utrinque

Inde furor vulgo, quod numina vicinorum
 Odit uterque locus, quum solos credat habendos
 Esse Deos, quos ipse colit. Sed tempore festo
 Alterius populi rapienda occasio cunctis
 Visa inimicorum primoribus ac ducibus, ne 40
 Lætum hilaremque diem, ne magnæ gaudia cœnæ
 Sentirent, positis ad templa et compita mensis
 Pervigilique toro, quem nocte ac luce jacentem
 Septimus interdum sol invenit. Horrida sane
 Ægyptus: sed luxuria, quantum ipse notavi,
 Barbara famoso non cedit turba Canopo.
 Adde, quod et facilis victoria de madidis et
 Blæsis atque mero titubantibus. Inde virorum
 Saltatus nigro tibicine, qualiscumque
 Unguenta et flores multæque in fronte coronæ:
 Hinc jejunum odium. Sed jurgia prima sonare 51
 Incipiunt animis ardentibus: hæc tuba rixæ.
 Dein clamore pari concurritur, et vice teli

* *Ombos* Heinr.

Sævit nuda manus : paucæ sine vulnere malæ :
 Vix cuiquam aut nulli toto certamine nasus
 Integer. Adspiceres jam cuncta per agmina vultus
 Dimidios, alias facies et hiantia ruptis
 Ossa genis, plenos oculorum sanguine pugnòs.
 Ludere se credunt ipsi tamen et pueriles
 Exercere acies, quod nulla cadavera calcent : 60
 Et sane quo tot rixantis millia turbæ,
 Si vivunt omnes ? Ergo acrior impetus, et jam
 Saxa inclinatis per humum quæsita lacertis
 Incipiunt torquere, domestica seditioni
 Tela ; nec hunc lapidem, quales et Turnus et Ajax,
 Vel quo Tydides percussit pondere coxam
 Æneæ ; sed quem valeant emittere dextræ
 Illis dissimiles et nostro tempore natæ.
 Nam genus hoc vivo jam decrescebat Homero.
 Terra malos homines nunc educat atque pusillos
 Ergo Deus, quicumque adspexit, ridet et odit. 71
 A diverticulo repetatur fabula. Postquam
 Subsidiis aucti, pars altera promere ferrum
 Audet et infestis pugnam instaurare sagittis ;
 Terga fugæ* celeri præstantibus omnibus, instant
 Qui vicina colunt umbrosæ Tentyra palmæ.
 Labitur hinc quidam, nimia formidine cursum
 Præcipitans, capiturque : ast illum in plurima
 sectum
 Frustra et particulas, ut multis mortuus unus
 Sufficeret, totum corrosis ossibus edit 80
 Victrix turba : nec ardenti decoxit æno
 Aut verubus : longum usque adeo tardumque
 putavit
 Expectare focos, contenta cadavere crudo.

* *Fuga* Heinr.

Hic gaudere libet, quod non violaverit ignem,
 Quem summa cœli raptum de parte Prometheus
 Donavit terris. Elemento gratulor et te
 Exsultare reor. Sed qui mordere cadaver
 Sustinuit, nil unquam hæc carne libentius edit.
 Nam scelere in tanto ne quæras et dubites, an
 Prima voluptatem gula senserit. Ultimus autem,
 Qui stetit absunto jam toto corpore, ductis 91
 Per terram digitis, aliquid de sanguine gustat.
 Vascones, hæc fama est, alimentis talibus olim
 Produxere animas: sed res diversa, sed illic
 Fortunæ invidia est bellorumque ultima, casus
 Extremi, longæ dira obsidionis egestas.
 Hujus enim, quod nunc agitur, miserabile debet
 Exemplum esse cibi: sicut modo dicta mihi gens
 Post omnes herbas, post cuncta animalia, quidquid
 Cogebat vacui ventris furor, hostibus ipsis 100
 Pallorem ac maciem et tenues miserantibus artus,
 Membra aliena fame lacerabant, esse parati
 Et sua. Quisnam hominum veniam dare, quisve
 Deorum

Viribus abnuerit dira atque immania passis,
 Et quibus illorum poterant ignoscere manes,
 Quorum corporibus vescebantur? Melius nos
 Zenonis præcepta monent: nec enim omnia, quæ-
 dam

Pro vita facienda putat. Sed Cantaber unde
 Stoicus, antiqui præsertim ætate Metelli?
 Nunc totus Graias nostrasque habet orbis Athenas.
 Gallia causidicos docuit facunda Britannos: 111
 De conducendo loquitur jam rhetore Thule.
 Nobilis ille tamen populus, quem diximus, et par
 Virtute atque fide, sed major clade, Saguntus
 Tale quid e cusat. Mæotide sævior ara

Ægyptus: quippe illa nefandi Taurica sacri
Inventrix homines (ut jam, quæ caruina tradunt,
Digna fide credas) tantum immolat, ulterius nil
Aut gravius cultro timet hostia. Quis modo casus
Impulit hos? quæ tanta fames infestaque vallo? 120
Arma coegerunt tam detestabile monstrum
Audere? Anne aliam, terra Memphitide sicca,
Invidiam facerent nolenti surgere Nilo?
Qua nec terribiles Cimbri, nec Britones unquam,
Sauromatæ* truces aut immanes Agathyrsi,
Hac sævit rabie imbellæ et inutile vulgus,
Parvula fictilibus solitum dare vela phaselis
Et brevibus pictæ remis incumbere testæ.
Nec pœnam scelerei invenies, nec digna parabis
Supplicia his populis, in quorum mente pares
sunt 130

Et similes ira atque fames. Mollissima corda
Humano generi dare se Natura fatetur,
Quæ lucrumas dedit: hæc nostri pars optima
sensus.

Plorare ergo iubet casum lugentis amici
Squaloremque rei, pupillum ad jura vocantem
Circumscriptorem, cujus manantia fletu
Ora puellares faciunt incerta capilli.
Naturæ imperio gemimus, quum funus adultæ
Virginis occurrit vel terra clauditur infans
Et minor igne rogi. Quis enim bonus et face
dignus 140

Arcana, qualem Cereris vult esse sacerdos,
Ulla aliena sibi credat mala? Separat hoc nos
A grege mutorum, atque ideo venerabile soli
Sortiti ingenium divinorumque capaces

* *Sauromatæque* Heinr.

Atque exercendis capiendisque artibus apti
 Sensum a coelesti demissum traximus arce,
 Cujus egent prona et terram spectantia. Mundi
 Principio indulsit communis conditor illis
 Tantum animas, nobis animum quoque, mutuas
 ut nos

Affectus petere auxilium et præstare juberet, 150
 Dispersos trahere in populum, migrare vetusto
 De nemore et proavis habitatas relinquere silvas;
 Ædificare domos, Laribus conjungere nostris
 Tectum aliud, tutos vicino limine somnos
 Ut collata daret fiducia; protegere armis
 Lapsum aut ingenti nutantem vulnere civem,
 Communi dare signa tubæ, defendier isdem
 Turribus atque una portarum clave teneri.
 Sed jam serpentum major concordia: parcit
 Cognatis maculis similis fera. Quando leoni 160
 Fortior eripuit vitam leo? quo nemore unquam
 Expiravit aper majoris dentibus apri?
 Indica tigris agit rabida cum tigride pacem
 Perpetuam: sævis inter se convenit ursis.
 Ast homini ferrum letale incude nefanda
 Produxisse parum est; quum rastra et sarcula
 tantum

Adsueta coquere et marris ac vomere lassi
 Nescierint primi gladios extundere* fabri.
 Adspicimus populos, quorum non sufficit iræ
 Occidisse aliquem: sed pectora, brachia, vultum
 Crediderint genus esse cibi. Quid diceret ergo, 171
 Vel quo non fugeret, si nunc hæc monstra videret
 Pythagoras, cunctis animalibus abstinuit qui
 Tanquam homine et ventri indulsit non omne
 legumen?

* *Extendere* Heinr.

SATIRA XVI.

ARGUMENTUM.

Conditionem militum multis partibus meliorem, quam paganorum, esse ostenditur, (v. 1-6.) quod illi ab his non facile ullam accipiant injuriam eamque impune iis inferre possint, quum proprios habeant iudices, et lege Camilli extra vallum litigare velentur, commilitones autem non modo reum per fas ac nefas tueantur, sed damnatum quoque vindicent; (7-34) quod confestim iis, et quoties lubeat, jus dicatur, et neque initium, neque finis litium in longinquum differatur tempus; (35-50.) quod peculium iis sit castrense, et hinc jus testandi vivo adhuc patre; (51-56.) quod phaleras, torques aliaque virtutis præmia consequantur, quum ipsius ducis referat, et honorari milites et locupletari. (56-60.)

QUIS numerare queat felicitis præmia, Galle,
 Militiæ? Nam* si subeuntur prospera castra,
 Me pavidum excipiat tironem porta secundo
 Sidere. Plus etenim fati valet hora benigni,
 Quam si nos Veneris commendet epistola Marti
 Et Samia genitrix quæ delectatur arena.

Commoda tractemus primum communia: quo-
 rum
 Haud minimum illud erit, ne te pulsare togatus
 Audeat; immo etsi pulsetur, dissimulet, nec
 Audeat excussos Prætori ostendere dentes 10
 Et nigram in facie tumidis livoribus offam

* Quod Heinr.

Atque oculum, medico nil promittente, relictum.
 Bardaeus judex datur hæc punire volenti
 Calceus et grandes magna ad subsellia suræ,
 Legibus antiquis castrorum et more Camilli
 Servato, miles ne vallum litiget extra
 Et procul a signis. Justissima Centurionum
 Cognitio est igitur de milite; nec mihi deerit
 Ultio, si justæ defertur causa querelæ.

Tota cohors tamen est inimica, omnesque mani-
 pli 20

Consensu magno efficiunt, curabilis ut sit
 Vindicta gravior, quam injuria. Dignum erit ergo
 Declamatoris mulino corde Vagelli,
 Quum duo crura habeas, offendere tot caligas, tot
 Millia clavorum. Quis tam procul absit ab Urbe
 Præterea? quis tam Pylades, molem aggeris ultra
 Ut veniat? Lacrumæ siccentur protenus, et se
 Excusaturos non sollicitemus amicos,
 Da testem, judex quum dixerit. Audeat ille,
 Nescio quis, pugnos qui vidit, dicere, Vidi? 30
 Et credam dignum barba dignumque capillis
 Majorum. Citius falsum producere testem
 Contra paganum possis, quam vera loquentem
 Contra fortunam armati contraque pudorem.

Præmia nunc alia atque alia emolumenta note-
 mus


Sacramentorum. Convallem ruris aviti
 Improbis aut campum mihi si vicinus ademit
 Et sacrum effodit medio de limite saxum,
 Quod mea cum vetulo* coluit puls annua libo;
 Debitor aut sumtos pergit non reddere numos, 40
 Vana supervacui dicens chirographa ligni:

* *Patulo* Heinr.

Expectandus erit, qui lites inchoet, annus
Totius populi: sed tunc quoque mille ferenda
Tædia, mille moræ; toties subsellia tantum
Sternuntur; jam facundo ponente lacernas
Cædicio et Fusco jam micturiente, parati
Digredimur; lentaque fori pugnamus arena.
Ast illis, quos arma tegunt et balteus ambit,
Quod placitum est ipsis, præstatur tempus agendi,
Nec res atteritur longo sufflamine litis. 50

Solis præterea testandi militibus jus
Vivo patre datur: nam, quæ sunt parta labore
Militiæ, placuit non esse in corpore census,
Omne tenet cujus regimen pater. Ergo Coranum
Signorum comitem castrorumque sera merentem,
Quamvis jam tremulus, captat pater. Hunc labor
æquus

Provehit et pulcro reddit sua dona labori.
Ipsius certe ducis hoc referre videtur,
Ut, qui fortis erit, sit felicissimus idem,
Ut læti phaleris omnes et torquibus omnes. 60



A. PERSII FLACCI

SATIRÆ VI.



A. PERSII FLACCI VITA

QUÆ VULGO TRIBUITUR SUETONIO.

A. PERSIUS FLACCUS natus est pridie nonas Decembris, Fabio Persico, L. Vitellio coss.* Deceßit viii. kalendas Decembris, P. Mario, L. Asinio Gallo coss.†

Natus in Etruria Volaterris, eques Romanus, sanguine et affinitate primi ordinis viris conjunctus, deceßit ad octavum milliarium via Appia, in prædiis suis. Pater ejus Flaccus pupillum reliquit moriens, annorum fere sex. Fulvia Sisennia mater nupsit postea Fusio, equiti Romano: et eum quoque extulit intra paucos annos. Studuit Flaccus usque ad annum xii. Volaterris: inde Romæ apud grammaticum Remmiam Palæmonem, et apud rhetorem Virginium Flavum. Quum esset annorum xvi. amicitia cœpit uti Annæi Cornuti, ita ut ab eo nusquam discederet: a quo inductus aliquatenus in philosophiam est. Sed mox ut a schola et magistris diverterat, lecto libro Lucilii decimo, vehementer Satiras componere studuit: cujus libri principium imitatus est, sibi primo, mox omnibus detrectaturus, cum tanta recentium poetarum et oratorum insectatione, ut etiam Neronem culpaverit. *Cuju ver* -

* A. ab V. C. 787, a C. N. 34, d. 4 Dec.

† A. ab V. C. 815. a C. N. 62, d. 24 Nov.

sus in Neronem quum ita se haberet: *Aurículas asini Mida rex habet*: in hunc modum a Cornuto, ipso nondum mortuo, est emendatus: *Aurículas asini quis non habet?* ne hoc Nero in se dictum arbitraretur. Amicos habuit a prima adolescentia Cæsium Bassum, poetam, et Calpurnium Suram, qui eo vivo juvenis decessit. Coluit ut patrem Servillum Nonianum. Per Cornutum cognovit Annæum etiam Lucanum, æquævum, auditorem Cornuti. Nam Cornutus illo tempore tragicus fuit, sectæ Stoicæ, qui libros philosophiæ reliquit. Sed Lucanus adeo mirabatur scripta Flacci, ut vix retineret se, illo recitante, a clamore. [quin illa vera esse poemata diceret]. Sero cognovit Senecam, sed non ut caperetur ejus ingenio. Usus est apud Cornutum duorum convictu doctissimorum et sanctissimorum virorum, acriter tum philosophantium, Claudii Agathemerii, medici Lacedæmonii, et Petronii Aristocratis, Magnetis, quos unice miratus est et æmulatus, quum æquales essent, et Cornuti minores. Ipse etiam decem fere annis summe dilectus a Pæto Thrasea est, ita ut peregrinaretur quoque cum eo aliquando, cognatam ejus Arriam uxorem habente. Fuit morum lenissimorum, verecundiæ virginalis, formæ pulchræ, pietatis erga matrem et sororem et amitam exemplo sufficientis. Fuit frugi et pulicus. Reliquit circa sestertium vicies matri et sorori: scriptis tamen ad matrem codicillis rogavit, ut daret Cornuto sestertia, ut quidam, centum; ut alii volunt, plus, et argenti facti pondus viginti, et libros circa septingentos, sive bibliothecam suam omnem. Verum Cornutus sublatiis libris, pecuniam sorori et matri, quas heredes

fecerat, reliquit. Et raro, et tarde scripsit. Hunc ipsum librum imperfectum reliquit. Versus aliqui demti sunt ultimo libri, ut quasi finitus esset. Leviter retractavit Cornutus, et Cæsio Basso petenti ut ipse ederet, tradidit edendum. Scripsit etiam in pueritia Flaccus prætextam, et *Ὀδοιπορικῶν* librum unum, et paucos uxori Thrasæ in Arriam matrem versus, quæ se ante virum occiderat. Omnia autem ea Cornutus auctor fuit matri ejus ut aboleret. Editum librum continuo mirari homines et diripere cœperunt. Decessit autem vitio stomachi, anno ætatis xxix.

1

2

SATIRA PRIMA.

Nec fonte labra prolui caballino,
Nec in bicipiti somniasse Parnasso
Memini, ut repente sic poeta prodirem;
Heliconidasque pallidamque Pirenem
Illis relinquo, quorum imagines lambunt
Hederæ sequaces: ipse temipaganus
Ad sacra vaturn carmen affero nostrum.
Quis expedit psittaco suum Xaipe!
Picasque docuit nostra verba conari?
Magister artis ingenique largitor,
Venter, negatas artifex sequi voces.
Quod si dolosi spes refulerit nummi,
Corvos poetas et poetrias picas
Cantare credas Pegaseium nectar.

O CURAS hominum! o quantum est in rebus inane!
 Quis leget hæc! **A**min! tu istud ais? Nemo hercule!
A Nemo!
 Vel duo, vel nemo. **A** Turpe et miserabile! **Q**uare?
 Ne mihi Polydamas et Troiades Libeone
 Prætulertur? Nugæ! Non, si quid turbida Roma
 Elevet, accedas, examenque improbum in illa

Castiges trutina, nec te quæserveris extra.

Mal. Nam Romæ est quis non? At si fas dicere! Sed fas est. *17*
Tunc, quum ad canitiem et nostrum istud vivere
triste

Adspexi, ac nucibus facimus quæcumque relictis,
Quum sapimus patruos: tunc, tunc, ignoscite.

A. Nolo. I want admit the Calceus
Quid faciam? Sed sum petulant splende cachinno.

inclusus
moneris
archilanus Scribimus, inclusus numero ille, hic pede liber,
Grande aliquid, quod pulmo animæ prælargus
anhelet.

Scilicet hæc populo, pexusque togaque recenti,

Et natalitia tandem cum sardonyche albus,

Sede legens celsa, liquido quum plasmate guttur

Mobile colluerit, patranti fractus oculo.

Heic neque more probo videas neque voce serena

Ingentes trepidare Titos, quum carmina lumbum

Intrant, et tremulo scalpuntur ubi intima versu.

Tun' vetule auriculis alienis colligis escas,

Auriculis, quibus et dicas cute perlitus: ohe!—

Quid didicisse, nisi hoc fermentum et quæ semel
intus

Innata est, rupto jecore exierit caprificus?

En pallor seniumque!—o mores! usque adeone

Scire tuum nihil est, nisi, te scire hoc, sciat alter?

*At pulchrum est, digito monstrari, et dicier, hic
est!*

Ten' cirratorum centum dictata fuisse

Pro nihilo pendas? Ecce inter pocula quærant

Romulidæ saturi, quid dia poemata narrent.

Heic aliquis, cui circum humeros hyacinthina *†*

læna est,

Rancidulum quiddam balba de nare locutus,

Phyllidas, Hypsipylas, vatium et plorabile si quid,

Elignat, et tenero supplantat verba palato.

Amensere viri. Nunc non cinis ille poetæ

Non levior cippus nunc imprimit ossa?

Latuit convivæ. Nunc non e manibus illis,

Nunc non e tumulto fortunataque favilla

Nascentur violæ? *Rides, ait, et nimis uncis*

Naribus indulges. An erit, qui velle recuset

Os populi meruisse, et, cedro digna locutus,

Linquere nec scombros metuentia carmina nec thus?

Quisquis es, o modo quem ex adverso dicere feci,

Non ego, quum scribo, si forte quid aptius exit,

Quando hæc rara avis est, si quid tamen aptius
exit,

Laudari metuum: neque enim mihi cornea fibra
est:

Sed recti finemque extremumque esse recuso

Enge tuum et belle. Nam belle hoc excute totum:

Quid non intus habet? non heic est Ilias Acci

Ebria veratro? non si qua elegidia crudi

Dictarunt procæres? non quidquid denique lectis

Scribitur in citreis? Calidum scis ponere sumen:

Sis comitem horridulum trita donare lacerna:

Et, "Verum," inquis, "amo: verum mihi dicito
de me."

Quipote? vis dicam? "nugaris, quum tibi, calve,
Pinguis aqualiculus propenso sesquipede exstet."

O Jane, a tergo quem nulla ciconia pinsit,

Nec manus auriculas imitata est mobilis albas,

Nec linguae, quantum sitiât canis Appula, tantum!

Vos o patricius sanguis, quos vivere fas est

Occipiti cæco, posticæ occurrere sannæ!

*Quis populi sermo est? quis enim? nisi carmina
molli*

Nunc demum numero fluere, ut per læve severos

Effundat junctura ungues. "Scit tendere versum
Non secus, ac si oculo rubricam dirigat uno.
Sive opus in mores, in luxum, an prandia regum
Dicere, res grandes nostro dat Musa poetæ."

Ecce modo heroas sensus afferre videmus
Nugari solitos Græce, nec ponere lucum
Artifices, nec rus saturum laudare, ubi corbes,
Et focus, et porci, et fumosa Palilia sæno:
Unde Remus, sulcoque terens dentalia, Quincti,
Quum trepida ante boves dictatorem induit uxor,
Et tua aratra domum lictor tulit. Euge poeta!

Est nunc, Briseis quem venosus liber Atti,
Sunt, quos Pacuviusque et verrucosa moretur
Antiopa, ærumnis cor luctificabile fulta.
Hos pueris monitus patres infundere lippos
Quum videas, quærisne, unde hæc sartago lo-
quendi

Venerit in linguas? unde istud dedecus, in quo
Trossulus exultat tibi per subsellia lævis?

Nilne pudet, capiti non posse pericula cano
Pellere, quin tepidum hoc optes audire, decenter?

665! "Fur es," ait Pedio. Pedius quid? Crimina rasis
Librat in antithetis. Doctas posuisse figuras
Laudatur. "Bellum hoc!" Bellum est? an Ro-
mule ceves?

Men' moveat? quippe et, cantet si naufragus, assem
Protulerim? Cantas, quum fracta te in trabe
pictum

Ex humero portes? Verum, nec nocte paratum
Plorabit, qui me volet incurvasse querela.

Sed numeris decor est et junctura addita crudis.
Claudere sic didicit versum: Berecynthus Atyis,
Et: qui cæruleum dirimebat Nerea delphin,
Sic: costam longo subduximus Apennino.

Arma virum! Nonne hoc spumosum et cortice
pingui.

Ut ramale vetus vegrandi subere coctum?

Quidnam igitur tenerum, et laxa cervice legendum
est?

Torva Mimalloneis inplerunt cornua bombis:

Et raptum vitulo caput ablatura superbo

Bassaris, et lyncem Mænas flexura corymbis

Euion ingeminat: reparabilis adsonat Echo.

Hæc fierent, si testiculi vena ulla paterni

Viveret in nobis? summa delumbe saliva

Hoc natat in labris, et in udo est Mænas et Atys,

Nec pluteum cædit, nec demorsos sapit ungues.

Sed quid opus, teneras mordaci radere vero

Aurículas? vide sis, ne majorum tibi forte

64] *Limina frigescant: sonat heic de nare canina*

Litera.—Per me equidem sint omnia protinus alba,

Nil moror. Euge! omnes etenim bene miræ erit-
tis res.

Hoc iuvat. *Heic, inquis, veto quisquam faxit ole-
tum!*—

Pinge duos angues: pueri, sacer est locus: extra

Meiite! Discedo.—

Secuit Lucilius Urbem,

Te Lupe, te Muti, et genuinum fregit in illis.

Omne vafer vitium ridenti Flaccus amico

Tangit, et admissus circum præcordia ludit,

Callidus, excusso populum suspendere naso.

Men' mutire nefas? nec clam, nec cum scrobe?

Nusquam.

Heic tamen infodiam: "Vidi, vidi ipse, libelle,

Aurículas asini Mida rex habet." Hoc ego oper-
tum,

Hoc ridere meum, tam nil, nulla tibi vendo

Iliade. Audaci quicunque afflate Cratino,
 Iratum Eupolidem prægrandi cum sene palles,
 Adspice et hæc, si forte aliquid decoctius audis.
 Inde vaporata lector mihi ferveat aure:
 Non hic, qui in crepidas Graiorum ludere gestit
 Sordidus, et lusco qui possit dicere: lusce!
 M. 64 } Sese aliquem credens, Italo quod honore supinus
 } Fregerit heminas Areli ædilis iniquas:
 Nec qui abaco numeros et secto in pulvere metas
 Scit risisse vafer, multum gaudere paratus,
 Si Cynico barbam petulans nonaria vellat.
 His mane Edictum, post prandia Callirhoen do.

SATIRA II.

AD PLOTIUM MACRINUM.

HUNC, Macrine, diem numera meliore lapillo,
 Qui tibi labentes apponit candidus annos.
 Funde merum Genio. Non tu prece poscis emaci,
 Quæ nisi seductis nequeas committere divis.
 At bona pars procerum tacita libabit acerra.
 Haud cuivis promptum est, murmurque humi-
 lesque susurros
 Tollere de tēplis, et aperto vivere voto.
 Mens bona, fuma, fides! hæc clare, et ut audiat
 hospes:
 Illa sibi introrsum et sub lingua immurmurat:
 O si
 Ebullit patrui præclarum funus! et, O si

*Sub rastro crepet argenti mihi seria, dextro
Hercule! pupillumve utinam, quem proximus heres
Impello, expungam! namque est scabiosus, et acri
Bile tumet. Nerio jum tertia ducitur uxor!*

Hæc sancte ut poscas, Tiberino in gurgite mergis
Mane caput bis terque, et noctem flumine purgas.

Heus age, responde: minimum est, quod scire
laboro,

De Jove quid sentis? estne ut præponere cures
Hunc cuiquam? *cuinam?* vis Stalo? an sollicit
hæres,

Quis potior judex, puerisve quis aptior orbis?
Hoc igitur, quo tu Jovis aurem impellere tentas,
Dic agedum Stalo—"pro Jupiter! o bone," clamet,
"Jupiter!" at sese non clamet Jupiter ipse?

Ignovisse putas, quia, quum tonat, ocus illex
Sulfure discutitur sacro, quam tuque domusque?

An quia non fibris ovium Ergennaque jubente

Triste jaces lucis evitandumque bidental,

Idcirco stolidam præbet tibi vellere barbam

Jupiter?—aut quidnam est, qua tu mercede deo-
rum

Emeris auriculas?—pulmone et lactibus unctis?—

Ecce avia, aut metuens divum matertera, cunis

Exemit puerum, frontemque atque uda labella

Infami digito et lustralibus ante salivis

Expiat, urentes oculos inhibere perita.

Tunc manibus quatit, et spem macram supplice
voto

Nunc Licini in campos, nunc Crassi mittit in ædes.

Hunc optent generum rex et regina! puellæ

Hunc rapiant! quidquid calcaverit hic, rosa fiat!

Ast ego nutrici non mando vota: negato

Jupiter hæc illi, quamvis te albata rogarit.

Poscis opem nervis corpusque fidele senectæ.
 Esto, age!—sed pingues patinæ tinctæque crassa
 Annuere his Superos vetuere, Jovemque moran-
 tur.

6 65 Rem struere exoptas cæso bove, Mercuriumque
 Accersis fibra: *Da fortunare penates!*
Da pecus, et gregibus fetum!—quo, pessime, pacto,
 Tot tibi quum in flammæ juncum omenta liques-
 cant?

Attamen hic extis et opimo vincere ferto
 Intendit: *jam crescit ager, jam crescit ovile,*
Jam dabitur: jam jam! donec deceptus et exspes
 Nequidquam fundo suspiret nummus in imo.

Si tibi crateras argenti incusaque pingui
 71 Auro dona feram, sudes, et pectore lævo
 Executiat guttas lætari prætrepidum cor.
 Hinc illud subiit, auro sacras quod ovato
 45. r. Perducis facies. *Nam fratres inter aenos,*
 4. *Somnia pituita qui purgatissima mittunt,*
Præcipui sunt, silque illis aurea barba.

Aurum vasa Numæ Saturniaque impulit æra,
 Vestalesque urnas et Tuscum fictile mutat.
 O curvæ in terris animæ, et cælestium inanes!
 Quid juvat, hos templis nostros immittere mores,
 Et bona dis ex hac scelerata ducere pulpa?
 Hæc sibi corrupto casiam dissolvit olivo:
 Hæc Calabrum coxit vitiatæ murice vellus:
 Hæc baccam conchæ rasisse, et stringere venas
 Ferventis massæ crudo de pulvere jussit.
 Peccat et hæc, peccat: vitio tamen utitur. At vos
 Dicite, pontifices, in sacro quid facit aurum?
 Nempe hoc, quod Veneri donatæ a virgine puppæ.

Quum damus id Superis, de magna quod dare
 lance

Non possit magni Messalæ lippa propago:
 Compositum jus fasque animo, sanctosque recessus
 Mentis, et incoctum generosum pectus honesto.
 Hæc cedo ut admoveam templis, et farre litabo.

SATIRA III.

"NEMPE hoc adsidue? jam clarum mane fenestras

"Intrat, et angustas extendit lumine rimas.

"Sertimus, indomitum quod despumare Faler-
 num

"Sufficiat, quinta dum linea tangitur umbra.

"En quid agis? siccas insana canicula menses

"Jam dudum coquit, et patula pecus omne sub
 ulmo est."

Unus ait comitum. *Verumne? itane? ocius adsit
 Huc aliquis! nemon'!* Turgescit vitrea bilis.

Finditur: Arcadiæ pecuaria rudera dicas.

766 Jam liber et bicolor positis membrana capillis,
 Inque manus chartæ nodosaque venit arundo.
 Tunc queritur, crassus calamo quod pendeat
 humor;

Nigra quod infusa vanescat sepiæ lympha;

Dilutas queritur gemit quod fistula guttas.

10 O miser inque dies ultra miser! huccine rerum
 Venimus? at cur non potius, teneroque palumbo
 Et similis regum pueris, pappare minutum
 Poscis, et iratus mammæ lallare recusas?

M. 63

An tali studeam calamo? Cui verba? quid istas
 Succinis ambages? tibi luditur: effluvis amens.
 Contemnere: sonat vitium percussa, maligne
 Respondet viridi non cocta fidelis limo.
 Udum et molle lutum es, nunc nunc properandus,
 et acri

Fingendus sine fine rota. Sed rure paterno
 Est tibi far modicum, purum et sine labe salinum;
 (Quid metuas?) cultrixque foci securo patella.

Hoc satis? an deceat pulmonem rumpere ventis,
 Stemmata quod Tusco ramum millesime ducis,
 Censoremque tuum vel quod trabeate salutas?
 Ad populum phaleras. Ego te intus et in cute novi.
 Non pudet ad morem discincti vivere Nattæ?
 Sed stupet hic vitio, et fibris increvit opimum
Pingue: caret culpa: nescit, quid perdat: et alto
 Demersus, summa rursus non bullit in unda.

Magne pater divum, sævos punire tyrannos
 Haud alia ratione velis, quam dira libido
 Moverit ingenium, ferventi tincta veneno,
 Virtutem ut videant, intabescantque relictæ.
 Anne magis Siculi gemuerunt æra juvenci,
 Aut magis auratis pendens laquearibus ensis
 Purpureas subter cervices terruit, imus,
Imus præcipites, quam si sibi dicat, et intus
 Palleat infelix, quod proxima nesciat uxor?

Sæpe oculos, meminini, tangebam parvus olivo,
 Grandia si nollem morituri verba Catonis
 Discere, ab insano multum laudanda magistro,
 Quæ pater adductis sudans audiret amicis.
 Jure etenim id summum, quid dexter senio ferret,
 Scire erat in voto: damnosa canicula quanti m
 Radet: angustæ collo non fallier oræ:
 Neu quis callidior buxum torquere flagello.

Haud tibi inexpertum est, curvos deprendere
mores,

Quæque docet sapiens braccatis illita Medis
Porticus, insomnis quibus et detonsa juvenus
Invigilat, siliquis et grandi pasta polenta ;

Et tibi quæ Samios diduxit litera ramos, Y
Surgentem dextro monstravit limite callem.

Stertis adhuc? lassumque caput compage soluta
Oscitat hesternum, dissutis undique malis?

Est aliquid quo tendis, et in quod dirigis arcum?
An passim sequeris corvos testaque lutoque,
Securus quo pes ferat, atque ex tempore vivis?

Helleborum frustra, quum jam cutis ægra tu-
mebit,

Poscentes videas. Venienti occurrite morbo,
Et quid opus, Cratero magnos promittere montes?
Discite et, o miseri, causas cognoscite rerum!

Quid sumus, et quidnam victuri gigni'mur? ordo
Quis datus, aut metæ quam mollis flexus, et unde?
Quis modus argento? quid fas optare? quid asper
Utile numus habet? patriæ carisque propinquis
Quantum elargiri deceat? quem te deus esse
Jussit, et humana qua parte locatus es in re
Disce, neque inideas, quod multa fidelia putet
In locuplete peno, defensis pinguibus Umbris,
Et piper, et perna, Marsi monumenta clientis,
Mænaque quod prima nondum defecerit orca.

Heic aliquis de gente hircosa centurionum
Dicat: Quod sapio, satis est mihi: non ego curo
Esse, quod Arcesilas ærumnosique Solones,
Obstipo capite, et figentes lumine terram,
Murmura quum secum et rabiosa silentia rodunt,
Atque exporrecto trutinantur verba labello,
Ægroti veteris meditantur somnia: gigni

De nihilo nihil, in nihilum nil posse reverti.

Hoc est, quod palles? cur quis non prandeat, hoc est?

His populus ridet: multumque torosa juvenus
Ingeminat tremulos naso crispante cachinnos.

Inspice: nescio quid trepidat mihi pectus, et ægris

Faucibus exsuperat gravis halitus; inspicere sodes:

Qui dicit medico, jussus requiescere, postquam

Tertia compositas vidit nox currere venas,

De maiore domo modice sitiante lagena

Lenia loturo sibi Surrentina rogarit.

"Heus bone, tu palles." *Nihil est.* "Videas tamen istud,

"Quidquid id est: surgit tacite tibi lutea pellis."

At tu deterius palles: ne sis mihi tutor:

Jam pridem hunc sepeli: tu restas. "Perge, tacebo."

Turgidus hic epulis atque albo ventre lavatur,

Guttore sulfureas lente exhalante mephites.

Sed tremor inter vina subit, calidumque trientem

Excudit e manibus: dentes crepuere relecti:

Uncta cadunt laxis tunc pulmentaria labris.

Hinc tuba, candelæ: tandemque beatulus alto

Compositus lecto, crassisque lutatus amomis.

In portam rigidos calces extendit: at illum

Hesterni capite induto subiere Quirites.

"Tange miser venas, et pone in pectore dextram!"

Nil calet heic. "Summosque pedes adtinge manusque."

• *Non frigent.*—Visa est si forte pecunia, sive

Candida vicini subrisit molle puella,

Cor tibi rite salit? Positum est agente catino

Durum olus, et populi cribro discussa farina:
 Tentemus fauces. Tenero latet ulcus in ore
 Putre, quod haud deceat plebeia radere beta.
 Alges, quum excussit membristimor albus aristas:
 Nunc face supposita fervescit sanguis, et ira
 Scintillant oculi: dicisque facisque, quod ipse
 Non sani esse hominis non sanus juret Orestes.

SATIRA IV.

"REM populi tractas?" barbatum hoc crede magistrum

Dicere, sorbitio tollit quem dira cicuta:

"Quo fretus? dic, o magni pupille Pericli.

Scilicet ingenium et rerum prudentia velox

Ante pilos venit: dicenda tacendaque calles.

Ergo ubi commota fervet plebecula bile,

Fert animus calidæ fecisse silentia turbæ

Majestate manus. Quid deinde loquere? *Quirites*

Hoc, puto, non justum est: illud male: rectius istud.

Scis etenim justum gemina suspondere lance

Ancipitis libræ: rectum discernis, ubi inter

Curva subit, vel quum fallit pede regula varo:

Et potis es nigrum vitio præfigere Theta.

Quin tu igitur summa nequidquam pelle decorus,

Ante diem blando caudam jactare popello

Desinis, Anticyras melior sorbere meracas.

Quæ tibi summa boni est? Uncta vixisse patella

Semper, et adsiduo curata cuticula sole?

Exspecta! haud aliud respondeat hæc annus.

I nunc:"

Dinomaches ego sum. Suffla. "Sum candidus.

"Esto,

Dum ne deterius sapiat pannucia Baucis,
Quum bene discincto cantaverit ocima vernæ."

M 64] Ut nemo in sese tentat descendere, nemo!
Sed præcedenti spectatur mantica tergo.

Quæsieris, "Nostin' Vectidi prædia?" *Cujus?*

"Dives arat Curibus, quantum non milvus ober-
ret."

*Hunc ais, hunc, dis iratis genioque sinistro,
Qui, quandoque iugum pertusa ad compita figit,
Seriolæ veterem metuens deradere limum,
Ingemit, Hoc bene sit! tunicatum cum sale mordens
Cæpe, et, farrata pueris plaudentibus olla,
Pannosam fecem morientis sorbet aceti.*

At si unctus cesses, et figas in cute solem,
Est prope te ignotus, cubito qui tangat, et acre
Desputat in mores: penemque arcanaque lumbi
Runcantem, populo marcentes pandere vulvas:
*Tu, quum in maxillis balanatum gausape pectas
Inguinibus quare detonsus gurgulio exstat?
Quinque palæstritæ licet hæc plantaria vellant,
Elizasque nates lubefactent forcipe adunca,
Non tamen ista filix ullo mansuescit aratro.*

Cædimus, inque vicem præbemus crura sagittis.
Vivitur hoc pacto: sic novimus. Ilia subter
Cæcum vulnus habes; sed lato balteus auro
Protegit. Ut mavis, da verba, et decipe nervos,
Si potes. *Egregium quum me vicina dicat,
Non credam? Viso si palles, improbe, nummo;
Si facis, in penem quidquid tibi venit amarum;
Si puteal multa cantus vibica flagellas:*

Nequidquam populo bibulas donaveris aures.
 Respue, quod non es: tollat sua munera cerdo.
 Tecum habita: noris, quam sit tibi curta suppellex!

SATIRA V.

AD ANNÆUM CORNUTUM.

VATIBUS hic mos est, centum sibi poscere voces,
 Centum ora, et linguas optare in carmina centum,
 Fabula seu mæsto ponatur hianda tragædo,
 Vulnere seu Parthi ducentis ab inguine ferrum.—

(18) *Quorsum hæc? aut quantas robusti carminis offas*
Ingeris, ut par sit centeno gutture niti?
Grande locuturi nebulas Helicone legunto,
Si quibus aut Procnes, aut si quibus olla Thyestæ
Fervebit, sæpe insulso cænanda Glyconi.
Tu neque anhelanti, coquitur dum massa camino,
Folle premis ventos; nec clauso murmure raucus
Nescio quid tecum grave cornicaris inepte;
Nec scloppo tumidas intendis rumpere buccas.
Verba togæ sequeris, junctura callidus acri,
Ore teres modico, pallentes radere mores
Doctus et ingenuo culpam defigere ludo.
Hinc trahe, quæ dicas, mensasque relinque Mycenis
Cum capite et pedibus, plebeiaque prandia noris.—

Non equidem hoc studeo, bullatis ut mihi nugis
 Pagina turgescat, dare pondus idonea fumo.
 Secreti loquimur. Tibi nunc, hortante Camena,
 Excutienda damus præcordia: quantaque nostræ

Pars tua sit, Cornute, animæ, tibi, dulcis amice,
 Ostendisse juvat. Pulsa, dignoscere cantus,
 Quid solidum crepet, et pictæ tectoria linguae.
 Hæc ego centenas ansim deponere voces,
 Ut, quantum mihi te sinuoso in pectore fixi,
 Voce traham pura, totumque hoc verba resignent,
 Quod latet arcana non enarrabile fibra.

Quum primum pavido custos mihi purpura
 cessit,

11.63 Bullaque succinctis laribus donata pendit ;
 Quum blandi comites, totaque inpune Suburra
 Permisit sparsisse oculos jam candidus umbo ;
 Quumque iter ambiguum est, et vitæ hinc error
 Diducit trepidas ramosa in compita mentes :
 Me tibi supposui. Teneros tu suscipis annos
 Socratico, Cornute, sinu. Tunc fallere sollers
 Adposita intortos extendit regula mores,
 Et premitur ratione animus vincique laborat,
 Artificemque tuo ducit sub pollice vultum.
 Tecum etenim longos memini consumere soles,
 Et tecum primas epulis decerpere noctes.
 Unum opus et requiem pariter disponimus ambo,
 Atque verecunda laxamus seria mensa.
 Non equidem hoc dubites, amborum federe certo
 Consentire dies, et ab uno sidere duci.
 Nostra vel aequali suspendit tempora Libra
 Parca tenax veri, seu nata fidelibus hora
 Dividit in Geminos concordia fata duorum,
 Saturnumque gravem nostro Jove frangimus una.
 Nescio, quid? certe est, quod me tibi temperat,
 astrum.

Mille hominum species, et rerum discolor usus.
 Velle suum cuique est, nec voto vivitur uno.
 Mercibus hic Italiam mutat sub sole recenti

Rugosum piper et pallentis grana cumini :
 Hic satur inrignuo mavult turgescere somno :
 Hic campo indulget : hunc alea decoquit : ille
 In Venerem est putris. Sed quum lapidosa chiragra
 Fregerit articulos, veteris ramalia fagi :
 Tunc crassos transisse dies, lucemque palustrem,
 Et sibi jam seri vitam ingemuere relictam.

At te nocturnis juvat impallescere chartis.
 Cultor enim juvenum purgatas inseris aures
 Fruge Cleanthea. Petite hinc juvenesque senesque
 Finem animo certum, miserisque viatica canis.
Cras hoc fiet. Idem cras fiet. Quid, quasi mag-
num ?

Nempe diem donas. Sed quum lux altera venit,
 Jam cras hesternum consumsimus. Ecce aliud
 cras

Egerit hos annos, et semper paullum erit ultra.
 Nam quamvis prope te, quamvis temone sub uno
 Vertentem sese, frustra sectabere canthum,
 Quum rota posterior curras et in axe secundo.

Libertate opus est, non hac, quam, ut quisque,
 Velina

Publius emeruit : scabiosum tesserna far
 Possidet. Heu steriles veri, quibus una Quiritem
 Vertigo facit ! hic Dama est non tressis agas,
 Vappa et lippus, et in tenui farragine mendax :
 Verterit hunc dominus, momento turbinis exit
 Marcus Dama. Papæ ! Marco spondente recusas
 Credere tu nummos ? Marco sub iudice palles ?
 Marcus dixit. Ita est. *Adsigna, Marce, tabellas.*
 Hæc mera libertas : hanc nobis piles donant. *f. iii. :*
An quisquam est alius liber, nisi ducere vitam
Cui licet ut voluit ? licet ut volo vivere : non sim
Liberior Bruto ? " Mendose colligis," inquit

M. 54: Stoicus hic, aurem mordaci lotus aceto.
 "Hoc—reliquum accipio—licet ut volo vivere,
 tolle."

*Vindicta postquam meus a prætore recessi,
 Cur mihi non liceat, jussit quodcumque voluntas
 Excepit, si quid Masuri rubrica vetavit?*

Disce! sed ira cadat naso rugosaque ganina,
 Dum veteres avias tibi de pulmone revello.
 Non prætoris erat, stultis dare tenuia rerum
 Officia, atque usum rapidæ permittere vitæ.
Sambucam citius caloni aptaveris alto.
 Stat contra ratio, et secretam gannit in aurem,
 Ne liceat facere id, quod quis vitiaabit agendo.
 Publica lex hominum naturaque continet hoc fas,
 Ut teneat vetitos inscitia debilis actus.
 Diluis helleborum, certo compescere puncto
Nescius examen. Vetat hoc natura medendi.
 Navim si poscat sibi peronatus arator
 Luciferi rudis, exclamet Melicerta perisse
 Frontem de rebus. Tibi recto vivere talo
 Ars dedit? et veri speciem dignoscere calles,
 Ne qua subærato mendosum tinniat auro?
 Quæque sequenda forent, quæque evitanda vicis-
 sim,

Illa prius creta, mox hæc carbone notasti?
 Es modicus voti, presso lare, dulcis amicis?
 Jam nunc adstringas, jam nunc granaria laxes?
 Inque luto fixum possis transcendere nummum,
 Nec gluto sorbere salivam Mercurialem?

Hæc mea sunt, teneo: quum vere dixeris, esto
 Liberque ac sapiens, prætoribus ac Jove dextro.
 Sin tu, quum fueris nostræ paullo ante farinæ,
 Pelliculam veterem retines, et fronte politus
 Astutam vapido servas sub pectore vulpem:

Quæ dederam supra, repeto, funemque reduco.
 Ni tibi concessit ratio, digitum exsere, peccas.
 Et quid tam parvum est? Sed nullo thure litabis,
 Hæreat in stultis brevis ut semuncia recti.

Hæc miscere nefas: nec, quum sis cætera fossor,
 Tris tantum ad numeros satyri moveare Bathylli.
Liber ego. Unde datum hoc sumis, tot subdite
 rebus?

An dominum ignoras, nisi quem vindicta relaxat?
 "I puer, et strigiles Crispini ad balnea defer."
 Si increpuit: "cessas nugator?" servitium acre
 Te nihil impellit: nec quidquam extrinsecus in-
 trat,

Quod nervos agitet. Sed si intus et in jecore
 ægro

Nascantur domini: quin tu inpunitior exis,
 Atque hic, quem ad strigiles scutica et metus egit
 herilis!

Mane piger stertis: "Surge," inquit avaritia: "eja
 Surge! "Negas. Instat," surge! "inquit. *Non*
queo. Surge!"

Et quid agam? "Rogitas? saperdas advehe
 Ponto,

Castoreum, stuppas, ebumum, thus, lubrica Coa.
 Tolle recens primus piper e sitiante camelo.

Verte aliquid, jura." *Sed Jupiter audiet.* "Eheu

Baro, regustatum digito tarebrare salinum

Contentus perages, si vivere cum Jove tendis."

Jam pueris pellem succinctus et cœnophorum
 aptas:

Ocius ad navem! Nihil obstat, quin trabe vasta

Egæum rapias, nisi sollers luxuria ante

Seductum moneat: "Quo deinde insane ruis?
 quo?

Quid tibi vis? calido sub pectore mascula billis
 Intumuit, quam non exstinxerit urna ciculæ.
 Tun' mare traussilias? tibi ~~arta~~ ^{arta} cannabe fulto,
 Cœna sit in transtro? Veientanumque rubellum
 Exhalet, vapida læsum pice, sessilis olba?
 Quid petis? ut numi, quos heic quincunce mo-
 desto

Nutrieras, pergant avidos sudare deunces?
 Indulge genio: carpamus dulcia: nostrum est,
 Quod vivis: cinis et manes et fabula fies:
 Vive memor leti: fugit hora: hoc, quod loquor,
 inde est."

En quid agis? duplici in diversum scinderis
 hamo:

Huncceine, an hunc sequeris? subeas alternus
 oportet

Ancipiti obsequio dominos; alternus oberres.
 Nec tu, quum obstiteris semel, instantique negaris
 Parere imperio: *rupi jam vincula!* dicas.
 Nam et luctata canis nodum abripit: attamen illi,
 Quum fugit, a collo trahitur pars longa catenæ.

Dave, cito, hoc credas jubeo, finire dolores
Præteritos meditor. Crudum Chærestratus un-
 guem

Abrodens ait hæc. *An siccis dedecus obstem*
Cognatis? an rem patriam rumore sinistro
Limen ad obscænum frangam, dum Chrysidis udas
Ebrius ante fores extincta cum face canto?—

"Euge, puer, sapias: dis depellentibus agnam
 "Percute."—*Sed censen' plorabit, Dave, relicta?*—
 "Nugaris: solea puer objurgabere rubra.
 "Ne trepidare velis, atque arcetos rodere casses.
 "Nunc ferus et violens: at, si vocet, haud mora,
 dicas:

"*Quidnam igitur faciam? nec nunc, quum accersor, et ultro*

"*Supplicet, adcedam?*" Si totus et integer illino
Exieras, nec nunc. Hic, hic, quem quærimus,
hic est:

Non in festuca, lictor quam jactat ineptus.
Jus habet ille sui palpo, quem ducit hiantem
Cretata ambitio? vigila, et ciceringere large
Rixanti populo, nostra ut Floralia possint
Aprici meminisse senes. Quid pulchrius? At
quum

Herodis venere dies, unctaque fenestra
Dispositæ pinguem nebulam vomuere lucernæ,
Portantes violas, rubrumque amplexa catinum
Cauda natat thynni, tumet alba fidelia vino:
Labra moves tacitus, recutitaque sabbata palles.
Tunc nigri lemures, ovoque pericula rupto:
Tunc grandes Galli, et cum sistro lusce sacerdos,
Incussere deos infantes corpora, si non
Prædictum ter mane caput gustaveris alli.

Dixeris hæc inter varicosos centuriones
Continuo crassum ridet Vulfenius ingens,
Et centum Græcos curto centusse licetur.

SATIRA VI.

AD CÆSIUM BASSUM

ADMOVIT jam bruma foco te, Basse, Sabino?
Jaune lyra et tetrico vivunt tibi pectine chordæ?
Mire opifex, numeris veterum primordia vocum,

A. PERSII FLACCI.

atque marem strepitum fidis intendisse Latinæ:
 Mox juvenes agitare jocos, et pollice honesto
 Egregius luisse senes. Mihi nunc Ligus ora
 Intepet, hibernatque meum mare, qualatus ingens
 Dant scopuli, et multa litus se valle receptat.

Lani portum, est operæ, cognoscite, cives.
 Cor jubet hoc Enni, postquam destertit esse
 Mæonides, Quintus pavone ex Pythagoreo.
 Heic ego securus vulgi, et quid præparet Anster
 Infelix pecori: securus et angulus ille

Vicini nostro quia pinguior. Etsi adeo omnes
 Ditescant orti pejoribus, usque recusem
 Curvus ob id minui senio, aut cœnare sine uncto,
 Et signum in vapida naso tetigisse lagena.

Discrepet his alius. Geminos, horoscope, varo
 Producis genio. Solis natalibus est qui
 Tingat olus siccum muria valet in calice emta,
 Ipse sacrum irrorans patinæ piper. Hic bona
 dente

Grandia magnanimus peragit puer. Utar ego,
 utar;

Nec rhombos ideo libertis ponere lautus,
 Nec tenuem sollers turdarum nosse salivam.
 Messe tenus propria vive, et granaria, fas est,
 Emole. Quid metuis? Occa, et seges altera in
 herba est.

Ast vocat officium: trabe rupta Bruttia saxa
 Prendit amicus inops, remque omnem surdaque
 vota

Condidit Ionio: jacet ipse in litore, et una
 Ingentes de puppe dei, jamque obvia mergis
 Costa ratis laceræ. Nunc et de cespite vivo
 Frange aliquid: largire inopi, ne pictus oberret
 Cærules in tabula.—Sed cœnam funeris heres

Negliget iratus, quod rem curtaveris : urnæ
Ossa inodora dabit, seu spirent cinnama surdum,
Seu ceraso peccent casiæ, nescire paratus.

"Tunc bona incolumis minuas?" Et Bestius
urget

Doctores Graios : *Ita fit, postquam sapere urbi
Cum pipere et palmis venit nostrum hoc maris ex-
pura :*

Fœniscæ crasso vitiantur unguine pulles.—
Hæc cinere ulterior metuas? at tu, meus heres
Quisquis eris, paullum a turba seductior audi :
"O bone, num ignoras? missa est a Cæsare laurus
Insignem ob cladem Germanæ pubis, et aris
Frigidus excutitur cinis : ac jam postibus arma,
Jam chlamydes regum, jam lutea gausapa captis,
Essedaque, ingentesque locat Cæsonia Rhénos.
Dis igitur genioque ducis centum paria, ob res
Egregie gestas, induco. Quis vetat? aude!
Væ, nisi connives! oleum artocreasque popello
Largior. An prohibes? dic clare! *Non adeo,*
inquis.

Exossatus ager juxta est. Age, si mihi nulla
Jam reliqua ex amitis, patruelis nulla, proneptis
Nulla manet patrui, sterilis matertera vixit,
Deque avia nihilum superest : accedo Bovillas
Clivumque ad Virbi : præsto est mihi Manius
heres."

Progenies terræ?—"Quære ex me, quis mihi
quartus

Sit pater : haud prompte, dicam tamen. Adde
etiam unum,

Unum etiam : terræ est jam filius. Et mihi ritu
Manius hic generis prope major avunculus exit.

Sum tibi Mercurius: venio deus huc ego, ut ille
Pingitur. An renuis? vin' tu gaudere relictis?"

Deest aliquid summæ. "Minui mihi: sed tibi
totum est,

Quidquid id est. Ubi sit, fuge querere, quod
mihi quondam

Legarat Stadius, neu dicta repone paterna: .
Fœnoris accedat merces: hinc exime sumptus."

Quid reliquum est?—"Reliquum? nunc nunc im-
pensius unge,

Unge puer caules. Mihi festa luce coquatur

Urtica, et fissa fumosum *sinciput* aure,

Ut tuus iste nepos olim, satur anseris extis,

Quum morosa vago singultiat inguine vena,

Patriciæ immetat vulvæ? mihi *trama* figuræ

Sit reliqua: ast illi tremat *omento* popa venter?"

Vende animam lucro: mercare, atque excute
sollers

Omne latus mundi, ne sit præstantior alter

Cappadocas rigida pingues plausisse *catasta*.

Rem duplica.—*Feci: jam triplex, jam mihi quarto,*

Jam decies redit in rugam. Depinge, ubi sistam.

Inventus, Chrysippe, tui finitor acervi!—

D. JUNII JUVENALIS VITA

QUÆ VULGO TRIBUITUR SUETONIO.


JUNIVS Juvenalis, libertini locupletis, incertum filius, an alumnus, ad mediam fere ætatem declamavit, animi magis causa, quam quod scholæ se aut foro præpararet. Deinde paucorum versuum Satira non absurde composita in Paridem pantomimum poetamque ejus semestribus militioliis tumentem, hoc genus scripturæ industriose excoluit. Et tamen bene diu ne modico quidem auditorio quidquam committere est ausus. Mox magna frequentia magnoque successu bis ac ter auditus est, ut ea quoque, quæ prima fecerat, inferciret novis scriptis:

*Quod non dant proceres, dabit histrio. tu Came-
rinos*

Et Bareas, tu nobilium magnæ atria curas.

Praefectus Pelopea facit, Philomela tribunos.

Erat tum in deliciis aulæ histrio: multique fantorum ejus quotidie provehebantur. Venit ergo Juvenalis in suspicionem, quasi tempora figurate notasset, ac statim per honorem militiæ, quamquam octogenarius, Urbe submotus missusque ad præfecturam cohortis, in extrema Ægypti parte tendentis. Id supplicii genus placuit, ut levi atque joculari delicto par esset. Verum intra brevissimum tempus angore et tædio periit. ☞



1

~~Handwritten text, possibly a signature or name, followed by "Handwritten text" and "Handwritten text".~~

~~Handwritten text, possibly a signature or name, followed by "Handwritten text" and "Handwritten text".~~

